

## Lucas Jesushuunoa Cununi

**Lucaspan tau huaquin ahun  
tsain cununi cuscan**

**1** <sup>1-2</sup>Teófilo un mia cunu fomai futsafoan Jesucristohuunoa cunuafu cuscan mirifi min icoindría huacoinnon. Jesús acaiton oinmisifo cuscan yafi ahuun tsain yoimisifoan noco yoinifo cuscan nannori futsafoan aqui cununifo. <sup>3</sup>Ascano urifi un nantifi yocapacuni Jesushuunoa aqui cunushquin. Nan caini cuscan huafain nan ahuamamishti huayopaonishaquin apa ari nai muran naso caini cani. Ascacun afu rafuafu un ato yoca urifi tapisharashqui. Ascashon cayacafi cunushon mia fomashquin. <sup>4</sup>Ascacun uhuun cunuhuunshon mia futsafoan yosiainfo cuscan min icoindría huacointiro.

**Diosin nai oinmatinin nan Juan yorafo  
unu muran iquimapacumisi caiantaima  
ahuun apa tapimayoni**

<sup>5</sup>Ascacun natian un nica cuscan un mia yoinon. Herodes Judea anoa niaifoatian nantianri Zacarías nocofunu shara nanno ini. Naanfin Aarón ahuun funaquin. Ascashu nannoahuun caifohuunshon Dios cufimisi ipaoni. Aarón ahuun funafo shoco ranan. Nan shoco futsafoan aton niaifo Abías. Nanrifi Zacarías ahuun niaifo ini. Nan Zacarías ahuin Isabel arifi Aarón funa. <sup>6</sup>Ascashon nan rafutan Diosin tsain cununi cuscan nicasharacoipona.

Nantifi Diosin yononi cuscan tanasharamisifo. Nan rafutan tanasharaifoan Diosin oinpaoni. Ascacuacai tsoan ato ahuashta rafatiro ipaonima. <sup>7</sup>Ascafashu facuoma rafu. Zacarías anifo icaino ahuinri yoshafo toosma ini.

<sup>8</sup>Ascano Abías ahuun shocofo nan ahuun yorafohuunshon Dios cufimisifo ato yoini isca huaquin, —Manfin natian siete oshatan Dios cufiti pushu muranshon man yonoshonicai, —ishon ato yoini. Ascano nannori Zacarías atofu ini. <sup>9</sup>Nantianri Zacarías catonni Dios fu tsainti pushu muran iquishon inti shara coanon. Nan inti ahuun anu incienso. Nanscara cufimisifoan aton fuyamisi ipaoni. <sup>10</sup>Nan incienso fiin cuscara coaino yora ichapafo cufiti pushu umainti ano nishon Dios cufishcaquin.

<sup>11</sup>Ascashon Dios cufiti camaqui incienso coa ahuun mumihuuri Diospan oinmati afu nai muran ica Zacariasqui niriscatani. <sup>12</sup>Ascaíno Zacarías mustairitan fasi ratucoinni. <sup>13</sup>Ascafaiton Diosin oinmatinin afu nai muran icaton yoini isca huaquin, —Ratuyamahuu, Zacarías. Min cufiainton Diosin man mia nica. Min ahuin Isabel chipo furonanfacu nanushquin. Ascan caincun min anuquin Juanran min huashquin. <sup>14</sup>Ascashu min fasi aqui unimasharacoipona. Ascaíno yorafori

fasi aqui unimacoinsquin caiano.  
 15 Ascano Upa Diosirifi aqui  
 unimashquin. Nocofunu fasi sharacoin  
 iishquin. Ascashocai ahuara pau  
 ayapacunacama. Fimi unu pau  
 ayayamafain ayati futsa pauri  
 ayashquima. Caiyaintian Diosin Yoshin  
 sharapan nan iquishquin. 16 Nan  
 nocofunauitian ahuun caifo Israelifo  
 Diosin tsain shara ato yoishquin ato  
 chaca shatunonfo. Ascano aton Ifo  
 Diosiqui nasononfo.

17 Ascashu nan Juan Elías ipaoni  
 cuscara arifi iishquin. Elías  
 Dioshuunshon ahuun yorafo cayacafi  
 icocoin tapimapaoni cuscan nanscarifi  
 aqui Juanpan ahuun yorafo arifi ato  
 tapimashquin. Ascano ahuun  
 tsainhuunoashu ato apaflo yafi aton  
 facufo afanan noinanshcani. Ascashu  
 nan Diosin tsain nicacasmamisifoan arifi  
 aton chaca shatucashon Dios icoira  
 huafain shinansharashcani. Ascacun  
 Juanhuunoashu ahuun caifofo  
 itisharashcani Diospan furun atoqui  
 nocoaitian a nicasharashcaniran,  
 —ishon yoiaiton.

18 Nicaquin Zacarías cumani,  
 —Ahuuscashomun min yoiai cuscan un  
 icoira huatiroquin? Unfi anifocoinsquin.  
 Uhuun ahuinrifi yoshafoquin,  
 —huaiton.

19 Afanan cumaquin, —Unfi  
 Gabrielquin. Un Dios fu imisi. Ascacun  
 nanton ua nichian un ahuun tsain shara  
 mia yoinon. 20 Ascan un mia yoiai  
 cuscacai mian icoira huaima. Ascan  
 natiancái min afanan tsainyoima nan  
 min facu caiyaintian. Un mia yoiai  
 cuscafin nan apaiyaitian Diosin  
 huaashquiquin, —ishon Diosin nai  
 oinmatinin yoini.

21 Ascaíno yorafoan Dios fu tsainti  
 pushu umaintishon cufinquin  
 anaiticatan Zacarías mananifo.

Ascafaino Zacarías atoqui funa  
 caiamaino yoinifo, —Ahuuscaín Dios  
 cufiti pushu murannoashu Zacarías  
 saman huaimun? —icashu yoinannifo.  
 22 Ascariaifoanno atoqui cainfiashocai  
 ato tsainquinima. A pucutiroma  
 muuquin ahuun mucupan ato yoi  
 fustini. Ascaiton onannifo Dios fu tsainti  
 pushu muranshon Zacarías namapan  
 cuscara oianran, icashu ahuun  
 yoinannifo.

23 Ascashu yorafohuunshon Dios  
 cufimisifo ato yono anaiticatan Dios  
 cufiti pushu murannoashu fonifo.  
 Ascaíno Zacarías arifi ahuun pushu ano  
 cani. 24 Ascashon chipo ahuinin facu  
 nanuni. Ascashucai ahuun pushu  
 murannoashu mucu fustiti oshu raqui  
 caipainima. 25 Ascashon Isabel  
 shinankuin isca huani, —iAicho!  
 Diosihuunshon uhuun funun ua facu  
 nanumana. Diosin ua ashoan. Afin ua  
 nanumapaiyaitian ua facu nanumana.  
 Uhuun ramapaiquin. Asca natiancái  
 afanan uhuunoa yorafoan yoitiroma isca  
 huaquin, “Nacai facuyanacamaran,”  
 ishocai yoitiromaran, —ishon  
 shinanni.

**Jesús cainshquiai cuscan Diosin nai  
 oinmatinin yoini**

26-27 Ascano seis oshu Isabelqui man  
 caano Diosin nai oinmati Gabriel  
 Mariaqui niriscatani. Nan María  
 funuoma ini. José fu fiananfotaima afu  
 iyopaonima. Tsoaricai afu imisima.  
 Ascan José ahuun shunifin David  
 iniquin. Nan Israelifoan ato niaifo  
 ipaoni. Ascacun Diosin ahuun oinmati  
 afu nai muran icaton yoini isca huaquin,  
 —Galilea mai Nazaret pushurasi muran  
 Mariaqui catastahuun, —ishon ahuun  
 oinmati Gabriel nichini. 28 Ascano aqui  
 nocoshon yoini, —Un miqui oa. Diosin  
 oian min fasi sharacoincun. Mia fasi

noicoin. Nocon Ifo mifu icaran, —ishon yoini.

<sup>29</sup>Ascaiton nicaquin María ahuun nomuran shinanpaini, —¿Raquiri ua yoipaimun? —ishon shinanni. <sup>30</sup>Ascaiton afanan cumani, —Maria, ratuyamahuu. Diosin mihiun noifain miqui unimasharai. <sup>31</sup>Ascan minfin natian furonanfacu nanuicai. Ascashu caincun min anuquin Jesusran, huaashquin. <sup>32</sup>Ascano caianshu niaifocoin iishquin. Diosin nai murannoaton ahuun shuni David niaifo ipaoni cuscan arifi apahuunoashu niaifocoin iishquin. <sup>33</sup>Ascashu naanfin Israelifoan aton niaifo unupacunamacamaran, —ishon Gabriel yoititon.

<sup>34</sup>Afanan María cumani, —Uncai funuyamafinquin. Uacai tsoan tanamisima. ¿Ascan ahuuscashomun un facu nanutiroquin? —huaiton.

<sup>35</sup>Diosin oinmatinin afu nai muran icaton afanan María cumani, —Diosin ahuun Yoshin Sharapan miqui oshon mia facu nanumashquin. Nanto ahuun curushhuunshon ahuamamishti huatiro. Nanhuunshon mia facu nanumashquin. Ascan nan facu cainshquiaifin shara fustisi imisiquin. Ahuashtacai chaca huamisima. Naanfi Diospan facuquin. <sup>36</sup>Min yaya yoshafoancai facu nanumisima. Ascan toosmaran huafiamisifo natian man facu nanua seis oshu man aqui caa. <sup>37</sup>“Ascacun ahuacai Diosin aquimaracai,” non huatiroma. Nantofi ahuamamishti huatiroquin, —ishon yoini.

<sup>38</sup>Ascaiton afanan María cumani, —Unfin uhuun Ifoan oinmatiquin. Afifin nan apaiyai cuscan ua huatiroquin. Nan mian yoiayi cuscan ua huanonquin, —ishon María yoiaino amaqinoashu yamariscatani.

### Marían Isabel oin cai cani

<sup>39</sup>Ascano man shafa ranan finontan María ahuun yaya ano cai fasi coshi

cani nocoriscapai. Nan Judea muran pushurasí ano machihuanrasifo ini.

<sup>40</sup>Nocotan Zacarías ahuun pushu muran iquitoshiquin ahuun yayan Isabel yoini, —Yayan, un mia oinyoiran, —huani.

<sup>41</sup>Ascaiton nicai Isabel ahuun shaqui muranshon ahuun facun potapotani. Asca huaino Diosin Yoshin Sharapan ahuun nomuran shinansharamani.

<sup>42</sup>Ascaino oi ashcafinitin Isabel ahuun raru María yoini isca huaquin, —iAicho! Rato ainfo futsacai mia acai cuscan Diosin catoanma. Fasi mia shara huacoingga. Min facu chipo cainyanayo Apa Diosin aquí unimacoinqui a cushusharashquin. <sup>43</sup>Ascan un ahuara shara huua rafanancái Diosin ua shara huama. Ascashon uhuun Ifoan ahuun ahua uqui nichian ua oinyonon.

<sup>44</sup>Ascano min tsain nicai unimaqui uhuun shaqui muranshon uhuun facun ua potapotaca. <sup>45</sup>Upa Diosin nan min ishquiai cuscan mia iquisi tapimanaiton nantifi ahuun tsain min icoindra huua. Ascacun Diosin mia unimamaran, —ishon Isabel ahuun raru María yoini.

<sup>46</sup>Ascaiton María arifi ahuun yayan yoini,

“Uhuun nomuranshon un shinanqui isca huua,  
‘Ifon min sharacoin. Tsoa futsacai mia cuscara sharama.

<sup>47</sup>Min uhuun Numamisi  
Diosiran icashu uhuun nomuran  
un fasi unimacoinna.

<sup>48</sup>Ascashu un ahuun oinmati.  
Un ahuamafiacun uhuun ramapaiquin ua oinfafainni.  
Ascacun ua Diosin shara huua cuscan yorafoan uhuunoa yoipacunacafo.

<sup>49</sup>Diosin ahuamamishti huamisiton ua ahuara sharashtacoin ashoan.  
Aafin shara fustisiquin.

- <sup>50</sup> Ascan ratoran futsan Dioshuunoa  
nicaquin ahuunoa  
shinansharafafainai.  
Nan cuscara yorafihuun Diosin  
ramapaipacunaca.
- <sup>51</sup> Diosin ahuun shinanpan  
ahuamamishti huamisi.  
Ascashon nan cacapaimisifoan  
aton nomuran  
shinanchacamisifo cuscan  
Diosin ato shatumafain atori  
onaintimai.
- <sup>52</sup> Ascatac niaifofori Diosin ato  
shatumana afanan niaifo  
inonfoma.  
Ascashon nan ahuamafo ato  
shinansharamana nanfoan  
tapinonfo ahuun facufocashon.
- <sup>53</sup> Ratoran futsa ahuuomafo foni  
cusecarao fasi Diosihuunoa  
tapipai tanasharashcaquin.  
Nanscarao Diosin ato  
cushusharatiro.  
Ascashon ahuara yopai cuscan ato  
inansharafain a  
tanasharaifoanri  
ato unimamashquin.  
Ascashon ahuara ichapa  
ayafoiashu Diosihuunoa  
shinanyamaifo copiquirifi ato  
ahuara inainma.
- Man mafo ichapayafiaashu ato  
nomuran shinansharayamafain  
tsoa unimamisima.
- <sup>54-55</sup> Ascafiaifoanno nocon caifofo  
Israelifofin Diospan  
oimmatifoquin.  
Ascashon non ahuara acai cuscan  
noco ashomisi.  
Nonfin noco shuni Abraham  
ahuun funafoquin.  
Ascacun nocohuun  
ramapaipacunaca.  
Nannori Upa Diosin nocon shunifo  
yoiyotianiran,”

ishon María yoini.  
<sup>56</sup> Ascashu oshu rafu non fusti ahuun  
yayan Isabel fu iyoni. Ascatac María  
ahuun pushu ano nasoni.

**Nan yorafu unu muran iquimapacumisi  
Juan caini cuscan**

<sup>57</sup> Ascashu Isabel ahuun facu  
cayaintian furonanfacu cainni.  
<sup>58</sup> Ascaiton a chaima icafo futan ahuun  
yorafuan nicanifo nocon Ifo Isabelhuun  
ramapaiqui facu cainmashara. Ascashu  
afu unimacoinnifo. <sup>59-60</sup> Ascatac ocho  
osha finontan Zacarías pushu ano ahuun  
yorafu funifo facushta ahuun foshqui  
rupa shatuni fucani. Ascashon apa  
anuquiri Zacariasran huapaifiaifoan  
ahua Isabel yoini, —Ma. Anoricai ahuun  
anu iquima. Juan ishqiran, —ishon  
ahuhan yoaiton.

<sup>61</sup> Cumanifo, —Ma. Rato min yorafuan  
ahuun anucuai Juanmaran, —ishon  
yoinifo.

<sup>62</sup> Ascashon Zacariasrifi yocanifo ato  
mucumansi raquinimain ahuun facun  
anuicai. Ascafiaifoan tsaintiroma  
muuqui ahuun mucumansi  
mutoacufaini ahuun anu  
tapipaifiainfoan. <sup>63</sup> Ato papio yocain  
mucu mushan mushainni. Ascaiton  
inanco cunutan ato ismaiton oianfo  
Juan ini. Ascaro oincani mustairitan,  
—Icon ahuun anu Juan ishqiran,  
—ishon shinannifo. <sup>64</sup> Ascano ahuun  
facun anu cunutapai Zacarías afanan  
tsainnacahuani. Ascashon Dioshuunoa  
shara yoini. <sup>65</sup> A chaima icafo futan  
Judea muran machi ichapa ano icafoan  
nicacaquin Diosin aca cuscan fasi  
sharacoin. —Noncái ascara  
nicayomisimaran, —icashon Zacarías  
yafi ahuin Isabel non aton facu  
Juanhuunoa yoiquin futsanifo.

<sup>66</sup> Ascashon nan nicafoan yoinifo,  
—Ahuu cuscaramun nan facu

iishquiquin? Man non oian facufiacun  
Diosin Yoshin Sharapan iquinaiton,  
—icashu yoinannifo.

**Zacarías fanainni cuscan**

<sup>67</sup>Ascano facu ahuun apa Zacarías  
Diosin Yoshin Sharapan iquinaiton inon  
pacoai cuscan yoini isca huaquin,

<sup>68</sup>“Uhuun caifo Israelifoan nocon  
Diosin fasi sharacoin.

Nocoqui oa noco numashqui.

<sup>69</sup>Diosin nocon Numamisi nan  
ahuamamishti huamisi nocoqui  
nichian.

Noco shunifoan aton niaifo David  
ipaoni.

Nanton ahuun funa nocoqui  
nichian noco niaifocoin  
ipashanon.

<sup>70</sup>Nannori ahuun tsain inon pacoai  
yoimisisharafohuunshon Diosin  
yoiyon.

<sup>71</sup>Ascashon yoiquin isca huani, ‘Un  
mato cushui.

Nan mato noicasmamisisifoan  
afanan mato ahuuasca  
huanonfoma.

Ascacun un mato Numamisi  
matoqui nichiran,’ ishon Diosin  
inon pacoai yoimisifohuunshon  
noco yoini.

<sup>72-75</sup>Ascashu noco shunifohuun Diosin  
ramapaipaoni.

Abraham yoiyonii cuscacai Diosin  
ointi aquimanama.

Yoiquin isca huani, ‘Un min funafo  
numashqui ato noicasmaifoan  
ato ahuuasca huanonma.

Ascano ratutama ua  
yonoshopacutirofoquin,’ ishon  
Diosin yoiyonii.

Nocon Ifoan yoiyotiani cuscacoin  
man noco ashoin non  
isharacoincain non ahuun tsain  
tanapacushanon,”

ishon Zacarías yoini. <sup>76</sup>Ascashon ahuun  
facu yomushtafiacun pushcoashu  
ishquiai cuscan yoiqui isca huani,

“Uhuun facushtan, ‘Mirifi min  
Diosin tsain yoishomisiran,’  
mia huaashquicani.

Diosin nai murannoaton ahuun  
Yoshin Sharahuunshon ishquiai  
cuscan

min ato yoifoanfafainquin isca  
huashquin.

‘Nocon Ifo oshquiquin  
itisharacahuun.

Maton chacari shatucahuun a  
nocoaiton nicasharashcaquin.

<sup>77-79</sup>Diosin fasi nocohuum ramapaiqui  
nocon Ifohuunshon noco chaca  
soashona non afu ipashanon,’  
ishon noco caifo min ato yoishquin.

Nii muran faquishainocai non  
oinsharatiroma.

Chashamatimaisicai non fai  
tanasharatiroma  
nocosharapaiquin.

Nanscarifiai nocon Ifo oataimano  
tsoan Diosin fai tapiataima.

Shafaino fari otiro afanan faquish  
inonma.

Nanscarifiai nocon Ifo nai  
murannoashu oataima nan  
faquish cuscara.

Ascafia nan nocoqui oaitian nan  
chashamati cuscara shara  
iishquin.

Ascashon Diospan fai noco  
oinmashquin

ahuunoashu non Dios fu rafunon.

Nonricai nai afanan ratutiroma.  
Naashumain non Upa Dios fu  
ipasharatiro.

Non nicuri noco cushusharafain  
nocon ointi fucash huanonma  
non isharashquin,”

ishon Diosin Yoshin Sharahuunshon  
Zacarías yoini.

<sup>80</sup>Ascashu nan Juan facu pushcocoин sharani. Ascashon shara fustisi tanapaiquin ahuun nomuran Diosin tsain shara nanucoинни. Tsoa istaipama anori iyopaoni ahuun caifo nan Israelifo Diosin tsain yoiquin tau huaitian.

### Jesús cainni cuscan

*Mt 1.18-25*

**2** <sup>1</sup>Nan Juan caiyaintianri Romanonfoan aton niaifoan ahuun anu Cesar Augusto. Nanton ahuun yorafo yononi maitio ato tanan huashon aton anufo cununofo ahuuti yoramainquin tapipaiquin. <sup>2</sup>Nantianri Siria anoafoan ato niaifo ahuun anu Cirenio ini. Ascan nan Cirenio niafoaitian ato tanan huaquin tau huani. <sup>3</sup>Ascano nantifi focanashu aton mai anoashu cununifo.

<sup>4</sup>Ascacun José yafi María Nazaret pushurasi Galilea murannoashu focani Belén pushurasi Judea mai ano noconifo. Nan Belén David ahuun mai ini. José David ahuun funa. Ascacun arifi Belén ano cani. <sup>5</sup>María fu aton anu cunui focani fonifo. Ascashu man yoinanfo ini afu fiananshquin. Ascafia nantianri man facu nanua ini. <sup>6</sup>Belén ano nocoaitian facu cainti sunuin ini. <sup>7</sup>Nannoashu furonanfacu caianshu facuyai tauni. Nantifi pushu fospifafainano tsoan ato iquimapaiyamaino inafoan pimisifo pushu facushta murannoashu furun cainni. Caincun ahuun rashutinin rashuni. Ascashon inafoan piafo muran furun ratani.

### Diosin nai oinmatifo yafi chashoan cushumisifo

<sup>8</sup>Nan Belén chaimashon chashohuan cushumisifoan nan yamutari aton inafo faasi funununshon cushushinifo.

<sup>9</sup>Ascaino atoqui nocon Ifoan ahuun

oinmati afu nai muran icafo fotoi chashapacucahuani. Faasi funununshon Diosihuunshon ato chashariscatani. Ascaino nan chashoanfo cushumisifo fasi ratui futsunifo. <sup>10</sup>Ascaifoan ato yoini, —Ratuyamacahuun. Un mato tsain fasi sharacoин yoiyoаquin. Nicai man unimaino manifoti anoafori unimanofo. <sup>11</sup>Na yamutafin Belén nan mato shuni David cainni anoashuri maton Numamisi cain huanquin. Naanfin Upa Diosin matoqui nichiaquin. Nan maton cafoan manamisifo. Nanrifi maton Ifoquin. <sup>12</sup>Ascacun un mato yoi ahuuscashomain man fuchitiroquin. Nan facu ahuun rashutinin rashucai inafoan pimisifo muran racacun man fuchitiroquin, —ishon Diosin nai oinmatinin ato yoini.

<sup>13</sup>Ato yoiqui unutapaiyaino samamashta atirifi Diosin oinmati afu nai muran ica atoqui cuyopacunifo. Ascashon Diosihuunoa yoisharacaquin isca huanifo.

<sup>14</sup>*"Diosin fasi shara. Nai murancoin ica. Atirifoqui Diosin unimai. Nafo aton nomuran unimasharacaniran,"* icashon yoinifo.

<sup>15</sup>Ato yoiqui anaiticatan atomaquinoashu Diosin oinmatifo nai muran fonifo. Ascaino nan chashoan cushumisifo yoinifo, —Non Belén ano canon. Nocon Ifoan noco yoia cuscan non oin fonon, —icanashu yoinannifo.

<sup>16</sup>Ascashu ichocaquein María yafi José fuchitoshiquin oianfo facu inapan pimisifo muran fasi toca racai ini.

<sup>17</sup>Ascatan nan facu oianfo cuscan huafain ato yoifoanfafainifo. <sup>18</sup>Ascan nan chashohuan cushumisifoan ato yoiafoan nicacaquin yoinifo, —iAira! ¿Ahuuscashomun ascara shara noco yoiafoquin? —inifo. <sup>19</sup>Ascacun María ahuun nomuran fasi shinanpaomi nan nicafain oian cuscan. Ascashori,

—iAicho! Diosin noco shara huashoanran, —ishon shinanpaoni.  
<sup>20</sup>Ascashu nan chashohuan cushumisifo ato yoifoafafaintacani aton inafo ano naso furacashon yoinifo isca huaquin, —iAicho! Dios fasi shara. Nan noco yoia cuscan huafain nanscaracoin man non oianran, —icashu yoinannifo.

**Dios fu tsainti pushu muranshon apa futan ahuan aton facu Jesús Dios inannifo**

<sup>21</sup>Jesús cainta ocho oshatan nan facunahuun foshqui rupa shatuni. Nantianri anuquin Jesusran huani. Nannori María facu nanuataima Diospan oinmatinin afu nai muran icaton yoiquin tau huani.

<sup>22</sup>Moisés Israelifo yononi isca huaquin, —Maton ahuin facu caianshu cuarenta oshatan Dios fu tsainti pushu muran iquiyotiromaran, —ishon ato yononi. Ascacun María futan José aton facu man cuarenta oshatan Jerusalén ano iyonifo. Dios fu tsainti pushu muranshon apa Dios inanshcaquin. Ascano Dios fu tsainti pushu muran iquicashon yoinifo isca huaquin, —Upa Diosin nocon facu non mia ihuushona mia inainyoshquin mia yonoshopacushanon, —ishon yoinifo.

<sup>23</sup>Ascacun nannori nocon Ifoan yononi isca huaquin, —Nan furonanfacu cain tauafo nocon Ifo Diosina. Ascashon afi amapaiyai cусcan ato huapashanon, —ishon cununi. <sup>24</sup>Nantianri José yafi María Diosin yononi cусcain ruhui rafu iyamarai ruhui cусcara rafu foni nan ahun caifohuunshon Dios cufimisi María inanni a rutushonon. Ahun chaca soapaiyaiton Diosin ashonon. Ascashon a tanasharafain ismanon.

<sup>25</sup>Ascan nantianri Jerusalén anoa nocofun shara ahun anu Simeón. Diosin Yoshin Sharapan iquina. Nanton Dios tanasharashon cufifafainpaoni. Ascashon nan Diosin catoan Israelifoan

aton Numamisi manafafainpaoni.

<sup>26</sup>Ascacun Diosin Yoshin Sharapan ahuun nomuran yoini, —Min naataishoma nan Diosin catoan maton Ifo Cristo min oinshquiran, —ishon yoini. <sup>27</sup>Ascashon Diosin Yoshin Sharapan shinanmani cuscan Israelifoan Dios fu tsainti pushu muran iquiní.

Ascaino José yafi María arifi aton facuya iquifainnifo. Diospan tsain yononi cuscan aton facu huashoshcaquin iquinifo. <sup>28</sup>Ascano Simeón atoqui otan yoini, —iAicho! —ianan facu chishtoinifoanni. Ascatan Dios yoisharaquin isca huani,  
<sup>29-30</sup> “Ifon, min nantifi tapicoian.

Mian yoiyotiani cuscan mun oian. iAicho!

Natian unimacaini un nai manmain min facu nan nocon Numamisi mun oianmashu.

<sup>31</sup> Nantifi manifotiton aton Numamisi min noocoqui nichian.

<sup>32</sup> Ascacun nocon caifomafoan mia onanyamafiamisishaquin min facuhuunshon mia onanshquicani.

Ascafia nonfin min yora Israelifoquin non tapicoinshquin na facuhuunoashu Diosin nocohuun ramapaiyaiton. Ascano ahuunshon min noco yoioatiani cuscan noco huashoshquiran,”

ishon Simeón yoini.

<sup>33</sup> Ascaiton nicacaquin José futan Marían aton nomuranshon shinanquin isca huanifo, —iAira! Noncái iscara nicayomisimaran, —ishon shinannifo.

<sup>34-35</sup> Ascashon Simeón Diospan Yoshin Sharahuunshon ahua María yoisharaquin isca huani, —Min facu nan nocon caifo Israelifo atirifoan nicacasmacanashu omitsiscapanacafo.

Ascan min facu nicacasmaifoanno min fasi shinanshquin. Ascafia nocon caifo atririfoan min facu icoinra huacanashu fasi unimacoinshcani. Ahunshon yora ichapafain aton nomuranshon shinainfo cuscan puashcaniran, —ishon Simeón yoini.

<sup>36</sup>Nannori ainfoan ahun anu Ana, Fanuel facu. Nanton arifi Dioshuunshon inon pacuai cuscan yoipaoni. Nanrifi Aser ahun caifo ini. Siete fari funun fipaoni. Ascafiaflashu amaqui funu naniano man Ana yoshafoshta ini.  
<sup>37</sup>Ascashucai ochenta cuatro fari funuya. Nantianri Dios fu tsainti pushu muranshon Dios cufinquin piqui tunufafainpaoni. Nan muransi ipaoni ahun Ifoan amapaiyai cuscan aashquin.  
<sup>38</sup>Ascano José yafi María Simeón fu tsaincaifoanno nantianari atoqui Ana oni. Oshon facu fuchitoshiquin yoini, —iAichoran! Upa Diosin, natian min facu min nocouqui nichian nocon Numamisi ipashanon, —ishon yoini. Ascashon nan facu oian cuscan Jerusalén anoafó nan manamisifo Anapan yoiqui isca huani, —Mun nocon Numamisi oincoian. Man nocoraran, —ishon ato yoipacuni.

#### Nazaret ano naso furanifo

<sup>39</sup>Ascano José fu María Diosin tsain yononi cuscaín aton mai Nazaret ano nasonifo. Nan Nazaret Galilea muran.  
<sup>40</sup>Nannoashu facu mutsisipacoin yosini. Shafatifi ahuamamishti tapicoinfafaini. Díosin ahun noiquin shara fusti huamafafainni.

#### Facushtafiaflashu Jesús Dios fu tsainti pushu muran iquini

<sup>41</sup>Ascano nan faritifi Jesús apa yafi ahua Jerusalén ano fopaonifo. Díosin nai oinmatinin aton shunifoano furonanfacu iyoafosi ato finonmashoni

shinantacani. <sup>42</sup>Jesús man doce fari aqui caano apa futan ahuan nan imisifo cuscan fuusin focaquin iyónifo.

<sup>43</sup>Ascashu man fuusi anaitacatan María yafi José aton pushu ano naso furanaifoanno. Jerusalén ano nan facu Jesús atomaqi nitufiaitocai apa futan ahuan tapinifoma. <sup>44</sup>Ascano atofu cai shafain icashon. Man shafa fusti fofoacatan ifiacucahua oian yamaiton. Funacufaincaquin ahua futan apa ahun yorafo yafi afu rafuafó yocanifo, —¿Man Jesús oianmamun? —ato huaifoan. —Ma. Noncái oianmafinquin, —huaifoanno. <sup>45</sup>Afanan nasofaincán fonifo Jerusalén ano funai focani.

<sup>46</sup>Ascano focashon rafu non fusti oshatan funacaquin Israelifoan Dios fu tsainti pushu muranshon. Moisés cununi cuscan tapimamisifo ya tsaoshon yoiaifo cuscan nicaquin ato yocariaiton apa futan ahuan fuchinifo. <sup>47</sup>Ascaiton nicacaquin yoinifo, —Nicacapon. ¿Ahuuscashomun na furonanfacu ato cayacafi cumasharaiquin? Fasi tapisharacóan, —ishon nan nicafo cuscan afi ranan yoinannifo. <sup>48</sup>Ascano ahua futan apan fuchicashon yoinifo, —Oinpon. Nocon facu iyoafifo nastui tsaoa. ¿Ahuuscaimun noco facu icuscaiquin? —huanifo.

Ascashon ahuan cunani, —Cocan, ¿Ahuuscaí upa yafi min noco funamanain? ¿Min tapiamamun upa futan un mia funai? Non fasi ratua, —huaiton.

<sup>49</sup>Jesús ahua cumani, —¿Uhuan, ahuuasca huaashquin man ua funaiquin? Man tapiamamun nuno uhuun Upa cufiti pushu muran un iquia ahun tsain nicascharashquin, —huani.

<sup>50</sup>Furumun yoiai cuscacai ahua futan apa tapinifoma.

<sup>51</sup>Ascashu ahua yafi apa fu Nazaret ano nasoni. Ascashon nantifi apa futan

ahuan yonoaifo cuscan yafi yoiaifo cuscan nicacoinni. Ascatan furunmun yoia cuscan ahuan ahuun nomuran shinanfafaini.<sup>52</sup> Ascashu Jesús pushcosharacoinni. Diosin ahuun shinanpan shinanmasharamanaino mapo sharayacoin ini. Ascacun Apa Diosin ahuunoa shinansharaquin yoini isca huaquin, —Uhuun facun Jesús fasi sharacoin. Un ahuun noicoinran, —ishon yoini. Yorafoan arifi Jesushuunoa nannorisi shinannifo.

**Nan ato unu muran iquimamis  
Juan tsoa istapamashon ani  
Mt 3.1-12; Mr 1.1-8; Jn 1.19-28**

**3** <sup>1</sup>Nantianri Tiberio Romanonfoan aton niaifocoin ini. Quince fari niaifoyoni. Nantifiton aton niaifocoin. Ascano rafu non rafuri niaifo patasharinoa nannori afu ipaonifo. Futsan ahuun anu Poncio Pilato nan Judea mai anoafaoan aton niaifo. Galilea mai anoafaoan aton niaifo Herodes ipaoni. Chipocu Felipe Iturea yafi Traconite anoafaoan aton niaifo ipaoni. Abilinia anoafaoan aton niaifo Lisanias ipaoni.<sup>2-3</sup> Nantianri Anás yafi Caifás ahuun caifohuunshon Israelifo Dios cufimisi aton niaifo rafu ipaonifo. Ascaifono Juan tsoa istapamashon icamanoshon Diosin yononi. —Min caifo yoitahuun isca huaquin, “Maton chaca shatucahuun. Man chaca shinain cuscan afanan shinanyamacahuun. Diosin mato yoia cuscan nicacahuun. Man ascaiton Diosin mato chaca rau huashotiro. Ascacun un mato unu muran iquimapacutiro maton chaca shatushon man ismanon.” Anori ato yoitahuun, —ishon Diosin Juan yononi. Ascacun Diosin yoini cuscan Juanpan unu Jordán cusumunshon ato yoiriani.<sup>4</sup> Nannori Juanhuunoa Isaías inon pacoui cuscan yoimisiton cunuquin isca huani,

“Tsoashta icamanoshon Diosin yononi cuscan oi ashcafinin yoiquin isca huanonpacoi, ‘Nocon Ifo nocoqui samamashta ooshqui. Ascacun itisharacahuun.<sup>5</sup> Un tsoa cuscaramaran iyamacahuun. Ascatamarocon uncai ahuama. Uhuun numamisi un yopacoinran,’ icahuun. Ahuara onushon afanan nasocahuun. Cayacafi isharashcaquin. Man ipaoni cuscan afanan ayamacahuun. Nantifi mato chaca potacahuun nocon Ifo fusti tanasharashcaquin.<sup>6</sup> Nan Diosin catoan nocon Numamisi oaiton nantifiton oinshquicaniran,”

ishon Isaías cununi.

7 Ascano yorahuanrasi Juanqui funifo ato unu muran iquimapacunon. Ascashon ato yoiquin isca huani, —Manfin rono paupaton facu cuscaracoinfoquin. Icoinra huayamaifoan Diosin atoqui sinaqui amaquishon ato potano omitsiscapanacafó. Ascan manfin nanscaraoquin. Omitsiscapanacafó muran focasmafiaquicai maton chaca man shatupaima.<sup>8</sup> Ascafia chaca shatucoincashon Diosin mato yoia cuscan nicacoincahuun. Man ipaoni cuscari afanan ayamacahuun. Man ascaiton yorafoan ointirofo afanan chaca huapaitama Dios fusti man tanasharaiton. Maton nomuran shinanquin isca huayamacahuun, “Nonfin Abraham funafo non ahuun caiforiquín iyamacahuun. Diosin Abraham yoiyotiani cuscan nocorifi ashotiro. Ascan Diosin noco onaintimashquimaran,” ishon anori shinanyamacahuun. Diosin onihuapaiquifin na unu cusumunnoa toquirifo Abraham ahuun funafo oni huatiroquin.<sup>9</sup> Fana fimi sharayamaiton ifoan ahuun tapo nantifi ruratinin

shatuquin cuyoshon chii muran potatiro coi futsunon. Nanscarifiai natianri Diosin man itishara chaca shututama man isharayamacaiyaiton mato omitsiscamapacushquiran, —ishon Juanpan ato yoititon.

<sup>10</sup>Nicacaquin cumanifo, —iOhua!

¿Nonmun ahuuascaicain? —huaiton

<sup>11</sup>Ascan Juanpan yoiquin isca huani, —Nan sahuuti rafuyaton futsa ahuuomacoincun inancahuun.

Nanscarifi aquin nan tushuyaton a futsa tushuomacun inancahuun, —icaiton nicacani.

<sup>12</sup>Niaifo pui fishomisifori aqui fucashon yocanifo, —¿Tapimamisiton, nonmun ahuuascaitiroquinunu muran iquimamushquin? —huaifoan.

<sup>13</sup>Ato cumani, —Afanan maton niaifoan yonoamatifi finonmafain pui fiyamacahuun, —huaiton.

<sup>14</sup>Ascaino atirifi ranushumuafoanri yocanifo, —¿Ascan nonmun norifi ahuuascaitiroquin? —huaifoan atori yoiquin isca huani, —Pui fianpaiquin ato asca huayamacahuun.

Pofuyamacahuun. Man tapifiashon yora futsan ayamafiacun, “Nanto acaran,” ishon maton niaifo yoiyamacahuun. Nan mato niaifoan mato inantisiva unimacahuun. Tsain chipuyamacahuun, —ishon ato yoini.

<sup>15</sup>Ascaiton nan Cristo manamisifoan Juan nicacani ato nomuranshon shinannifo, —Nanracafin Cristoquin.

Nan Diosin catonni, —ishon shinannifo.

<sup>16</sup>Ascaifoan Juanpan ato cumani, —Uncai Cristoma. Unfin mato unu muran iquimapacuaquin. Ascan nantofin ahun Yoshin Shara matoya rafumapacui oquin. Ahun shinansharapan maton nomuran shinamanon. Ascashu matofu rafuano nantifi ahuara chacafo ahunshon shatuashu a cuscara shara ishcaquin.

Naanfin Diosin catoanquin. Nantofin ua fasi finoncoian. Ahuamamishti huatiro. Ahuashta chaca huayomisima. Uncai ascarama. Un ahuara shara huahuu rafanancai un ahun oinmatima. Uhuun ramapaiyamainorica un ahun oinmati icuanama. <sup>17</sup>Ascan natian man itishara a icoinra huafayo a nicacasmamisifo ato paschcanan huashquin. Ascashon nan icari nan icoinra huafosi ihuicoishquin afu isharapacunonfo. Asca nan nicacasmamisifo chii urumanhuan muran ato potai anoashu omitsiscain unupacunacafomaran, —ishon Juanpan ato yoini.

<sup>18</sup>Ascashon tsain futsafori ato yoiriani aton nomuran nanumapaiquin chaca shatunonfo. —Nocon Ifo Cristo nocouqui oi noco numashqui, —ishon ato yoini.

<sup>19-20</sup>Ascashon Juanpan nan niaifo Herodes yoiqui isca huani, —Ushto ahuin fianfain ahuara chacafori min huaran, —ishon yoini. Asca huaiton nicaquin Herodes Juan cunu muran iquimani. Ahuara chacafo huafiamisishaquin Juan iquimaquiafin fasi chaca huaquin finacoinniquin.

### Juanpan Jesús unu muran iquimani Mt 3.13-17; Mr 1.9-11

<sup>21-22</sup>Juan cunu muran iquiataima yorafo unu muran iquimapacumi nantianri Juanpan Jesusrifi unu muran iquimani. Asca huatan cainmainifoannaino Jesús Apa Dios cufini. Ascaino nai murannoashu ruhui cuscara Diospan Yoshin Shara nai ariashu aqui fotopacucahuani. Fotoaino nai murannoai o niican yoiquin isca huaiton, —Min uhuun Facucun fasi un mihiu noicoin. Un miqui unimacoinran, —ishon Apa Diosin yoini.

### Jesucristo ahuun shunifo Mt 1.1-17

<sup>23</sup>Jesús treinta fariatian tau huaquin yorafo yosini. Ascano yorafoan

shinancaquin Jesús José ahuun facuran,  
huafiainfonocai ahuun facucoin inima.

José ahuun apa Elí ini.

<sup>24</sup> Elí ahuun apa Matat.

Matat ahuun apa Leví.

Leví ahuun apa Melqui.

Melqui ahuun apa Jana.

Jana apa José.

<sup>25</sup> José ahuun apa Matat.

Matat ahuun apa Amós.

Amós ahuun apa Nahúm.

Nahúm ahuun apa Esli.

Esli ahuun apa Nagai.

<sup>26</sup> Nagai ahuun apa Maat.

Maat ahuun apa Matatías.

Matatías ahuun apa Semei.

Semei ahuun apa Josec.

Josec ahuun apa Judá.

<sup>27</sup> Judá ahuun apa Joanán.

Joanán ahuun apa Resa.

Resa ahuun apa Zorobabel.

Zorobabel ahuun apa Salatiel.

Salatiel ahuun apa Neri.

<sup>28</sup> Neri ahuun apa Melqui.

Melqui ahuun apa Adi.

Adi ahuun apa Cosam.

Cosam ahuun apa Elmadam.

Elmadam ahuun apa Er.

<sup>29</sup> Er ahuun apa Josué.

Josué ahuun apa Eliezer.

Eliezer ahuun apa Jorim.

Jorim ahuun apa Matat.

<sup>30</sup> Matat ahuun apa Leví.

Leví ahuun apa Simeón.

Simeón ahuun apa Judá.

Judá ahuun apa José.

José ahuun apa Jonam.

Jonam ahuun apa Eliaquim.

<sup>31</sup> Eliaquim ahuun apa Melea.

Melea ahuun apa Mena.

Mena ahuun apa Matata.

Matata ahuun apa Natán.

<sup>32</sup> Natán ahuun apa David.

David ahuun apa Isaí.

Isaí ahuun apa Obed.

Obed ahuun apa Booz.

Booz ahuun apa Sala.

Sala ahuun apa Naasón.

<sup>33</sup> Naasón ahuun apa Aminadab.

Aminadab ahuun apa Admin.

Admin ahuun apa Arni.

Arni ahuun apa Esrom.

Esrom ahuun apa Fares.

Fares ahuun apa Judá.

<sup>34</sup> Judá ahuun apa Jacob.

Jacob ahuun apa Isaac.

Isaac ahuun apa Abraham.

Abraham ahuun apa Taré.

Taré ahuun apa Nacor.

<sup>35</sup> Nacor ahuun apa Serug.

Serug ahuun apa Ragau.

Ragau ahuun apa Peleg.

Peleg ahuun apa Heber.

Heber ahuun apa Sala.

<sup>36</sup> Sala ahuun apa Cainán.

Cainán ahuun apa Arfaxad.

Arfaxad ahuun apa Sem.

Sem ahuun apa Noé.

Noé ahuun apa Lamec.

<sup>37</sup> Lamec ahuun apa Matusalén.

Matusalén ahuun apa Enoc.

Enoc ahuun apa Jared.

Jared ahuun apa Mahalaleel.

Mahalaleel ahuun apa Cainán.

<sup>38</sup> Cainán ahuun apa Enós.

Enós ahuun apa Set.

Set ahuun apa Adan.

Nan Adán ahuun apa Dios. Nan

Adán Diosin onihuani.

### Yoshin chacanun Jesús chaca huamapaini

*Mt 4.1-11; Mr 1.12-13*

**4** <sup>1</sup>Ascano Jesús unu Jordán anoashu nasoni. Ascashon Diosin Yoshin Sharapan iquinaino tsoanshta icamano cani. <sup>2</sup>Nannoashu cuarenta oshatan nannoshon Satanás nan yoshin chacapan chaca huamapaipaoni. Ascano nantianri ahuashta pia inima. Ascashu fasi fonicoinni.

<sup>3</sup>Ascaiton Satanás yoini, —Min Diospan Facumainquin na toquirifo misi onihuahuu, —huaiton.

<sup>4</sup>Jesús cumaquin, —Uhuun Upa Diosin tsainhuunoa cununi isca huaquin, “Noncai misi fustihuunoashu ipatiroma. Diosin noco yoiai cuscan nan fusti non fasi yopacoinran,” —ishon yoiaiton.

<sup>5</sup>Satanás Jesús nai sumunmun iyoshon arishon manifoti ismariscatani.

<sup>6-7</sup>—Oinpon. Ua ifoafain mian yonoshonaitofin nan min oiainfo un mia inantiroquin. Ascashu nantifi manifoti sharashtacoinfoan aton niaifo min itiro. Nantifi na maifotifi uhuuna. Ascacufin un tsoara inanpaiquin un inantiroquin ahuuna inon, —ishon yoiaiton.

<sup>8</sup>Jesús cumani, —Ascafia Diosin tsainhuunoa cununi isca huaquin, “Maton Ifo Dios fustifin man ratoconun mai chachishotiroquin. Nan fustimain noco ifocun. Ascashon non yoitirori ‘Min uhuun Ifocun. Un mia fasi noicoinran,’ ishon non yoitiroran,” —huaiton.

<sup>9</sup>Jerusalén ano Jesús iyoní.

Nannoshon Dios fu tsainti pushu pumancaya cuyacoin iyoshon yoiquin isca huani, —Minmain Diospan facuquin nuriashu pacucaintahuun. Diosin tsain mihuunoa cunushoni cuscan aquin.

<sup>10</sup>“Nantofin ahuun oinmatifo afu nai muran icafo yonoaino mia cushuiquin min ahuuscanonma.

<sup>11</sup>Min pacuaiton mia achicani. Min toquirifoqui pacui rutunonma. Ahuuscatama,”

nannorifi Diospan tsain cununiquin, —ishon Satanás yoiaiton.

<sup>12</sup>Afanan Jesús cumani, —Ascafia Diospan tsain cununiri isca huaquin, “Ahuarda musunicoinquin shinanyamahuu uatsi Diosin

cushuiquin,” cununiran, —ishon Jesús yoini.

<sup>13</sup>Jesús chaca huamapairiashu caaquin Satanás shinanni, —Un chipo afanan Jesús chaca huamayoshquiran, —ishon shinanni.

**Jesús Galilea anoshon ato  
tapimaquin tau huani**  
*Mt 4.12-17; Mr 1.14-15*

<sup>14</sup>Ascatacán Jesús Galilea ano nasoni. Diosin Yoshin Sharapan a iquinaino ahuunoa nicanifo. Galilea ano icafoan nicaifoanno a chaíma icafoanri nicanifo.

<sup>15</sup>Israelifoan aton ichananti pushu muranshon ato yosifoanfainaiton oincani fasi aqui unimacoinnifo. Ascashon, —Na nocofunun sharacoinran, —ishon yoinifo.

**Jesús afanan Nazaret ano cani**  
*Mt 13.53-58; Mr 6.1-6*

<sup>16</sup>Ascacaini cai nan pushconi Nazaretano cani. Nannoashu Israelifoan aton tunutitian nan imisi cuscan ato ichananti pushu muran iquishon ninacahuan Diosin tsain Jesús ato yoini.

<sup>17</sup>Nan Isaías Diosin tsain yoimisiton cununi cuscan Jesús inainfoan fupoacufoan nan yoipaiyaino fuchitan ato yoiqui isca huani.

<sup>18</sup>“Diospan Yoshin Shara ufu ishon ua catoan. Ascashon ua nichian un ahuuomafo tsain shara yoifain nan cunu muran iqui cafiscafo un ato caimanon. Ascashon fushofori un caya huai oinsharanonfo.

Omitscaifori un numai afanan omitscatacama isharanonfo. <sup>19</sup>A mia nicasharaifo ato yoihiu isca huaquin, Natian Upa Diosin unimayanan mato shara huafain mato numashquiran,”

ua huaran ishon Isaías cununi cuscan Jesús ato yoini.

<sup>20</sup>Ascashon ato Diosin tsain yoiqui anaititan ahuun libro fupoacufoan nocofunu futsa inantant tsaopacucahuani. Ascaiton nantifiton oinquín futsanifo.

<sup>21</sup>Ascaiton ato yoiqui isca huani, —Na rama un mato yoiai cuscan uhuunoa Isaías cununi cuscacoin natian man aaran —ishon Jesús ato yoini.

<sup>22</sup>Ascaiton nicacani mustairicatan yoinifo, —Ahuun tsain fasi sharacoin. ¿Nocofunu sharacoinfashion ahuuscashon iscara tsain shara noco yoimun ahuamafashion? Naanmun José ahuun facu, —ishon yoini.

<sup>23</sup>Ascaifoan Jesús ato yoini, —Noco shunifoan yoini cuscan marifi raca man ua yoiqui isca huapai, “Min caya huamitsamisimainqui min futsafo caya huua cuscan mifiri caya huamuuhu,” ishon raca man ua yoipai. Ascashon man raca ua yoipai isca huaquin, “Man non nica min Capernaum anoshon tsoan atiroma cuscan min ato huashoan. Ascan nuno min pushconi anoshori noco nanscarifi huashohuun,” ishon raca man ua yoipaiqui. <sup>24</sup>Ascacun un mato icon yoi. Diosin tsain yoimisiton cainni anoshon tsoancai nicapaima. <sup>25</sup>Un mato cayacafi yoi. Nocon shuni Elías niyopaonitiam nocon mai Israeli ano ainfon funu amaqui naa funuomafo ichapa ini. Nantianri fari rafu non fusti nushmancayan oi funima. Ascano tushu yamacoin ipaoni. <sup>26</sup>Ascafia Upa Diosicai noco shuni Elías nocon caifo funuomafo ano nichinima. Ascatamarocon Sarepta mai anoa funuomaqui nichini pimanon. Nan pushurasi Sidón chaimasha. <sup>27</sup>Nan Israel anori yora ichapa isinincani cooyo cuscara tocoi futsuafiafocai nocon shuni Diosin tsain yoimisi Eliseocai nocon caifo caya huatama. Nan Siria mai anoa fusticoin caya huani. Nancaí Israeli inimaran, —ishon Jesús ato

yoini. <sup>28</sup>Ascano ato caifo caya huatama caifo futsa fusti caya huani nicacani fasi Jesusqui sinacoincaquin. <sup>29</sup>Achicashon Nazaret pasoato iyonifo. Nanno mahua cuyacoin anoshon potapaicaquin.

<sup>30</sup>Ascafia potapaifaquicai tsoan anima. Jesuerocon ato rahuin yocofaini atomaquinoashu cafiaitocai tsoan puusanima.

**Nannori nocofunu yoshin  
chaca ahuun nua icai ini**

*Mr 1.21-28*

<sup>31</sup>Ascashu Jesús Capernaum mai ano cani. Nan Capernaum Galilea muran ini. Nannoshon Israelifo tunutitian ato yoini. <sup>32</sup>Ascaiton nicacani, —Nicacapon. Ahuun tsain sharacoin. ¿Ahuuscashucon iscara tsain noco yoimun? Ahuun tsain niaifoan tsain cascararan, —ishon yoinifo.

<sup>33</sup>Ascaino Judiofoan ichananti pushu muranshon nocofunu yoshin chacanun ahuun nuushon fiisimani. <sup>34</sup>Asca huatan nan yoshin chacanun Jesús yoini, —Minfin Jesús Nazaret anoquin. ¿Min noco fucash huai oamun? Noncaí mi futan ahua huatiroma.

¿Omitsiscapanacafu muranri min noco potai oamun? Unfin mia onanquin. ¡Ohua! Noncaí mia ahuusca huatiroma. Miamain Diosin catoancun, —ishon yoshin chacanun yoini.

<sup>35</sup>Ascaiton, —Tsainyamahuu. Nocofunumaquinoashu catahuun, —ishon yoshin chaca Jesús curushcain nichini. Asca huaiton nan yoshin chacapan nocofunu mipuafain potafaini amaquinoashu yoshin chaca cafiaquicai ahuusca huanima. <sup>36</sup>Ascaiton oincani mustairicatan afi ranan yoinancaquin yoinifo, —Jesús fasi ahuamamishti huatiro. Iscaracai ahuashta non oinyomisima. ¿Ahuuscashomun ahuun tsainmansi curushcain yoshin chacafu

atomaquinoa potaquin? —icashu yoinannifo. <sup>37</sup>Ascatan nan Jesús aca cuscahuunoa yorafo yofoanfafainifo.

**Simón Pedronun ahuun raisi  
yoshafo Jesús caya huani**

*Mt 8.14-15; Mr 1.29-31*

<sup>38</sup>Ascacaini Israelifoan ichananti pushu murannoashu cai Pedro pushu muran noconi. Nanno Pedro ahuun raisi yoshafo fasi yonai omitsiscacoinnaiton Jesús yoishonifo, —Na isinincái cayahuapun, —huaifoanno. <sup>39</sup>Amanao ota catipacucahuán yoini, —Ahuan yona matsiriscahuún, —huaino samamashtacoin a yonai matsiriscatani. Ascano funinacahuan nan isinincama ointsa sharacain ato pimashquin pichacufaini.

**Isinincáifo ichapa Jesús  
ato caya huamapacuni**

*Mt 8.16-17; Mr 1.32-34*

<sup>40</sup>Ascano man fari Caino isinincái futsa futsatapafo yorafoan aqui ihuumifo ato cayahuamapacunon. Ascacun ahuun mucuman ato ramanpacuaino cayai futsunifo. <sup>41</sup>Atirifi yoshin chacafo atohuun nuufafaina Jesús atomaquinoa potaino fiisifainfainquin yoinifo, —Minfin Diospan Facuquin, —ishon yoshin chacafoan Jesús yoinifo. Ascaiton Jesús curushcain ato asca huani, —Tsainyamacahuun. Uarifi anuyamacahuun, —ato huaino manmain tapiafoanfin a Diosin catonnicun.

**Ichananti pushu muranshon  
Jesús ato yoini**

*Mr 1.35-39*

<sup>42</sup>Ascashu shafacuaino Jesús Apa Dios cuficai tsoan istaipama ano cani. Ascacun yorafoan funaquin fuchicashon yoinifo, —Nocomaquinoashu afan

cayamapun. Nuno no fu ipun, —huaifoan. <sup>43</sup>Jesús ato cumani, —Un nan pushurasi futsafo muranri uhuun Upa Diosin tsain shara un ato yofoanfafainon ua nichini. Ahuu cuscaramain uhuun Upa Diosin niaifoan ahuun yorafo iquinai cuscaraqui. Un nanscanon ua nichini un ato tapimanon, —huani. <sup>44</sup>Ascashon Judea maitio Israelifoan ichananti pushu muranshon ato Diosin tsain yoiriani.

**Jesushuunshon tsoan atiroma  
cuscan shiman finifo**

*Mt 4.18-22; Mr 1.16-20*

**5** <sup>1</sup>Shafa futsaino Jesús ianmanhuan Genesaret cusumun ini. Ascaino yorahuanrasi aquí funifo. Diospan tsain nicaí fucani. <sup>2</sup>Nan chaimanoa shasho rafu rutica Jesús fuchini. Ifofoan ato nushuti choaifono. <sup>3</sup>Ascatan nan futsa muran Jesús nanuinacahuani. Nan shasho Simonna ini. Ascashon nan yoini, —Ua onanshta shasho putsiquishohuun. Un anoshon ato yosinon, —ishon yoini. Ascatan shasho cusha camaqui tsaoínacahuán ato yosini. <sup>4</sup>Ato yoiquin anaititan Jesús Simón yoini, —Simón, noa ano focashon mato nushuti potacahuun shimanfo fiishcaquin, —huani.

<sup>5</sup>Ascaiton Simón cumani, —Tapimamisiton, non nushushifiaquicai shiman fustishta non fiishiama. Non fasi yonoshina. Ascafia min noco yoiai cuscan natian non huaicai, —ishon Simón yoini.

<sup>6</sup>Ascashon ato nushutinhuan pochinifo. Pochishon muafó shimanfoan nushutinhuan fospicoínshon fashnuqui rashquini. <sup>7</sup>Ascaiton a shasho futsa murannoafó atirifo cunaquin ato mushananni ato futan inamashcaquin. Ascaino furiscatan ato muran nanuinifoan rananfaitan shasho muran

nanunifo. Ascashon shimanrasi shashohuan rafu fospicoinni. Unu cufirisicoinni shashohuan rafu shimanfoya iqui cuani.

<sup>8-10</sup>Nan Simón Pedro futan nushumisi rafu Santiago yafi Juan Zebedeo facu rafu inifo. Nan rafu non fustifain nushumisicoinfo. Ascaiton ato futan nushumisi futsafoanri shasho rafu fospicoian oincani mustairicatan yoinifo. —¡Oincapon! ¿Ahuuscashomun shiman ichaparasi fiafoquin? —icashu atoqui yoinannifo. Ascaiton oin Pedronun shasho naquishon Jesús ratoconun mai chachishon yoini, —¡Ohua! Ifon ufin nocofunu chacaquin. Asca minfin sharacoinquin. Chaca yafi sharacai ositiroma. Ascacun umaquinoashu catapun, —Pedronun huaiton. Jesús cumaquein, —Ratuyamahuu. Min shafatifi nushumisifiashon natian min uhuun Yoshin Sharahuunshon uqui yorafo ihuushqui ua icoinra huanonfo, —ishon Jesús Pedro yoini.

<sup>11</sup>Nicacatan aton shasho rafu cusumun corafainnifo. Ascashon nantifi aton ahuarafoya ato yorafori potafaini Jesús fu fonifo.

**Nocofunu yoratisho rashquishi  
futsua Jesús caya huani**  
*Mt 8.1-4; Mr 1.40-45*

<sup>12</sup>Shafa futsaino Jesús pushurasi ano ini. Nannoshon nocofunu ahun yoratishon ranimamishti rashquishi futsuaton cahuanquin Jesús fuchitan fuopacuahuan yoini, —Ifon, ua caya huapaiquifin mian caya huatiroquin, —huaiton.

<sup>13</sup>Jesús aqui mupishon yoini, —Icon un mia caya huapai. Asca natianfin min cayaicain, —huaino. A rashquishi futsua cayariscatani. <sup>14</sup>Cayacun Jesús yoini isca huaquin, —Un mia cayahua cuscan

tsoa yoiyamahuu. Noco caifo ahuunshon Dios cufimisi ismatahuun. Ascashon Moisés noco yononi cuscan chashoanun facu a inantahuun mia rutushonon. Min chaca soafain min caya cuscan ato ismashquin. Ascano tapitirofo Moisés noco yononi cuscan min aiton, —ishon Jesús yoini.

<sup>15</sup>Asca huafaino ahuunoa nantifi yoifoanfaini. Ascaiton nicacanashu Jesusqui funifo ato caya huemapacunon. <sup>16</sup>Ascacaini cashon tsoan icamanoshon Apa Dios cufin capaoni.

**Nocofunu afi cayamacai ahuari afi  
huatiroma Jesús caya huani**  
*Mt 9.1-8; Mr 2.1-12*

<sup>17</sup>Shafa futsaino Jesús ato yosini Fariseofo yafi Moisés yononi cuscan tapimamisifori nanno tsaoacunifo. Ascaino pushurasiti Galilea anoaflo yafi Judea mai anoaflo non Jerusalén anoashuri aqui funifo. Diosin curushhuunshon Jesús isininciaifo nannoshon ato caya huapacuni.

<sup>18-19</sup>Ascaino nocofunu afi raqui cayamacai afiri ahua huatiroma ahun yorafoan Jesús shinanmaqui shuhua naratashon iquimapaiftafo yorahuanrasi fospicoian ini. Ascano foman caya ina cashon tapa tsucashon Jesús nia naman yora huanrasi nastui shuhua ya ratapacufoannifo. <sup>20</sup>Ascaiton Jesús oian ahun yorafoan fasi icoinra huaifoan oinquin Jesús a isinincai yoiquin isca huani, —Uhuun yorashtan, natian mun mia chaca soashona, —huaiton.

<sup>21</sup>Nicacani Fariseofo yafi Moisés yononi cuscan tapimamisifoan yoinifo, —¡Ajaa! ¿Na nocofunumun tsoaqin? Fasi Dios chaca huai. Natocai chaca soatiroma. Diosin fustitofin chaca soatiroquin. Ascan naton noco parapai. “Un Diosiran” noco huamapai, —ishon aton nomuranshon shinanchacanifo.

<sup>22</sup>Ascaifoan onanshon Jesús ato yoiquin isca huani, —¿Ahuuscaquimun mato nomuranshon man amaquiri shinanchacaiquin? <sup>23-24</sup>Unfin Cristoquin yorafoan aton chaca un soashotiro. ¿Ascan ahuuscacaimun un huaicai? Un chaca soashoyamaraquimun un caya huaiquin. Ascacun un mato ismai Upa Diosin ua catoan. Ahunshofin un chaca soafain yorafo un caya huacointiroquin, —ishon ato yoini. Ascatac a nocofunu afi raqui cayamacai afiri ahua huatiroma yoini, —Min pushu ano min shuhua ya funicaitahuun, —ishon Jesús yoiaino.

<sup>25</sup>Funinaca huantan ahuun shuhua papifaiquin yoifoni, —iAicho! Min ua caya huaa sharaquin. Fasi Dios sharacoin, —huani. <sup>26</sup>Ascaiton oincani nantifi mustairicatan yoiquin isca huanifo, —Dios tsoa cuscarama. Fasi sharacoin. Non oinyomisima cuscara non oianran, —ishon yoinifo.

**Jesús Leví cunani**  
*Mt 9.9-13; Mr 2.13-17*

<sup>27</sup>Nanscacaini caaquin Jesús oian Roma anoa niaifo pui fishomisi tsaoa ini. Nan nocofunun ahuun anu Leví. Ascaiton Jesús yoini, —U fu cahuun, —huaino. <sup>28</sup>Funina cahuatan nantifi potafaini afu cani. <sup>29</sup>Ascashu afu cai ahuun pushu ano nocoquin Leví Jesús yoini, —Nuno uhuun pushu muran iqui ohuu. Uhuun yorafo yoimanashu un ato futan mia fuusishonon, —huani. Ascaino yorahuanrasi aquí funifo. Roma anoa niaifo pui fishomisifo yafi futsaforifi aquí funifo ato futan pishcaquin. <sup>30</sup>Ascaifoan Fariseofo futan Moisés yononi cuscan tapimamisifoan Jesús fu rafumisifo yoini, —¿Ahuuscain man pui fiimisifo yafi yora chacafo futan man piiyain? —ato huanifo. <sup>31</sup>Ascaifoan nicaquin Jesús ato cumani,

—A isinincaifomacai caya huamitsamisi yopacanima. Asca nan isinincaifofin fasi caya huamamitsamisi yopacaniquin. <sup>32</sup>Nanscarifi aquin, “Uncai ahua chaca huamisimaran,” icaifocai un ato chaca soashotiroma. Asca tsoan yoiqui isca huai, “Unfin fasi chaca huamisiquin. Un Numamisi yopacoinran,” icaifofin un ato chaca soashotiroquin, —ishon Jesús ato huani.

**Piqui tunuaihuunoa**  
*Mt 9.14-17; Mr 2.18-22*

<sup>33</sup>Ascaiton futsan Jesús yocani, —¿Ahuuscai mifu rafuafoan piqui tunumisimamun? Juan fu rafumisifoan piqui tunufain Dios cufimisifo. Nanscarifi Fariseofo yafi afu fomisifoan huamisifo. Ascan manfin pifain ayafain huamisiquin, —huaifoan.

<sup>34</sup>Ato cumani, —Nocofunu fu ainfo fianainnoricai unimai fusicaquin tsoan piqui tunutiroma. Nanno funu anocai ato chani huaifoan piqui tunutirofoma unimamain acaquin. <sup>35</sup>Ascafaino funu amaqui rutuafono shinancaquin piqui tunutiroforan, —ishon Jesús ato yoini.

<sup>36</sup>Ascashon afanan Jesús ato yoiquin isca huani, —Tsoancai sahuuti shuni fashnucun poto funapan icushtiroma. Asca huashon poto funapan icushuano ustui futsuashu chacanai finatiro. Aquirifi sahuuti shuni anaitiriscatiro. Afanancai funa cuscara itiroma. Nanscarifiai un mato yosiai cuscan nicacoinshocai man apaoni cuscan afanan man huatiroma. Tsoan ua tanacoinshon ipaoni cuscan cachiquiri huacointiro. Ascashu funa cuscara shara iiishquin. <sup>37</sup>Ascashon tsoancai fichi tutso shuni muran vino funa nanutiroma. Fichi tutso toshacainaino vino funa cuyofoi chacanai futsutiro. Nanscarifiai maton shunifoan mato yosimisi cuscan yafi un mato yoiai cuscacai nan rafu

ositiroma. Un mato yosiain cuscacoin nannori Diospan tsain shara. Ascafia mato shunifoan mato yosimisifo cuscacai anorama. Nan tanashucu man isharatiroma. Nan rafu osishon nicapaiquicai man shinansharatiroma. <sup>38</sup>Ascacun vino funa fichi tutso funa muranri nanua sharacoin itiro. Nanscarifiai ratoranfoan ipaonifo cuscan unucatan un ato yosiain nan fusti tanashu isharacointirofo. <sup>39</sup>Tsoan puti pau ayatiashocai afanan fata ayapaitiroma. Nanscarifi aquin yorafoan yoiqui isca huatirofo, “Un ipaoni cuscan un afanan apai. Uhuun shunifoan ua yosia cuscan shara. Nan fusti un tanapai. Ascacun tsain futsan un yopaimaran,” —ishon shinantirofo.

#### **Jesús fu rafumisifoan trigo mutusnifo**

*Mt 12.1-8; Mr 2.23-28*

**6** <sup>1</sup>Ascatan Israelifoan tunutitian Jesús yafi afu rafuafu mau mapai focaquin trigo mutuscashon rashoquiri ashon piyaoan. <sup>2</sup>Oinquín Fariseofoan ato yoinifo —¿Ahuuscai Moisés noco yononi cuscan tunutitian trigo man mutusimun? —ato huaifoan.

<sup>3</sup>Nicaquin Jesús ato cumaquin isca huani, —¿Davidhuunoa cununi cuscan man man oinmisimun? ¿Fonainquin nocon shuni David ahuuun yorafo futan ani cuscan man man nicamisimun? <sup>4</sup>Dios fu tsainti pushu iquicaishon a muranno misifo ato piquini fasi fonicoinquin. Ano tushu futsa yamaino. A misifofin nan Diosin tsain yoimisifo naasi iniquin. Tsoa futsacai a misi pitiro inima. Nannori yoifianifo fasi fonicoinquin David pini. Ascashon afu rafuafori pimani. <sup>5</sup>Ascan uafin uhuun Upa Diosin catonniquin. Ascacun urusu fusti un yoitiro ahuamain tunutitian man huatiroquin, —ishon Jesús ato yoini.

#### **Nocofunun mucu musufimua**

*Mt 12.9-14; Mr 3.1-6*

<sup>6</sup>Ascatan tunuti futsaino Jesús Israelifoan aton ichananti pushu muran iquini. Nanno iquishon ato yosiaino nantianri nocofunun ahuun mucu mumiori musufimuatón arifi nicani.

<sup>7</sup>Ascaino Fariseofo futan Moisés cunu tapimamisifoanri nannoshon oincaquin shinannifo, —Non tapinon Jesusmain tunutitian nocofunu caya huai iyamarai Moisés noco yononi cuscacoinmain aiquin, —ishon Jesushuunoa shinannifo. Ato niaifofoqui chanipaicaquin.

<sup>8</sup>Ascashon a shinainfo cuscan onanshon Jesús a nocofunun musufimua yoini, —Funinaca huahuun. Mia oinonfo, —ishon yoiaino nan yoiái cuscacoin ani.

<sup>9</sup>Ascaiton Jesús ato yoini, —Un mato yocain. ¿Moisés yononi cuscan tunutitian non shara huatiro iyamarai non chaca huatiromun? ¿Ascayamarai non futsafo nimatiro iyamarai non namatiromun? —ishon ato yoini.

<sup>10</sup>Ascashon ato oiancutan a nocofunu musufimua yoini, —Mushahuun, —huaino. Nan yoia cuscan huatanaiton oianfo ahuun mucu muma sharacoin ini.

<sup>11</sup>Ascaiton oiancani Fariseofo yafi Moisés cunu tapimamisifo fasi aqui sinacoincaquin yoinifo —¿Nonmun ahuuscashon Jesús shatumatiroquin afanan isca huanonma? —icashu ahuun yoinannifo.

#### **Jesús doce nocofunufo catonni**

**afu rafunonfo**

*Mt 10.1-4; Mr 3.13-19*

<sup>12</sup>Shafa futsaino Jesús machi ano mapuni Apa Dios cufishquin. Ascano nannoshon yamatishon apa cufishini.

<sup>13</sup>Ascashu iyoconaino a tanamisifo yoini, —Uqui fucahuun, —ato huaino aqui fuafao doce ato catonni afu

rafunonfo. <sup>14</sup>Nan docefain ato anufo. Futsa Simonfiacun Jesús ahuun anu tuquihuashoqui, Pedroran, huani. Nanton chipocu Andrés. Futsafoan ato anu Santiago non Juan non Felipe non Bartolomé non <sup>15</sup>Mateo non Tomás non Santiago Alfeopan facu Simón futsari nanton ahuun caifo futsafo futan Romanonfo potapai afanan Israelifo yonononfoma. <sup>16</sup>Futsan ahuun anuri Judas, Santiago ahuun facu. Futsarifi Judas Iscariote nanton Jesús potashon ato achimani. Nanfosi Jesús ato catonni.

**Jesús yora ichapaforasi tapimani**  
Mt 4.23-25

<sup>17</sup>Machi tununman fotoaino aqui yorahuanrasí funifo. Ascaino a tanamisifo yafi Judea anoafó atirifi fuaino Jerusalén anoafori fuaino ianmanhuan cusumunnoa Sidón yafi Tiro pushurasi anoafori funifo. <sup>18</sup>Ahuun tsain nicashcaquin fuaoan atirifi a isinincaifo ato cayahuafain a yoshin chacapan ato fucash huafori Jesús atomaquinoa potapacuni. <sup>19</sup>Ascashon nan isinincaifo futan nan yoshin chaca atohuun nuafoan shinannifo, —Non ahuunoashu cayanonmun Jesús noco ramanmapainon, —ishon shinannifo. Nanfoan tapinifo Diosin ahuun curushhuunshon Jesús ato caya huapacua.

**Tsoa unimatirofo yafi unimatirofoma**  
Jesús ato yosini  
Mt 5.1-12

<sup>20</sup>Ascatan Jesús afu rafumisifo oinquín ato yoini isca huaquin, —Man ahuuomafashu chipo Dios niaifo icari matonari iishquin. Ascacun ahuuomafashu unimacahuun.

<sup>21</sup>Man natian Dios fu rafupaicain ahuun tsainri man tapipaiquin

finai a cuscara shara iishcaquin.

Man ascafia Diosin chipo mato imasharai a cuscaracoin man inon.

Natianri man uaifiashu chipo man shuchitiro.

Ascacun unimacahuun.

<sup>22-23</sup>Futsafoan uhuunshon mato noicasmaquin mato potafain mato roafain matohuunoa tsain chaca yoicani.

Nanscarifi nan Diosin tsain yoimisifo mato shunifo omitsisca huapaonifo.

Ascan matori omitsisca huafiaifoanno chipo man Upa Diosqui nocooaitian fasi sharacoin mato inanshquin man afu ipanon.

Ascacun unimacoincahuun, —huani.

<sup>24</sup>Ascacun futsafo Jesús yoiqui isca huani,

—¡Ohua! Manfin natian mafo ichapayashu unimaicain. Ascafia naashu man chipo omitsiscapanaca. Mancái afaner unimanacama.

<sup>25</sup>¡Ohua! Natian man shinanquin isca huua, “Un ahuara yopaima. Un ica cuscan shara. Uncái ahuá futsa shinanpaimaran,” ishon man shinan.

Ascafia ohua. Man chipo mato nomuran shinansharapaifiashu man omitsiscapanaca.

Man fasi numamisi yopapacunaca.

Natian man shuchisharai. Dios shinantama. Ascafia chipo uaiqui man omitsiscapanaca.

<sup>26</sup>Nantifi yorafoan mato yoiqui isca huacani, “Na nocofunu fasi ishara. Ahuacai yopaimaran,” ishon matohuunoa yoiado. Ascafia ¡Ohua!

Nanscarifi aquin Diosin tsain yoifiaquin afi shinainfo cuscan yoimisifo. Nanfo mato shunifoan nannori atohuunoa yoipaonifo. Ascan manfin atofu omitsiscapanacaquin, —ishon Jesús ato yoini.

**Mato noicasmafiaifoan  
atohuun noicahuun  
Mt 5.38-48; 7.12**

<sup>27</sup>—Ascan nan man ua nicaifo un mato yoi. Mato noicasmaifo atohuun noicoincahuun. Tsoan mato noicasmai ato shara huacahuun. <sup>28</sup>Tsoan mato chaca huai copitama rau huafain ato yoisharacahuun. Tsoan mato roafiacun ato Dios cufishocahuun. <sup>29</sup>Tsoan mato tapasiai ato copitamarocon nanno nishohuun mato ocuma futsari afiaiton tunucahuun. Futsan mato niaifo ano iyocun mato sahuuti mato fiainton mato sahuuti custopari inancahuun. <sup>30</sup>Tsoanran mato ahuara yocaiton ayashon ato inancahuun. Futsan mato ahuara fiano shinanchacayamacahuun matori nasoyamafiaino. <sup>31</sup>Man futsafo shara huamapaiyai cuscan marifi futsaforifi shara huashocahuun.

<sup>32</sup>A matohuun noiaifosi copiquirifi man atohuun noiainocai acai ahuama. Yora chacafori nanscarifiaifoanno. Man ascainocai Diosin mato yoima, “Man shara huaran,” ishon. <sup>33</sup>A mato shara huafosi copiquirifi man ato shara huaino acai ahuama. Yora chacafori nanscarifiaifoanno. Man ascainocai Diosin mato yoima, “Man shara huaran,” ishon. <sup>34</sup>Ascashon man yora ahuara inanyopaiquin shinanqui isca huai. “Un inanyocun ua nasotiyo. Ascan nanscara yorafo fusti un inanyotiroran,” ishon man shinain. Aacai ahuama. Yora chacafoanri nannorifi shinantirofo cuscan. Marifi man anori shinainnocai Diosin mato yoima, “Man shara huaran,” ishon.

<sup>35</sup>Ascacun un mato yoi. Mato noicasmaifo atohuun noicaquin ato shara huacahuun. “Ato ahuara inanyoshon ua nasoimaran,” ishon shinanchacayamacahuun. Mato nasoyamafia, “Nanscanonran,” ishon yoicahuun. Man ascacoinnashu Upa Dios ari man nocaiton matoqui unimaqui ahuara fasi sharacoin mato inanshquin. Diosi nai muran isharacoinsia. Diosin nantifi yorafo shara huua. Tsoan “iAicho! Upa Diosin,” huayamafiaifoan nanfohuunri fasi noi. Yora chacafohuuri noi. Marifi nanscarifi aquin man futsafo ismatiro man Diospan facufo. <sup>36</sup>Maton Upa Diosin nantihuun ramapaia cuscan marifi nanscarifi acahuun.

**Futsafohuunoa shinanchacayamacahuun  
Mt 7.1-5**

<sup>37</sup>Futsafohuunoa shinanchacaqui futsafori yoiyamacahuun. Man futsafohuunoa yoisharayamaino Diosiricai matohuunoa yoisharashquima. Ascashon yoiquin isca huayamacahuun, “Nanton chaca huua. Ascacun Diosin iconquin onaintimairan,” ishon yoiyamacahuun. Nan onaintimapainonran, ishon man futsahuunoa shinanyamaino Diosiricai mato onaintimaima. Man futsafo rau huacuri Diosirifi mato rau huashquin. <sup>38</sup>Ascacun yorafo shara huacahuun. Man yorafo shara huacun Diosin matorifi shara huai. Ascacun futsafo inansharaqui finacoincahuun. Matsiquimacoinquin. Maniriqui futsunon. Man futsafoasca huacun Diosin arifi mato nanscacoин huaashquin, —Jesús huani.

<sup>39</sup>Jesús ahuarafo yoiái cuscarahuunshon ato yosini, —Fushocai afu fusho raqui iyotiroma. Iyopai afu shato muran pacutiro. Nanscarifi aqui

futsan Diosin tsain tapishomacai mato tapimatiroma. Matofu afiri funotiro. Mato amaquri yoitirofoquin.  
**40**Ahuunshon tapiainfoancai tapimamisiton tapian cuscan tapirofoma. Ascafia nan ahunshon tapiainfoanca chipo tapiaino nan tapimamisi cuscara itirofo.

**41**¿Ascan ahuuascai yora ahuara pasnanshta fuostamua man futsupaiyain marifi sapa uhuapa fuostamufiashon? Ascashon min chaca huairan futsa huafiaquin mancaifin fasi finacaiquin. **42**Ascashon man yoiqui isca huai, "Uhuun yorashtan, un min furo murannoahuara pasnanshta un mia futsunon," man huamisi. Ascafashocai man tapiama man sapa fuostamufafainna. Man fuparamitsapaimisi. Ascacun sapa futsucumuhuun. Asca huashon oinsharafain marifi man futsa pasnanshta futsutiro. Nanscarifi aquin futsafoan ato chaca shatumapaifiaquin marifi man chaca hua. Man fasi paran. Ascacun iquisi mato chaca shatucahuun. Ascashon marifi man futsafo chaca shatumatiro.

#### Ihui ahuun fimihuunshon non onantiro

Mt 7.17-20; 12.34-35

**43**Ihui sharofoan ahuun fimicai chaca itiroma. Ihui chacafoan ahuun fimicai shara itiroma. **44**Ascano ihuifoti ahuun fimifohuunshon non onantiro ahuu cuscrafomainquin. Ihui moshayafohuunoacai shopa foaicun non tuscutiroma. Nanhuafaquisihuunricai uva foaicun non tuscutiroma.

**45**Nanscarifi ahuun nomuranshon ahuara sharafosi shinain cuscan ahuun tsainrifi sharacoin itiro. Nanscarifi ahuun nomuranshon ahuara chacafosi shinain cuscan ahuun tsainri chacacoin

itiro. Ascashon nocon ointi muranshon non shinain cuscan nannorico non yoitiro.

#### Futsan pushu mutsisipa huaino futsan pushu mutsisipama huatiro

Mt 7.24-27

**46**¿Ahuuscai Ifo ua huafiamishaquin un mato yoia cuscan man aimamun? **47**Ascacun un mato yoi ahuu cuscaramain tsoan ua nicasharashu nan un yoia cuscacoin aaiquin. **48**Tsoan pushu huaque ahuun quishi nichishquin iquisi mai puhuuqui mai tuiqui nocoo. Ascashon pushu anaitiano ananmanri unu foanfiaquicai pacutiroma. Fasi pushu mutsisipacoin. Nanscarifi ahuun tsain nicacolianfo nan un yoia cuscacoin acani. Ascashu ahuara ahuuscarafainocai umaqui itirofoma.

**49**Ascan un yoiai cuscan nicafia tsoa ascaima ahuuscama ahanicain un mato yoi. Yoran pushu huaqui ahuun quishi nichifiaquin mai puhuuqui tuiqui nocooma. Fuquinishtacoin huaa. Ascashon pushu anaitiano ananmanri unu fai foquin pushu paoanquin chacana huatiro. Nanscarifi ahuun tsain nicafiai ascashuma ahuun unutani nantifi funcani.

Omitsiscashcaniran, —ishon Jesús ato yoini.

#### Romano ranushumua niaifoan ahuun oinmati Jesús caya huani

Mt 8.5-13

**7** <sup>1</sup>Yorafo yoiquin anaititan Jesús Capernaum ano cani. <sup>2</sup>Nanno ranushumua niaifoan ahuun oinmati nan ahuun noicoian fasi isininquai finacoin ini. <sup>3</sup>Ascacun Jesús ahuamamishti huatiro nicaquin ranushumua niaifoan shinanquin isca huani, —Uncai Israelima. Ascacun un

niaifofo ato yoi ua Jesús yoishonafo oshon uhuun oinmati ua caya huashoyoi onon, —ishon shinanni. <sup>4-5</sup>Ascano ato yonoa focani Jesusqui nocoshon yoinifo isca huaquin, —Ranushumua niaifoan noco yonoa non mia yoi onon. Nan nocofunu shara. Nocon caifohuuri fasi noimisi. Nanton nocon ichananti pushu huamashona. Noco shara huashomisi. Ascacun mirifi asharashoicapun ahuun oinmati caya huashoshquin, —ishon Israeli niaifoano yoinifo.

<sup>6-7</sup>Ascano Jesús atofu cani. Ranushumua niaifoan ahuun pushu chaimasha man fuaifoan afanan ahuun yorahuaflo Jesusqui nichini yoiqui isca huanonfo, —Ifon, un mia fucash huapaima. Un cai ahuama. Min nocofunu tsoa cuscaramacoin. Uhuun pushu ari capaiyamaquin. Min tsainmansi uhuun oinmati ua caya huashohuun.

<sup>8</sup>Ascan uafin uhuun niaifoan ua yonomisiquin. Urifi ranushumuaflo un yonotiro. Unmain ato yonoainofin un futsa, “Catahuun,” huaino cariscatiro. Un futsa, “Ohuu,” huaino uqui oriscatiro. Uhuun oinmatiri, “Ua ashoriscahuun,” un huacun ua ashoriscatiro. Asca minfin ahuamamishti huatiroquin. Ascacun min tsainmansi yoihiu uhuun oinmati cayanon, —ishon yoini.

<sup>9</sup>Ascaiton nicaquin Jesús a mufaina yorafo yoiqui isca huani, —iAira! iNicacapon! Tsoa futsacai naton acai cuscan ua icoindra huacoinmisima. Israeli anoafaoanricai ua isca huaqui icoindra huacoinmisifoma, —ishon Jesús ato yoini. <sup>10</sup>Ascano a ranushumua niaifoan ato nichiafo Jesús tsainqui anaitiano afanan naso furan oianfo ahuun oinmati man cayasharacoian ini.

#### Ainfomaqui ahuun funu naa ahuun facu man naafiacun Jesús funini

<sup>11</sup>Ascano chipo shafa futsa Jesús pushurasi Naín ano caino afu rafuafo

yafi yorahuanrasi afu fonifo. <sup>12</sup>Ascashu Naín ano nocoti chaima oian pushcohuai naa mai huai focani ahua fu yora ichapa fonifo. Nan pushcohuai ahuau ahuun facu fusticoin. Nan ahuau maqui funu naani ini. <sup>13</sup>Ascashu uaicaiton oin Jesús ahuun ramapaicoinquin yoini, —Uaiyamahuu, —huani. <sup>14</sup>Asca huatan pushcohuai ahuun ihuaifo aqui racati muuainno nitunifo. Ascaiton Jesús yoini, —Pushcoshtan. Un mia yoi. Funihu, —huaino. <sup>15</sup>Pushcohuai tsaoinacahuau tsainni. Ascaiton ahuun ahua Jesús yoini, —Naquian. Min facu afanan man nia. Iyosharatahuun, —huani.

<sup>16</sup>Ascaiton oincani yorafo fasi ratucoinnifo. Ratu nishmapacuquin Dios yoisharaqui isca huanifo, —Diosin tsain yoimisi noco muran Diosin nichian. Diosin ahuun yorafo ashoin oraran, —ishon yoinifo. <sup>17</sup>Ascashon nan Jesús aca cuscan yoifoanfafainfo. Judea anoaflo futan mai futsa ariafoan ahuunoa nicaquin futsanifo.

**Nan yorafounu muran iquimamupacuni  
Juanpan afu rafuafo Jesusqui nichini  
Mt 11.2-19**

<sup>18-19</sup>Juanpan tanamisifoan Jesús ahuaraflo huaiton oianfo cuscan Juan yoi focani cunu muran iquinifo. Ascaiton nicaquin Juanpan a tanamisifo rafu yoini, —Nanmain Diosin catonniquin ointacahuun. Ascashon yocaquin isca huatacahuun, “Nan miamun Diosin catonni nocoqui nichishquin. Ascayamarai futsa raca non manaicai noco Numamisi inon,” ishon ua yocashotacahuun, —Juanpan ato huani.

<sup>20</sup>Ascano nan rafutan focashon Jesús yoinifo, —Nan yoraunu muran iquimamisi Juanpan noco nichian non mia yocayonon. Ascacun non mia yocai.

Nan miamun Diosin catonni nocoqui nichishquin. Ascayamarai futsaraca non manaicain nocon Numamisi inon, —ishon yocanifo. <sup>21</sup>Ascaino nantianri Jesús nan isininqui omitsiscaifo caya huafain yoshin chacafo atohuun nuaifo atomaquinoa potafain fushoforifi oinmasharapacuni.

<sup>22</sup>Ascashon nan Juanpan ato nichian rafu Jesús yoini, —Un acaiton man oian cuscan uhuunoa man nicai cuscan Juan yoitacahuun. Ascashon fushofo un caya huua oinsharaifo cuscan yoifain pastocoinfoi un caya huua nicasharanonfo nanrifi yoifain ato yoratisho coyo cuscara tocoi futsuafori caya huafain yora nipaiqui ranainfori un ato caya huaa yoifain man nacoinnenfori un ato funimana. Ascashon yora ahuuomafori tsain shara un ato yoifafainmisi ahuuscashumain Diosin niaifo fu ipatirofoquin, ishon un ato yoimisi. <sup>23</sup>Ascan nanfo un mato yoiai cuscan Juan yoitacahuun tsoan ua icoingra huacoinshocai afanan ahuara futsa shinainma. Nan cuscara yorafolin fasi unimacointirofoquin, —ishon Jesús ato yoini.

<sup>24</sup>Ascatan man foafoanno Juanhuunoa Jesús nanno niafo yora huarasi yoini, —Ahuuuscai istaipama ano Juan oin focani fonifomun? Juancai nan facatahua pui ninhuun focu focu acai cuscarama. Nanscarifiai man man tapia Juancai ointi rananyama. <sup>25</sup>Ascan ahuuuscai Juan oinpai man fonimun? Itsairaca nan nocofunun sahuuti sharacapacoin sahuucun oincai man foni. Ma. Juanpacai sahuuti shara sahuumisima. Niaifoanfin ato pushu muranshon sahuuti sharacapacoin sahuutirofoquin. <sup>26</sup>Nan Diosin tsain yoimisiraca oincai man foni. Ascafia nan icon Juanpan Diosin tsain yoimisifia nanton yoimisi cuscacai tsoa futsan anori yoimisima.

<sup>27</sup>Ascacun nanhuunoa Diosin tsain cununi isca huaquin, “Min nai ariashu mai ano fotoataima iquisi uhuun tsain yoimisi nichiqui tau huai mihuunoa ato yoiaino itisharashon mia nicanonfo,” ishon cununi. <sup>28</sup>Un mato icon yoi.

Tsoashtacai Juan finoanma. Ascashon Juanpan tsain yoimisi cuscacai tsoan ascara tsain yoiyomisima. Ascafia Dios niaifo icanoafoan yoisharatirofo cuscacai Juanpan nicayamafain nanfoan oianfo cuscacai oinyomisima. Ascashon nantifi Dios icanoafoan Juan finoanfo, —ishon Jesús yoini.

<sup>29</sup>Ascashon nan Jesús nicaifo futan Roma anoa niaifo pui fishomisifo Juanpan ato unu muran iquimapacuni aton chaca shatunonfo. Ascano nanfoan Jesús yoaiton nicaquin yoinifo, —Jesús noco cayacafiecoin yoi. Diosin noco yona cусcan nan iconran, —ishon yoinifo. <sup>30</sup>Asca huafiaifoan Fariseofo futan Moisés cununi cuscan tapimamisifoancai Diosin ato amapaiyai cuscan nicapainifoma. Ascasho nanfoanri yoinifo, —Juanpan noco yoiai cuscacai anorima. Nocoricai unu muran iquimatiromaran, —ishon yoinifo.

<sup>31</sup>—Ascashon afanan un mato tapimai. Natian niyoafo ahuu cuscarafoquin.

<sup>32</sup>Nanfotin nan facu cashumisi cuscarafoquin. Facufo cashucaquin afu facu futsafo oi ashcafaini cunatirofo. Nanscarifiai nanfotin nanscarafquin. Ascan nan facu cashumisifoan yoitirofo isca huaquin, “Man non shainti manufiaainocai monopainaanimaran,” ishon yoifain “fanainca omitsiscati cuscara non fanaiiainocai man uaipaimaran,” ishon nan facu cashumisifoan yoitirofo.

<sup>33-34</sup>Nanscarifi aqui nanfoanrifi Juan yafi uqui tsain chipufafainmisi. Ascafia Juanpacai piqui tunufain fimi unu pau ayamisima. Ascacun ahuunoa yoiqui isca

huamisifo, “Juan nisocoin. Yoshin chaca ahuun nuaran,” ishon yoimisifo. Asca unfin piisharafain un ayasharamisiquin. Ascafia uhuunoari yoiqui isca huamisifo, “iCuu! Jesús pitscoin fasi ichapari ayatiroran huafain Roma anoa niaifo puifishomisifo yafi yora chacafo furi rafuiran,” ishon uhuunoa chaca yoimisi.<sup>35</sup> Nanscarifi aquin nanfoanri yoiqui isca huamisifo, “Tsoanmain shinansharafain icaquin non onantiro. Nan yorafin isharacoianquin shinansharamain huaifin,” ishon nanori yoimisifo. Nannori yoifiaquicai uhuunoa ascara yoipaimisifoma. Ascatamarocon uqui tsain chaca fusti huamisiforan, —ishon Jesús ato yoini.

**Jesús Simón pushu muran iquini nan  
Simón Fariseo ini**

<sup>36</sup> Ascano Fariseo futsan Jesús yoini, —Tapimamisiton, uhuun pushu ano cahuun un mia pimanon, —huani. Ascaino ahuun pushu ano cashon a futan pini. <sup>37</sup> Nan pushurasi anori ainfo furomacoin ica ini. Ascashon Fariseo pushu muranshon Jesús paiton nicai arifi nan pushu muran iqui caini. <sup>38</sup> Ininti motica tsomashu Jesús cachiori nitishoni. Nan moticanun ahuun anu alabastro a muran ahuun ininti fasi paratamacoin ahuun pui nua ini. Ascatan amanaon niashu uaiqui ahuun fuonpan Jesú tau muchana huani. Ascashon ahuun foo chainipaton otucuruaquí shara huatan ahuun tau tsoatan ininti ahuun tauqui ocaní. <sup>39</sup> Asca huaiton nan Fariseo Jesús piimaiton shinanquin isca huani, —Na nocofunu Diosin tsain yoimisicoinshon na ainfoan muai cuscan onancuana na ainfomain ahuu cuscaraquin, —ishon ahuun nomuran shinanni. <sup>40</sup> Ascaiton onanshon Jesús Fariseo yoini, —Simón, un mia ahuara futsa

yoiran, —huaiton. Simón cumani, —Tapimamisiton, ua yoihuu, —huani.

<sup>41</sup> Ascaiton Jesús yoini. —Ato pui inanyomisiton nocofunu rafu pui inancun nan rafutan ahuun rafanan nifinifo. Futsan quinientos denario nifiaino futsan ichapama nifini cincuenta denario. <sup>42</sup> Ascafia nan rafutan nan nifian cuscan nasopaifiacai tsoa puiya inima. Ascacun nan ato pui inanyomisiton ato yoisharani afanan tsoa a nifinonma. Ascan nan rato futsacaimun fasi ahuun noiqui finacaiquin, —ishon Jesús yocaiton.

<sup>43</sup> Simón cumani, —Nan paratama nifiatocairaca fasi noiqui finaiquin, —ishon yoititon.

<sup>44</sup> Afanan Jesús cumaqui isca huani, —Min cayacafi yoíran, —huatan ifiacucuhuan yoini, —Oinpon. Na ainfoan fasi ua noicoin. Min pushu muran un iquiaitocai mian ochoama. Asca na ainfoanfin fasi uhuun noiquin ahuun fuonpan uhuun tau muchana huafain ahuun foon ua otucuruacaquin. <sup>45</sup> Nocon fuyamisi cuscaricai mian uhuun tamo tsoama. Asca na ainfoanfin min pushu muran un iquiaitan uhuun tauqui ua tsoariaiquin. <sup>46</sup> Ascan mianricai uhuun mapoqui shuni ocama. Asca na ainfoanfin uhuun tauqui ininti ocaquin.

<sup>47</sup> Ascacun un mia yoi. Na ainfoan ahuara ichapa chaca huafiamisicun natian ahuun chaca mun soashona. Ascashori mun rau huacoinna uhuun fasi noiaiton. Asca tsoan shinanquin isca huai, “Uncai ichapa chaca huamisima. Ascacun uari uhuun chaca ichapama ua rau huashotiroran,” ishon shinaintocain ua ichapa noimaran, —ishon Jesús Fariseo yoini.

<sup>48</sup> Ascashon ainfo Jesús yoini, —Natian mun mia chaca rau huashoanran, —huani.

<sup>49</sup>Ascaino Fariseo pushu murannoafó afi ranan yoinannifo, —¿Tsoamun na nocofunuquin? Fasi chaca huamisifo ato chaca soashofain ato rau huatiroran, —icashu yoinannifo.

<sup>50</sup>Ascashon Jesús afanan ainfo yoiqui isca huani, —Mian icoinra huitofin un mia numaquin. Caasharatahuun, —ishon Jesús yoini.

#### Jesús futan ainfofoan apaoni cuscan

**8** <sup>1</sup>Asca huatan chipo Jesús pushurasiti ato yoifoanfafaini ahuu cuscaramain Upa Diosin niaifoan ahuu yorafó iquinai cuscaraquin. Ascaino doce afu rafuafori afu fonifo. <sup>2</sup>Ascaino ainfofori afu fonifo. Nanfo isinincái yoshin chaca atohuun nuucun Jesús ato caya huapaoni. Nan futsan ahuun anu María Magdalena. Nanhuun siete yoshin chacafo ahuun nuucun Jesús amaqinoa potani. <sup>3</sup>Futsan ahuun anu Juana nan Cuzapan ahuin ini. Nan Cuza niaifo Herodes ahuun niaifo patashari ini. Ainfon futsan ahuun anu Susana. Ascashu ainfo futsaforifi Jesús yafi afu rafuafo fu fonifo. Nan ainfofoan Jesús yafi afu rafuafo pui inannifo ahuun rafanan tushu finonfo.

#### Jesús fimi ushu saamisihiunshon ahuarao ato yosini

*Mt 13.1-9; Mr 4.1-9*

<sup>4</sup>Pushurasifoti anoashu ahuun tsain nicapaicani yorahuanrasí aquí fuaifoan ahuarao yoiái cuscaraahuunshon ato tapimani isca huani, <sup>5</sup>—Nocofunun ahuun noshati murannoá fimi ushu fishon ahuun mau mamaqui saaca ushufo fai nushmancayan pacucun puamanafanno puiyafonri piinifo. <sup>6</sup>Ushu rananri toquiri camaqui pacua mai ichapamashta anoashu foaifa fari tsasi huani unum muchana huayamaino nai cuyoní. <sup>7</sup>Ascaino ushu rananri tasha

murannoashu foaifiashucai ushu futsa foaisharanima. <sup>8</sup>Ushu rananri mai shara ano pacuafó foaisharashu fimi ichapayacoin iniran, —ishon Jesús ato yoitan oi ashcafín ato yoiqui isca huani, —Manmain ua nicatiroquin ua nicafain uhuun tsainri maton nomuran nanucoincahuun, —ishon ato yoini.

#### Ahuuscaquimain Jesús futsafo ahuarao

futsahuunoa yoini ato yosinon

*Mt 13.10-17; Mr 4.10-12*

<sup>9</sup>—Min ato saamisihiunoa ahuara futsa tapima ato yoia cuscan noco shafacafí tapimahuu, —ishon afu rafuafoan Jesús yocaifoan. <sup>10</sup>Jesús ato cumani, —Upa Dios a icanoshon ahuun yorafó iquinai cuscan un mato fusti shafacafí tapimai. Ascan nanfófin ahuarao cuscaraahuunshon fustisi un ato yoiaquin. Ascashon nanfoancai un ato oinmana cuscan oinfiaquicai tapiafoma. Nicafiaquiricai tapisharafoma.

#### Fimi ushu saamisihiunoa ahuara yoifiashon shafacafí afu rafuafo tapimani

*Mt 13.18-23; Mr 4.13-20*

<sup>11</sup>Un saamisihiunoa ahuara futsa un ato yoia cuscan un mato shafacafí tapimai. Nan ushufo Diospan tsain cuscara. <sup>12</sup>Nan fai curushu yorafóan aton ointi cuscara. Ascashon nanfoan Diospan tsain nicafain ato nomuran nanufiafo nan yoshin chaca Satanás atoqui oshon nan nicafo cuscan ato fiantiro icoinra huayamafain Dios fu ipanonfoma. <sup>13</sup>Ascan nan toquiri camaqui mai ichapama cuscan nanscarifiai yorafóan Diosin tsain nicaquin tau huai unimacoinyofiashu ahuarao ahuuscaraino samamashta cachiquiri huatiro. Nanfoan Diospan tsain icoinra huaqui chai huashoma ahuarao chaca finonquin samamashta Dios cachiquiri huatirofo. <sup>14</sup>Ascan nan

ushu futsafo moshafu muran pacuashu foai sharatiroma. Nanscarifiai futsafoan Diospan tsain nicafashon ahuara nan acai cuscan fustisi shinanfain pui ichapa yafi mafo ichapa noiqui itiashmashtafi Dios cachiquiri huai. Ascaquicai Diosin ato amapaiyai cuscan huacanima. Ahuarao futsafohuunshosi ato nomuran afi unimamapaicani.<sup>15</sup> Ascafia ushu futsafo mai shara ano pacuashu foaiquin yosiashu fimi ya itiro. Nanscarifiai futsafoan Diospan tsain nica cuscan icoindra huashu ahuun nomuran sharacoin. Ascaquicai Diospan tsain nicafo cuscan cachiquiri huacanima. Ascashon nanfoanri futsafo icoindra huamatirofo.

**Lamparinahuunoa cuscara Jesús ato yoini  
Mr 4.21-25**

<sup>16</sup>Tsoancai tapa camaqui lamparina otashon paninranun fupomisima. Asca huatama otashon tapa camaqui huaa pushu muran iquiafoan oinsharatirofo.<sup>17</sup>Nanscarifiai man shinanmisi cuscan ahuarao huafashon man fomanmisi cuscari nantifi mato puashoshquin. Anoshocai ahuashta afanan man fomantiroma.

<sup>18</sup>Ascacun oinfain. Uhuun tsain nicasharacahuun. Tsoan uhuun tsain nicasharacoian paratamari Dioshuunoa tapisharatiro. Ascan tsoan uhuun tsain nicafashu ascacoianma ascashu nan nicamisi cuscari funoshqui, —ishon Jesús ato yoini.

**Jesús ahua yafi ahuun ushtofo  
Mt 12.46-50; Mr 3.31-35**

<sup>19</sup>Ascatan Jesús ahua yafi chipocufo aqui iquipai oianfo yorahuanrasi fasi fospiafono iquinifoma.<sup>20</sup>Ascaiton futsan yoini, —Min uhua futan ushto rananun mia oinpai fuafu chifi niaforan, —ishon yoiaiton.

<sup>21</sup>Jesús cumani, —Nan uhuun Upa Diosin yoiai cuscacoin aaofin uhuun uhuafu yafi uhuun ushtofoquin, —ishon yoini.

**Jesús fuuhuan yafi ian fuchomanhuan  
nishma huani  
Mt 8.23-27; Mr 4.35-41**

<sup>22</sup>Shafa futsa Jesús afu rafuafu yoini, —Non ianmanhuan oquiri fonon focahuun, —ato huaino afu nanufainifo.

<sup>23</sup>Ascashu foafono atoqui fuuhuan noconi. Nantian Jesús shasho tsispas camaquinoashu osha ini. Ascano fuuhuanquin ianmanhuan fuchochuun unu shasho muran iquimani. Fasi musucoin ini.

<sup>24</sup>Ascaiton afu rafuafaoan moinnifo, —Moihuu, Ifon, man non asai futsuicai, —ishon yoiafoanno moinacahuatan ninacahuani. Ascashon yoini isca huaquin, —Fuun nishmahuu huafain fuchomanhuanun nishmahuu, —Jesús huani. Ascaino ian fuchoi nishmafaini. Man asca huano ian pusiquima racani.

<sup>25</sup>Ascaiton ato yoini, —Ahuiscaí un nunofiano ua icoindra huatama man ratuai? —ishon Jesús ato yoini. Ascaino fasi ratucani mustairicatan afi ranan yocanonannifo. —Noco ifomun tsoaquin? Fuuhuan yafi ian nan yoiai cuscan man nishma hua, —icashu afu rafuafu yoinannifo.

**Geraa mai anoa nocofunuhuun  
yoshin chaca nuua ini  
Mt 8.28-34; Mr 5.1-20**

<sup>26</sup>Ascatan ianmanhuan pocufaini Galilea ocuma futsa Geraa mai ano noconifo.<sup>27</sup>Ascashu shasho murannoashu Jesús fotocainaino nocofunu yoshin chaca ahuun nuua aqui noconi. Sahuuti sahoo sahuutianima. Pushu muranricai imisisima. Mahua quini muransi iitiani. Nan mahua quini

muranri naafo mai huamisifo.<sup>28</sup> Jesús fuchitan ratoconun mai chachipacufoan oi ashcafinitin yoiquin isca huani, —¿Mian ahusca huapaimun, Jesús? Diosin nai muran ica nantifi finoncoianton ahuun Facufin minquin. Ua omitsisca huayamapun, —ishon yoshin chacahuunshon nocofunun Jesús yoini.<sup>29</sup> Nannori yoini Jesusmain yoshin chaca amaquinoa potayamaiton. Asca aqui Jesús nocoataima yoshin chacapan nocofunu achiriaapaoni. Ascaiton yorafoan cadenanun munushfain onushushon cushufiafo nanfo tusaqui futsafaini ichopaoni. Ascashon yoshin chacanun tsoan istaipama iyoni.

<sup>30</sup> Ascaiton Jesús yocani, —¿Min ahuanumun? —ishon yocaiton. Yoshin cumani, —Nocon anufin ichapaquin. —Anori yoini yoshin chacafomain ichapa ahuun nuucun.<sup>31</sup> Ascashon yoshin chacafoan Jesús yoini, —Omitsiscapanacafo quininhuan muran noco potayamapun, —huarianifo.

<sup>32</sup> Ascaino nantianari machi mananunshon yahua inafoan piinifo. Ascacun yoshin chacafoan Jesús yoicaquin isca huanifo, —Noco yahuarasihiun nichipun, —huaifoan. —Ascaiton yahuafohiun fotacahuun, —Jesús ato huaino.<sup>33</sup> Nocofunuuhunoashu yoshin chacafo yahuafohiun fonifo. Ascaino yahua huanras ian muran maocofainni asai futsunifo.

<sup>34</sup> Ascaifoan oinfaincani yahua cushima si fo ichonifo pushurasi ano chanifocani. Pushu patashari icafo yafi chaima icafoquiri chaninifo.<sup>35</sup> Ascaiton nicacani yorahuanrasi yahua asai futsuiton oinpaicani funifo. Fucaquin oianfo Jesús naman nocofunu ahuun yoshin chacafo numisi tsaoa ini. Man amaquinoa Jesús yoshin chacafo potano. Afanaricai imisi cuscan chitoria iyamacain nison inima. Shinansharaco inni.<sup>36</sup> Atirifi atoqui

nocoainfoan Jesús amaquinoa yoshin chaca potaiton oianfo cuscan futsafoqui chaninifo.<sup>37</sup> Ascaino Geresa anoafoan nicacani ratucoincaquin yoinifo, —Nocomaquinoashu catapun, —huaifoanno Jesús shashon nanucaini cani.<sup>38</sup> Jesús cataima a yoshin chaca amaquinoa potaton yoini, —Uari iyoicapun. Un mifu capaicai, —huafaiton.<sup>39</sup> Jesús yoiquin, —Ma. Min pushu ano cashon min yorafo mia Diosin ashoan cuscan huafain yoitahuun, —huani. Asca huaino cashon Jesús ashoan cuscan yoifoanfafaini. Pushurasi muran yafi patashari icafo chaima icafori yoifoanfafaini.

**Jairo photocofacu caya huafain ainfoan  
Jesúsahuun sahuuti muunni cayashquin**  
*Mt 9.18-26; Mr 5.21-43*

<sup>40</sup> Asca huatan ianmanhuan pocufurannaiton yorahuanrasitton cusumunshon Jesús mananifo. Fasi aqui unimacaquin —Nocoqui ohuu, —huanifo.<sup>41-42</sup> Nannori nocofunun ahuun anu Jairo. Israelifoan ichananti pushu anoa aton niaifo ini. Nanton ahuun photocofacu fustishtacoin doce fari aya ini. Ascano Jesús shasho murannoashu foto curanaiton Jairo fuoshopacuahuhan yoini, —Uhuun facushta isininqui man naiquin uhuun pushu ano ufu capun. Uhuun facushta ua caya huashoshquin, —ishon Jairo yoiaino Jesús afu caino yorahuanrasi atofu focaquin fasi yuruanifo.<sup>43</sup> Nannori ainfo atofu cani. Nan ainfi imi imitiani doce fari man aqui caafiano nusuyamacai. Cayapaiqui nan aya cuscan doctorfo ato inanfiacuaci tsoanshta caya huamamisima.<sup>44</sup> Ascashu Jesús caiton ainfoan acachorishori ahuun sahuuti cupanan muunni. Muuanshu imi shaturiscatani.<sup>45</sup> Ascaiton Jesús ato yocani, —¿Tsoan ua muamun? —ato huaiton.

Nantifiton yoinifo, —Non mia muamaran, —ishon futsan yoicun futsan yoicun huanifo. Ascaiton Pedronun yoini, —Tapimamisiton, yorahuanrasiton mia yuruafain mia putsiquinaforan, —huaiton.

<sup>46</sup>Afanan ato yoini, —Ratoran futsan man ua mua. Uhuun curushhuunoashu nan ratoran man cayaran, —ishon.

<sup>47</sup>Jesús yoiaino ainfoan tapini Jesús man onan. Ascacun raquicai onutiroma oin ratui taritari iyanan yora huanrasiton ointaifi Jesús nia naman ratoconun mai chachishon nan ica cuscan yoini, —Un imi imitiani doce fari man uqui caa. Tsoancai ua caya huamamisima. Ascacun min sahuuti muuashu un imi shaturiscaran, —ishon ainfoan Jesús yoini. <sup>48</sup>Ascaiton, —Achishtan, ua icoira huashufin min cayaquin. Caasharatahuun, —ishon Jesús yoini.

<sup>49</sup>Ascashu Jesús tsainai muran niaifoan pushu anoashu aqui oshon futsan yoini, —Min facu man naaqui. Natian nocon tapimamisi afanan fucash huayamacahuun, —ishon futsan niaifo yoini.

<sup>50</sup>Ascaiton nicaquin Jesús yoini, —Ratuyamahuu. Min ua icoira huaino min facu cayaquin, —ishon yoini.

<sup>51</sup>Ascatan pushu ano nocoshon Jesús yoini, —Pedro yafi Juan non Santiago non facun ahuun apa non ahuari marusu ufu pushu muran iquicahuun, —ato huani. <sup>52</sup>Ato asca huaino iquifainquin oianfo uaicani shorarascanifo. Manocani. Ascaifoan Jesús ato yoini, —Uayamacahuun. Na facucai naama. Oshafinquin, —ishon ato yoiaiton.

<sup>53</sup>Jesús osanifo. Man facu naacoina oinfainfoan. <sup>54</sup>Ascashon Jesús shotocofacu mutsoinifoanquin oi ashcafainin yoiquin isca huani, —Facushtan, funinaca huanhuun,

—huaino. <sup>55</sup>Afanan funinaca huatan shotocofacushta nini. Ascaiton, —Piimacahuun, —Jesús ato huani.

<sup>56</sup>Apa yafi ahua aton facu funia oincani fasi unimacoinnaifoan ato yoini, —Maton facu naacoinfiacun un funimana cuscan tsoa yoiyamacahuun, —ishon Jesús ato huani.

**Jesús afu rafua doce nichini Diosi  
niaifo icanomain ahuu cuscara  
iishquicai ishon ato tapimanonfo**

*Mt 10.5-15; Mr 6.7-13*

**9** <sup>1</sup>Shafa futsaino Jesús doce afu rafuafo cunaino aqui funifo. Ascano aqui fuaoan ato yoiqui isca huani, —Uhuun curushhuunshon yoshin chacafo yorafohuun nuucun atomaquinoa potafain pau futsa futsatapafori uhuunshon man ato caya huatiro. <sup>2</sup>Ascashon uhuun Upa Dios niaifoahuunoari ato yoifain isininhaifori ato caya huatacahuun.

<sup>3</sup>Ascacun mato ahuara foyamacahuun. Mato poquiti non forusa non tushu non puiri foyamafain mato sahuuti futsafori foyamacahuun. <sup>4</sup>Ascan ratoran pushurasi ano man nocano tsoa aton pushu muran mato iquimai nan fusti muran iyocahuun nan man caitian. <sup>5</sup>Asca rato pushu futsa iyamarai pushurasi anoafaoanri mato nicacasmaifoanno atomaquinoashu focaquin maton sapato tatashacahuun. Ascaquifin man ato ismatiroquin mato nicacasmafain Diosirifi nicacasmaifo cuscan. Diosin tsain icoira huamaforan, —ishon Jesús ato yoini. <sup>6</sup>Ascashon ato yoiquin anaitiano pushurasifoti ano Upa Dios niaifoahuunoa yoifain isininhaifori Jesushuunshon ato caya huafafainifo.

**Niaifo Herodescái nannorisí shinanníma**  
*Mt 14.1-12; Mr 6.14-29*

<sup>7</sup>Ascano nan niaifo Herodes a Jesús aca cuscan nicashu, —¿Tsoamun na

nocofunuquin? —ishon shinanni. Atirifoan yoinifo, —Nanfin Juanqui man afanan funia, —ishon yoinifo. <sup>8</sup>Futsafoanri yoicaquin, —Naanfin Eliasquin, —huaino. Futsafoan yoicaquin, —Ma. Nantofin noco shuni caifo Diosin tsain yoimisi ipaoniquin man afanan funiaran, —ishon yoinifo. <sup>9</sup>Ascafiaifoan Herodes yoini, —Ma. Nancaí Juanma. Munfin Juan tushtumayamuaquin. ¿Asca nan nocofununmun tsoaquin? —ishon yoini. Asca nan niaifoanri fasi Jesús oinpaioccoinni.

**Jesús cinco mil nocofunufo pimani**  
*Mt 14.13-21; Mr 6.30-44; Jn 6.1-14*

<sup>10</sup>Ascashu chipo afu rafuafo Jesusqui naso cashon nan acafo cuscan Jesús yoinifo. Ascaiton nicaquin Jesús ato yoini, —Pushurasi Betsaida ano nocotisi non fononfocahuun, —ishon ato yoini. <sup>11</sup>Ascafia yorahuanrasi Jesús yafi afu rafuafo nan foafo ano tapicanashu atoqui funifo. Ascashu nocoaifoan Jesús ato yoini, —iAicho! Man uqui fui. Uhuun Upa Dios niaifo icanomain ahuu cuscaraqui un mato yoinon, —ishon ato yoini. Nannoshori ratoran futsa isininciai fuao ato caya huapacuni.

<sup>12</sup>Ascashu man fari caino afu rafuafo doce aqui fucashon yoinifo, —Yorafo nichihuun. Pushurasi ano yafi a chaima icafoanno fotanonfo. Fonaincaniquin. Anoshon tushu fifain ranimain oshacanicain shara futsa fuchinonfo. Nuno tsoa yamaiquin, —ishon yoinifo. <sup>13</sup>Ascaiton ato cumani, —Ato piimacahuun, —ishon a rafuafo yoiyaiton. —Nonfin misi mucu fustiti yafi shiman rafusi ayaquin. Min shinanmun na yorafo pimashquin non tushu ichapa ficaiquin, —ishon yoinifo. <sup>14</sup>Nanno cinco mil nocofunufosi ini. Ainfoyo yafi facufocai tanan huamunima. Ascaiton

ato yoiqui isca huani, —Ato yoicahuun futsano cincuenta tsaohuaifono futsa anori cincuenta tsaononfo. Nanscasi anono, —ato huani.

<sup>15</sup>Nan ato yoiai cuscan tsaoacunifo.

<sup>16</sup>Ascaino shiman rafu yafi misi mucu fustiti tsomashon nai ari foisinifoantana Diois cufinquin isca huani, —iAicho! Upan, mihuunshon un ato pimai. Min fasi sharacoincun, —huatan. Misi torupacutan shiman rafu ya osishon afu rafuafo ato inanni ato pashecanan huapanonfo. <sup>17</sup>Ascashon picani mayancoinnifo. A picaquin tushu huafu afu rafuafoan doce shihuati fospifuanifo.

**Pedronun, —Jesús Diospan facuran, —huani**  
*Mt 16.13-19; Mr 8.27-29*

<sup>18</sup>Ascataan shafa futsa Jesús afu rafuafo ointaifi apa Diois cufini. Cufinquin anaititan ato yocani, —¿Yorafoan shinanmun un tsoaquin? —ishon ato yocaiton.

<sup>19</sup>Cumanifo, —Futsafoan yoiafin min Juanquin. Nan yorafounu muran iquimapacumisi. Asca futsafoanri yoiafotin min Eliasquin. Asca futsafoanri yoiafotin min noco shuni nan Diois tsain yoimisi ipaoniquin man min afanan funiaran, —huaifoan.

<sup>20</sup>—¿Asca marifi man shinanmun un tsoaquin? —ishon ato yocaiton. Pedronun cumani, —Minfin Cristoquin. Nan Diois mia catonniran, —ishon yoiyaiton. <sup>21</sup>—Ascacun tsoashta yoiyamacahuun, —Jesús ato huani.

**—Unfin chipo naashquicai,  
 —ishon Jesús ato yoini**  
*Mt 16.20-28; Mr 8.30-9.1*

<sup>22</sup>Ascataan afu rafuafo yoiqui isca huani, —Un chipo fasi omitsiscashquin. Nocon yorafohuunshon Diois cufimisi niaifofo

non Dios fu tsainti pushu cushumisifo Moisés cununi cuscan tapimamisifoan futan ua icoingra huashquicanima. Ascashon ua ato rutumafiafo osha rafu non fusti finontan un afanan furnishquiran, —ishon Jesús ato yoini.

<sup>23</sup>Ascashon nantifi yorafo yoiqui isca huani, —Tsoan ua tanapai sharaquicai afin apaiyai cuscan huatiroma. Ascataama nan un yoiai cuscacoin huatiro. Ascashon shafatifiri shinanqui isca huatiro, “Ua omitsisca huafiaifoanno uncai uhuun Ifo potapacunacama. Ahunshon ua rutufiainfoanno un tanaqui unupacunacamaran,” ishon shinantiro.

<sup>24</sup>Ascan tsoan shinanquin isca huai, “iOhua! Un Jesús tanaitonraca ua omitsisca huacanicati,” ishon shinanquin uhuun tsain cachiquiri huaa. Nanscara yorafo naashu omitsiscapanacaflo. Ascan tsoan uhuunoashu omitsiscuai naa. Nanscara yorafofin nacanashu ufu isharapacunacafquin. <sup>25</sup>Ascan ratoran futsan nantifi manifoti anoafu ahuara fia ahununacoin ifiashu amaqi naino nantifi ahuunafo funotiro. Ascashu nantifi ahuuna iyopaonifia omitsiscapanacaflo muran cainocai ahuashta itiroma.

<sup>26</sup>Ascan tsoa uhuun rafipaiquin uhuun tsainri uhuunoa yoicasmaifo. Nanscarafohuun urifi un chipo uhuun Upa Dios cuscaracoin iicaino uhuun Upa Diospan oinmati afu nai muran ica sharafoya chasha curani un fotoaitian un nanscara yorafohuunri un rafipaiquin. “Nacai uhuun yoramaran,” ishon un yoishqui. <sup>27</sup>Ascacun icon un mato yoi. Man futsa nuno ufu niaton naataishoma Upa Dios niaifo icano cuscara man oinyoshquiran, —ishon Jesús ato yoini.

**Jesús fianananriscatani**  
Mt 17.1-8; Mr 9.2-8

<sup>28</sup>Ascashu ocho osha finontan Jesús Pedro non Juan non Santiago nan rafu

non fusti ato machi ano iyoni. Apa Dios cufi caquin. <sup>29</sup>Ascashon Apa Dios cufiaino ahuun fuso fianananriscatani. Ahuun sahuutiri chashariscatani nan yoa rama furoa ointsa. Fasi osho sharacoin facafacai ini. <sup>30</sup>Ascaino nocofunu rafu aqui niriscatan afu tsainnifo. Nan rafu Moisés yafi Elías ini. <sup>31</sup>Ascashu nan rafuri chashariscatishotan nan Jesús Jerusalén anoashu omitsiscacai naashquiai cuscan afi ranan yoinannifo.

<sup>32</sup>Ascaiton oincani Pedro yafi afu rafua rafutari oshapaifiacauin osha tunucinnifo. Jesús chashariscatanaiton nan rafutari oinnifo. <sup>33</sup>Ascashu nan rafu man Jesusmaqui caino Pedronun yoini, —Ifon, nuno non ica shara itiro. Non mia tapasi rafu non fusti huashonon. Mina futsa non Moisésna futsa non Eliasna futsari non huashonon, —ishon yoiflashocai Pedronun tapinima raquirimain huaquin.

<sup>34</sup>Ascashu nan tsaincrai muran atoqui coin manipacufoannaino coin muran nii futsuashu ratucoinnifo. <sup>35</sup>Ascashon nan coin murannoari oi nicanifo yoiqui isca huaiton, —Naanfin uhuun facuquin. Nan un catonni. Ascacun a nicacoincahuun, —Upa Diosin ato huani.

<sup>36</sup>Diosin tsainqui anaititanaino oianfo arus fusti Jesús nia ini. Ascafashocai tsoashta yoinifoma arus fusti aton nomuranshon shinannifo.

**Jesús yoshin chaca furonanfacuhuun  
nuua caya huani**

Mt 17.14-21; Mr 9.14-29

<sup>37</sup>Ascataan iyoco futsaino machi anoashu photocaini Jesús caino aqui yorahuanrasa funifo oinpai fucani.

<sup>38</sup>Nanno yorahuanrasa muranshon futsan Jesús cunani. —Tapimamisiton, uhuun facu fusti ua oinshoniyopun.

<sup>39</sup>Yoshin chaca ahuun nuushon. Uhuun

facu fasi musta musta imayanan fisimafain ahuun ashfapan facoshurasi atspomamisi. Yoshin chacacai uhuun facumaquinoashu capaima. Nanscaquisi man rutui. <sup>40</sup>Un mifu rafuafu yoia isca huaqui, “Na yoshin chaca uhuun facumaquinoa ua potashocapun,” un ato huafiacai tsoan atiro icamaran, —ishon nocofunun Jesús yoini.

<sup>41</sup> Ascaiton Jesús afu rafuafu yoini.

—¡Ohua! Mancai ua icoira huacoinnاما. Man fasi amaqiri shinanmisi. ¿Ahuutia un matofu icamun man ua nicayamacaiyai? —ishon ato yoini. Ascan facun ahuun apa yoini, —Min facu ua ihuushohuun, —huani.

<sup>42</sup> Ascashon furun ihuushonaino yoshin chacanun afanan musta mustaimainifoanaino pacuni. Ascaiton Jesús yoini, —Minfin yoshin fasi chacacoquin. Na facumaquinoashu catahuun, —ishon Jesús curushcái yoiaino facu cayani. Ascaiton Jesús apa yoini, —Naquian min facu. Iyosharatahuun, —huani. <sup>43</sup> Ascaino oincani mustairacatan, —Diosin ahuamamishti huatiroran, —icashu yoinannifo.

**Jesús nashquiai cuscan afanan yoi futsani**

*Mt 17.22-23; Mr 9.30-32*

<sup>44</sup> Nan acaiton oian cuscan shinansharaifoan Jesús afu rafuafu yoiqui isca huani, —Un mato yoiai cuscan nicacoincahuun. Futsafin ua ato achimashquiquin, —ishon Jesús ato yoini. <sup>45</sup> Ascashon ato yoiái cuscacai tsoan tapinima. Diosin ato nomuran ato shinantima huaino. Ascacuái yocapafia ratucaqui yocanifoma shafacafi ato tapimanon.

**Tsoacaimun fasi shara finacaiaqui**

*Mt 18.1-5; Mr 9.33-37*

<sup>46</sup> Ascashu chipo afu rafuafu afi ranan fochishmanantanannifo. Ascan non rato

futsacaimun non fasi shara finacaiaqui ishon yoipacunifo. <sup>47</sup> Ascashon nan shinainfo cuscan onanshon Jesús facu mutsofurayoi qui isca huani, —Facushtan, nuno ufu niyyohuu, —ishon yoini. <sup>48</sup> Asca huatan afu rafuafu yoiqui isca huani, —Tsoan uhuunshon na facu shara huaifin nan uari shara huai cafisca huaiquin. Nanscarifiai tsoan ua shara huaquifin nan ua nichini uhuun Upa Diosiri shara huaqui. Ascan ratoran man futsa oinmati cuscará ahuuamafasho man yora shara huamisi nanfin fasi shara finacaiaquin, —ishon Jesús ato yoini.

**Tsoan noco chaca huapaitama  
noco shara huai**

*Mr 9.38-40*

<sup>49</sup> Ascaiton Juanpan yoini, —Tapimamisiton, non oian nocofunun min anuhuunshon yoshin chacafó atomaquinoa potaiton. Nancaí no fu rafumisima. Ascacun nan non yoiquin isca huua, “Asca huayamahuu. Min no fu rafumisimaquin. Asca yoshin chaca yorafomaquinoa min potatiromaran,” ishon non yoiaran, —Juanpan huani.

<sup>50</sup> Ascaiton Jesús cumani, —Asca huayamahuu. Tsoan noco chaca huapaitama noco shara huaifin sharaquin, —ishon Jesús Juan yoini.

**Jesús Santiago yafi Juan, —Asca  
huayamahuu, —ato huani**

<sup>51</sup> Afanan Apa Dios icari cati chaima Jesús Jerusalén ano cayoni. Ascaitocai tsoashta nitun huatiro inima. Manmain tapicufin a Jerusalén anoashu noco nashoyaoi Apa Diosin yonoa cuscan.

<sup>52</sup> Ascacun a rafuafu rafu rucun nichini. Nan pushurasi Samaria ano focashon itishara huashononfo. <sup>53</sup> Ascafia nannoafaoan ato yoiquin isca huani, —Nuno iquiyamacahuun. Non mato

oinpaimaqin, —ishon ato yoinifo.  
<sup>54</sup>Atoascahuaifoan nicashon afu rafuafu rafu Santiago futan Juanpan Jesús yoinifo, —Ifon, min noco yonopaimun atohuunshon non Upa Diosin cufinon nan pushurasi nai muranshon chii atoqui pota nai cuyononfo? —ishon yoaifoan. <sup>55</sup>Jesús ato cumani, —Asca huayamacahuun. Man shinain cuscacai un shinapaima, —ishon Jesús ato yoini. <sup>56</sup>Asca huatan pushurasi futsa ano cani.

### **Jesús tanasharapaiyaiifo**

*Mt 8.19-22*

<sup>57</sup>A fu caquin nocofunu futsan Jesús yoini, —Ifon, min raquira caino urifi un mifu cahuacacainon, —huaiton. <sup>58</sup>Jesús cumaquin, —Marifi quiniyaquin puiyafori naa yafofiano uncai pushu yama, —ishon yoini. <sup>59</sup>Ascashon nocofunu futsa Jesús yoiquin isca huani, —U fu cahuum, —huaiton. Cumaquin, —Ifon, ua manayohuu. Nam uhuun upa naitian iquisi mai huayotan un mia tanasharashquinon, —huaiton. <sup>60</sup>—Ascaquima ua tanafafainhuun. Ua ifoamafofin nan yora naa cuscaroquin. Ascashon nanfoan ato yora naacun mai huatirofo. Ascan minfin uhuun Upa Dios niaifohuunao ato yoifafaincain, —ishon yoititon.

<sup>61</sup>Futsan yoini, —Ifon, un mia tanapai. Ascafia iquisi uhuun pushu ano un cayotanon uhuun yorafo ato yoiyoicai, —huaiton. <sup>62</sup>Jesús cumaquin, —Tsoan ua yonoshofiaquin apaoni cuscan afanan huapai, nanscara yorafocai itisharafoma uhuun Upa Dios niaifo ano iquishcaquin, —ishon Jesús yoini.

### **Jesús setenta y dos nocofunufo nichini**

**10** <sup>1</sup>Ascatan Jesús setenta y dos nocofunufo catonni. Ascashon rafurasi ato nichipacuni. Nan pushurasi

patasharifo ato rufo nichini nanno chipo arifi atoqui caashquin. <sup>2</sup>Ascashon Jesús ato yononi isca huaquin, —Yora ichapafoan uhuunao nicataiyamafiaflashon ichapamaton ua yonoshocani uhuunao ato yoishcaquin. Ascacun fasi Upa Dios cuficahuun ahuun yonoshomisifo catonon uhuunao ato yoinonfo.

<sup>3</sup>Ascacun fotacahuun. Un mato yonoa cuscan chashoanfo masharonun pipaitiro cuscan nanscarifi huaquin uhuunoashu man isharafiacun yora chacafoan mato chaca huapacaniquin.

<sup>4</sup>Ascashori a muran pui huati yafi forusa non mato sapatori foyamacahuun. Focaquin yorafo finonfaincahuun. A fu tsainyoashu man funa nocotiromaquin.

<sup>5</sup>Pushu futsa muran iquishon ato yoicahuun, “Diosin mato shara huacoinnon. Isharacahuun,” ishon ato yoicahuun. <sup>6</sup>Asca nan pushu muran ica futsa isharacoincun naanfin “Diosin shara” huacoinnaquin nan man yoya cuscan. Asca man yoiai cuscan a pushu muran icafoan mato nicacasmaifocai Diosin ato ointi unimamatiroma.

Ascashu funcocani. Ascafia man ato yoiai cuscacairocofin Diosin matoqui unimaiquin. <sup>7</sup>Ascatan pushurasi muran nocoashu pushu fusti muransi oshacahuun. Nannoshon mato pimafain mato ayamanaiifoan acahuun. Diosinhunoashu yonomisifo nan yopaifo cuscan nan nicamisifoan ato inantirofo.

<sup>8</sup>Ascashu man pushurasi muran man nocoaiton mato ihui sharafain mato pimafain mato ayamanaiton acahuun.

<sup>9</sup>Nannoshon isinincaifo uhuunshon ato cayahuamacahuun. Ascashon ato yoicahuun isca huaquin, “Natian Diosin niaifoan ahuun yorafo iquinai cuscan chaimashtaran,” ishon ato yoicahuun.

<sup>10</sup>Ascan mato nicacasmaifoanno ato fai

ano fotacahuun nannoshon ato yoicahuun isca huaquin,<sup>11</sup> “Maton chaca nocohuun nuama. Matohuunfin nuaquin. Ascafaino Diosin maton Ifo ipairan,” ishon ato yoicahuun.<sup>12</sup> Un mato yoinon. Diosin Sodoma anoafó ato namaqui cuyoni. Ascan nan mato nicacasmaifofin ahuitiarian nan Sodoma anoafó ani finonmacaifain ato omitsisca huaquin finacoinschquin.

**Pushurasi anoafó yoitimacoinfo**  
Mt 11.20-24

<sup>13</sup> ¡Ohua! Man Corazín anoafó yafi Betsaida anoafóan man chipo fasi omitsiscai. Tsoan oinyomisima cuscara shara un mato ismafiano mancái chaca shatupaima. Ascan nan Tiro anoafó yafi Sidón anoafó un mato isma cuscan un ato ismaiton nanfoan ato chaca shatucuanafó. Ascashon yoicuanafó isca huaquin “¡Ohua! Non fasi chaca huamisi. Ascacun natian Diosiqui nasoshon non nicasharanoncahuun,” ishon yoicuanafó. <sup>14</sup> Ascafia Diosin nantifi icoinra huamafo onaintimaitian nan Tiro anoafó yafi Sidón anoafori onaintimafiaquicai mato onaintimaquin finacoinschquin.<sup>15</sup> Ascan man Capernaum anoafóan man shinanmun man nai muran Dios ari foicai. Ma. Omitsiscapanacafo muranrocon mato potai, —Jesús yoini.

<sup>16</sup> Asca huatan Jesús ahun tanamisifo afanan ato yoiquir isca huani, —Tsoan man yoiai cuscacoin mato nicaquifin nan uacoin nicai cafisca huaiquin. Ascan tsoan mato nicacasmaquifin uarifi nicacasmaiquin. Ascan tsoan ua nicacasmaquifin nan ua nichini uhuun Upán Diosiri nicacasmaiquin, —ishon Jesús ato yoini.

**Setenta y dos nocofunufo Jesús yonoa cuscan afanan naso furanifo**

<sup>17</sup> Ascano chipo nan setenta y dos ahun tanamisifo afanan aquí naso

furanifi fasi unimacoincanci fucashon yoinifo isca huaquin, —Ifon, yoshin chacafoanfin min anuhuunshon noco nicacointirofoquin. Ascacun yorafomaquinoa non mihuunshon potaran, —huaifoan.

<sup>18</sup> Jesús ato cumani, —Aifain. Dios icanoashu nan cana piishicai cafiscaí Satanás mai ano pacutanaiton un oian.

<sup>19</sup> Ascano un mato yonoainocai uhuunshon mato ahuaraton ahusca huatiroma. Rono paupan futan inapapiaton mato ahusca huanonma un mato cushutiro. Ascashon nan Satanás noco noicasmamisi uhuunshon man finoncointiro mato ahusca huanonma.

<sup>20</sup> Ascacun nan man yoshin chaca potahuunoashu unimayamacahuun Diosifin nai muranshon mato anu ahuun libro muran cunaquin man ahuun facufocun ato ismashquin. Nan shinainfin man unimatiroquin, —ishon Jesús ato yoini.

**Uqui fucahuun.**  
Un maton ointi unimamatiro  
Mt 11.25-27; 13.16-17

<sup>21</sup> Ascano ato yoiquir anaititan Diosin Yoshin Sharahuunoashu unimacoinquin Apa Dios yoiquin isca huani, —Upa Diosin, min fasi sharacoin. Nantifi nai murannoafó futan mai anoafóan aton Ifofin minquin. Ascano nan mapo sharayafo yafi cunu tapiafocai min tsain shara min ato tapimanama. Ascafia nan cunu tapisharafoma nan facu cuscarafoqui. Ascashon nanfoan un ato isma cuscan yafi un ato yoiai cuscan ua icoinra huafó. Nanfofin min ato tapimanakuin. Icon, Upán, minfin nanscará fuchipaiquin, —ishon apa yoini.

<sup>22</sup> Ascashon cufinquin anaititan Jesús nantifi yoini, —Uhuun Upa Diosin tapia

cuscan uarifi nantifi tapimani. Unfin Diospan facuquin. Diosin fustitofin ua onancoianquin. Nanscarifi aquin urus fusti Upa Diosin un onancoian. Nanscarifi huaquin urifi un futsafo Upa Diosihuunoa tapimanai cuscan nanfoanri Upa Dios tapitirofoquin, —ishon Jesús yoini.

<sup>23</sup> Ascashon ifiacucahuan ahuun tanamisifo fusti yoini, —Diosin matohuun noiquin ahuun yono mato isma. Ascacum mato shara huacoinna. <sup>24</sup> Man oiaín cuscan Diosin tsain yoimisifo futsafo futan niaifoanri oinpaifiaquicai oinpaonifoma. Man nicai cuscari nicapaifiacaquin tsoan nicapaonimaran, —ishon Jesús ato yoini.

**Samaritanon sharahuunshon  
Jesús ato ahuara futsa tapimani**

<sup>25</sup> Ascano nocofunu futsa Moisés cununi cuscan tapicoian Jesusqui oni yocayoi. Tapipaiquin Jesusmain cayacafi cumaiquin ishon. Ascashon yocani, —¿Tapimamisiton, unmun ahuuscatiroquin Dios fu ipashquin? —huaiton. <sup>26</sup> Jesús cumani, —¿Raquiri Moisés cununimun? —ishon yoiaiton. <sup>27</sup> Cumani, —“Nocon Ifo Dios nocon ointi muranshon fasi noifain, nocon nomuranshori fasi noifain, fasi curushcái Dios noifain nocon shinanfoyashori Dios noihuú. Ascatan nan mifiri min noiaí cuscan aquin mia chaima icafori noicoinhuun,” ishon Moisés cununiran, —huaiton. <sup>28</sup> Ascaton Jesús yoini, —Min ua cayacafi cumashara. Nanscacoín atahuun. Ascashufin min Dios fu ipatiroquin, —ishon yoini.

<sup>29-30</sup> Asca huaiton cumani, —¿Ascan tsoafomun ua chaima icafoquin afohuun un noiaí? —ishon yocani. Ascan nantocai atifihuun noinima. Ascacum Jesús a nocofunun shinain cuscan onanshon cumaquin isca huani, —Nocofunu

Jerusalén anoashu Jericó ano caiton. Yomutsofoan achicashon sahuuti shoriquin futsatan sutuquin futsacaquin nama cuanifo. Ascashon fai cusumun ratafaini yomutso ranan ichonifo. <sup>31</sup> Ascano ahuun cafohuunshon Dios cufimisi oquin oian fai cusumun racacun oinflaquin fai ocuma futsa caquin tanafainima.

<sup>32</sup> Ascano nocofunu futsa Levita arifi oquin oian racacun nantorifi ruhuiinfainni. <sup>33</sup> Ascaino nan fainri chipo Samaritanon oquin fuchitan ahuun ramapaitoshini. <sup>34</sup> Ascashu chipacopacahuatan ahuun yoratishon shuni ya cayati futsa osishon ahuun ratucuraquin futsatan. Ahuun ina camaqui ratainifoantán iyoshon pushu muranshon cushushoni. <sup>35</sup> Ascatan iyoconaino ahuun rafanan toro paratamacoin ahuun pui nua rafu inanni. Ascashon pushu ifo yoiquin isca huani, “Na nocofunu ua cushusharashohuun. Afanan oshon un mia rafuri inanyoshquinon. Min cushusharaiton finonmafaintam afanan oshon un mia pui inanyoshquinon,” huani.

<sup>36</sup> ¿Ascan rato nocofunu rafu non fusti caimun a chaima icafo cuscaracaquin a nocofunu omitsiscapishtai? —ishon yocaiton. <sup>37</sup> Nan Moisés tsain tapimamisiton cumani, —Ahuun ramapaiyaijin a chaima ica cuscaraquin, —ishon yoiaiton. Jesús yoini, —Caashon mirifi nanscarifi huatahuun, —ishon yoini.

**Marta futan María ahuun  
pushu ano Jesús ini**

<sup>38</sup> Ascatan Jesús cai pushurasi muran noconi. Nanno ainfoan ahuun anu Marta ica ini. Nanton ahuun pushu muran Jesús iquimasharani. <sup>39</sup> Ascano nan Marta chipocufin María iniquin. Nanton Jesús tsain yoiaiton nicashquin icashu Jesús naman tsatoshini nicasharashquin. <sup>40</sup> Ascafaitocai Marta

nicanima nan tushu huaisi shinanni Jesús pimashquin. Ascacun nan Martan Jesús yoini, —¿Ifon, mian shinainmamun? Urusu fusti un tushu huai. Uhuun chicocai u futan apaima. Ua yoishohuun u futan aquiyonon, —huaiton.<sup>41</sup>—Martashtan, minfin tushu fusti shinanquin. Ahuarao futsa huaquicai mian nicaima. Nan uhuun tsain sharafin María catoanquin. Ua nicaquin.<sup>42</sup>Uhuun tsain fusti shinanquin. Nan fusti yopaiquin. María ahun nomuruan uhuun tsain nanushon aquimashquimaran, —ishon Jesús yoini.

—Raquirimain non Upa Dios cufiqui huatiroquin, —ishon Jesús ato yosini  
Mt 6.9-15; 7.7-11

**11** <sup>1</sup>Ascano shafa futsa Apa cufiqui anaitiano afu rafua futsan yocani, —Ifon, raquirimun non Upa cufiqui huatiroquin. Noco tapimahuun. Juanpan afu rafuafo tapimani cuscan nocorifi tapimahuun, —ishon yoaition.<sup>2</sup>—Isca huacahuun, —ishon Jesús ato yosini,

“Nocon Upan nai murannoaton min fasi sharacoin.

Manifotiton aton niaifo iishquin mia ifoannonfo.

<sup>3</sup> Shafatiton nocon tushu non yopai cuscan noco inanhуun.

<sup>4</sup> Nan noco chaca huaifoan non ato rau huaa cuscan huafain nocon chacafori noco rau huashohuun, Upan.

Satanás yoshin chacapan noco chaca huamapaifiaiton nocoqui cumatima huahuu. Nansca huaquiquian,”

ishon Jesús ato yosini.

<sup>5</sup> Ascatan afanan ato yoiquin isca huani, —Manmun mato yorahua yamunacuahuaino mato ano nococun maton yora futsa yoa

yocashoquin isca huaquin,<sup>6</sup>“Ua yoa rafu non fusti inanpun. Un mia nasonon. Un natian yopaicai uhuun yorafo chaicunoashu uqui noocoano un ahuashta pimaimacain,” ishon yocaiton.

<sup>7</sup> ¿Ascaton cumaquimun isca huatiro, “Mun uhuun facufo ya iquia caincaitiri man fupoa. Asca ua fucash huayamahuu,” ishomun anori cumatiro?<sup>8</sup>Ma. Ascacai huatiroma. ¿Raquiri huatiromun? Un mato yoi. Ahuun yorahuaton inanyamai shafai fasi manariaiton inanyamacuatan inantiro. Funinaca huatan nan yoca cuscan inantiro.

<sup>9</sup>Afanan ahuara futsa un mato yoiai cuscan nicacahuun. Ahuara yopaquin Upa Dios yocacahuun mato ashonon. Man yocain cuscan funaquia manasharacahuun nan Diosin mato ashoaitian. Ascacun Upa Dios cufifafaincahuun man cufiai cuscan mato inanon.<sup>10</sup>Tsoan Upa Dios yocariai fiishquin. Ascan tsoan ahuara shara fasi fuchipaiyai cuscan Diosin ato fuchimatiro. Ascan tsoanri Upa Dios cufiriaiton ashoshquin.

<sup>11</sup> ¿Ascan maton facun mato shiman yocaiton man rono inantiromun? Ma. Mancait maton facuasca huatiroma.

<sup>12</sup> ¿Maton facuri mato tacara to yocaiton man inapapia inantiromun? Ma. Mancait maton facuasca huatiroma.<sup>13</sup> Ascacun tapicahuun. Man chaca huamisifashon maton facufo man inansharamisi. Man ascaiton finacaiya maton Upa Diosin nai murannoaton man yocai cuscan ahun Yoshin Shara mato inanshquin, —ishon Jesús yoini.

—Yoshin chaca ato niaifoan ahuun curushhuunshon Jesús yoshin chacafo potatiroran, —huanifo  
Mt 12.22-30; Mr 3.20-27

<sup>14</sup> Ascano yoshin chaca nocofunuuhun nuushon tsainmatiroma Jesusqui ocun.

Amaquinoa yoshin chaca potano  
tsaiinnaca huanaiton oincani  
mustairinifo. Ascashon atirifiton,  
—iAicho shararan! —huaifoanno.  
<sup>15</sup>Futsafoan yoinifo, —Satanás  
curushhuunshon Jesús yoshin chacaflo  
yorafomaquinoa potatiroran, —ishon.  
<sup>16</sup>Futsafoan Jesús yoiquin isca huani,  
—Dioshuunshon nai murannoia noco  
ahuara futsan ismahuu non mia icoinra  
huanon Diosin mia catoanquin,  
—huaifoan.

<sup>17</sup>Ascano nan shinainfo cuscan  
onanshon Jesús ato yoini, —Mani  
futsafo afi ranan rutunain cuyotirofo.  
Nanscarifiai pushu fusti muran icafori  
afi ranan chaca huatananfafaincany  
pashcanantirofo afanancay tsoa anosi  
itiroma. Ascashuricai afanan tsoa  
yorahuatanantirofoma. <sup>18</sup>Nanscarifiai  
Satanás niaifoan afu yoshin chacaflo  
potaquin ahuun yono chacana huatiro.  
Asca huaquin ahuun yono cuyocointiro  
afu yoshinfocai afanan afu itiroma. Un  
nannori yoia manmain yoiquin isca  
huayamacun, “Satanashuunshon yoshin  
chacaflo potaran,” ishon man uhuunoa  
yoia.

<sup>19</sup>Ascafia manfin uhuunoa  
yoimisiquin. “Satanás curushhuunshon  
yoshin chacaflo potaran,” ishon man  
yoimisi. ¿Un asca huaino tsonhuunshon  
mato yorafoanri yoshin chacaflo  
atomaquinoa potafomun? Ascacun  
nanfihuunshon man tapitiro man  
uhuunoa amaqiri shinanchacai cuscan.

<sup>20</sup>Ascafia Diospan Yoshin  
Sharahuunshon un yoshin chacaflo  
atomaquinoa potaiton man tapitiro  
maton Numamisi Diosin catonni man  
matoqui nocoa. <sup>21</sup>Ascan nocofunu  
mutsisipacoinin tucuti yashon ahuun  
pushu cushuanocai tsoan ahuun  
ahuashta muntiroma. <sup>22</sup>Ascafia nan  
finoncaia fasi mutsisipacoin aqui

nocoshon achifain ahuun cunoti  
mufishon ahuun ahuarao  
cuyonfiaitocai ahuusca huatiroma.  
Ascashu ahuun ahuarao pashcanain  
futsutirofo.

<sup>23</sup>Tsoa ufu rafucasmaquifin uhuun  
tsain nicacasmacaniquin. Nanfoan  
futsafo ua icoindra huamapaicanima.  
Ascaquifin Diosimaqui ato imacaniquin.

**Yoshin chaca yoraqui afanan nasotiro**  
*Mt 12.43-45*

<sup>24</sup>Yoshin chaca nocofunumaquinoashu  
cai tsoa istaipama ano cani shara futsa  
funai cai anoshon tunushquin. Ascafia  
fuchiamacaiqui yoshin chacanun afanan  
shinanqui isca huani, “Unfin nan  
nocofunuhiun ipaoniquin. Ascacun un  
afanan aqui nasoiran,” ishon shinanni.

<sup>25</sup>Aqui nocoshon oian tsoa futsacai afu  
rafua inima. Nan pushu matsomua  
shara ointsa. <sup>26</sup>Ascacun nan yoshin  
chacanun afu yoshin chacaflo siete ato  
ihuuni nan fasi chaca finacaiafo.

Ascashon ato yoiqui isca huani,  
“Nocofunun un mato ismaicai non  
ahuun nuifonon,” ishon ato yoini.

Ascatan aqui foshon iquinaifoanno nan  
nocofunu fasi mimacai chacacoin ini.  
Manmain aqui rananri focun, —ishon  
Jesús ato yoini. —Asca huaifoanno nan  
nocofunu afanan finacaipacucahuani.  
Mimacai fasi omitsiscay finacoincun,  
—ishon Jesús ato yoini.

**Nicafo cuscan unimacoincani**

<sup>27</sup>Ascaiton ato yoiaino ainfoan nan  
yorahuanrasí muranshon oi ashcafainin  
Jesús yoiqui isca huani, —Min uhua  
mia cainshon mia shoma amani.  
Ascacun min uhuaquimun Upa Diosin  
unimasharapainon, —ishon yoini.

<sup>28</sup>Ascatan Jesús cumani, —Ai, nan  
min yoiai cuscan iconfiashu tsoan  
Diosin tsain nan nica cuscacoin Diosin

nan unimamatiro finacoian, —ishon cumani.

**—Tsoan atiroma cuscan noco ismahuu non mia icoinra huanon, —ishon yoinifo**

*Mt 12.38-42; Mr 8.12*

<sup>29</sup>Ascatan fasi paratama yorahuanrasí Jesusqui fuaifoan. Ascaiton ato yoini, —Natian niafo fasi chacacoinfo. Ascashon ua yoimisifo isca huacaquin, “Tsoan atiroma cuscan noco ismahuu min Dios ariashu oa non mia icoinra huanon,” ishon ua yoimisifo. Ascafia nan Diosin tsain yoimisi Jonás ani cuscacoin un chipo mato ismaiton nan fusti man oinshquin. <sup>30</sup>Ascan Jonás tsainhuunshon Nínive anoafaoan Dios icoinra huanifo cuscan nanscarifi huaquin natian niafo un mato yoi marifi man icoinra huanon.

<sup>31</sup>Ascashon Diosin nantifi yorafo ichanan huaitian ato yoipacushquin ratofomain afu ipatiro iyamarai omitsiscapanacafó muran foshcaniquin. Nantianri nan ainfo Sabafoan ato niaifo ipaoniton matohuunoa yoiquin isca huashquin, “Salomón tapicoian cuscacai tsoa futsan tapipaonifoma. Ascacun ahuun tsain nicapaicoin un aqui chaicunoashu cani cuscan mancái nan Diospan Fururi asca huapaipaonima. Ascatamarocon man nicacasmaapaoniran,” ishon matohuunoa yoishquin. Nan icon Salomón tapicoian ipaonifia uncaifin fasi Salomón finoncoinfacun mancái ua nicapaima.

<sup>32</sup>Nanscarifi huaquin Diosin nantifi yorafo ichanan huaitian ato yoi pacushquin ratofomain afu ipatiro iyamarai omitsiscapanacafó muran foshcaniquin. Nantian Nínive ano ipaonifoan matohuunoa yoishcani isca huaquin, “Jonás noco Diosin tsain yoiai cuscan nicacoinshon non nocon chaca shatucoinfain non Dios icoinra huanon.

Asca man manfin Diospan furucoin nicaflashocai maton chaca man shatupainimaran,” ishon mato yoishcani. Nan icon un Jonás finonfiacucai man ua nicapaimisima.

**Nocon ointi sharaquin non shinansharatiro**  
*Mt 5.15; 6.22-23*

<sup>33</sup>Asca huatan afanan ato yoiquin isca huani, Tsoancai lamparinaihuashon otayamafain paninaranunri fupoima. Asca huatamarocon shafacafi tsaoi nan iquiaifoan oinsharanonfo.

<sup>34</sup>Nanscarifiai nocon furo rafu noco cayan lamparina cuscara. Nan rafu sharano non oinsharatiro. Ascashon nocon caya cushusharatiro non ahuuuscanonma. Nanscarifiai mato nomuranshon man shinansharai man isharacointiro. Ascafia maton furo chakanocai man oinsharatiroma.

Ascashu nan faquish muran ica shinantsain. Nanscarifiai maton nomuranshon man shinanchacaicain man isharatiroma. Man funocointiro.

<sup>35</sup>Ascacun oinfain. Tapicahuun mato nomuranshon man shinansharai cuscan chaca shinantama. <sup>36</sup>Ascashu shafacafi man icafin nan chashamatinin mato chashama cuscaraquin. Nanscara ano man icacai faquish itiroma. Nanscarifiai maton nomuranshon man Dioshuunoa fusti shinansharaino man ahuara chaca shinantiromaran, —ishon Jesús ato yoini.

**—Manfin chacafoquin, —Fariseofo yafi Moisés cunu tapimamisifo Jesús ato yoini**  
*Mt 23.1-36; Mr 12.38-40; Lc 20.45-47*

<sup>37</sup>Ato yoiqui anaitiano Fariseonun Jesús yoimani pimashquin. Ascano ahuun pushu muran oashu tsaoni. Ascaino pishcaquin Fariseofo ato shunifoan ato tapimani cuscan ahuun

mucu chocayoni. Asca Jesuscái Fariseo imisifo cuscan anima.<sup>38</sup> Ascaiton oinquin Fariseon ahuun nomuran shinanni, —¡Ajaa! Nocon shunifoano noco tapimani cuscacai Jesús aimaran, —ishon shinanni.

<sup>39</sup> Ascaiton Jesús ahuun nomuran onanshon yoiqui isca huani, —Ua nicahuu. Man Fariseofoancai maton mucu chocafiaquicai man maton nomuran ahuara shara shinainma. Yora futsafohuunoa shinantama. Man ahuara futsa futsa tapasi noicoin. Maton nomuran chaca futsa futsatapafó fospicoianran, —ishon ato yoini.

<sup>40</sup> —Manfin fasi amaquiri shinanmisiquin. ¿Man tapiamamun tsoan noco caya fumancayan onihuafain noco nomuranri onihua?<sup>41</sup> Ascacun ahuuomafohuun ramapaicain ato inansharacahuun. Man ascaiton tapitirofo Diosin maton chaca mato soashotiro man sharacoin inon. Ascashu man shinain cuscan shara fustisi iishquin.

<sup>42</sup> ¡Ohuashta! Fariseofoan mato Diosifin onaintimashquiquin. Mato fanafo atirifi man Dios inanmisi. Man asca huafiaquicai man futsafo shara huamisima. Ascaquifin man Diosiri noicoianmaquin. Man mato fanafo atirifi Dios inanmisi cuscan sharafia futsafo shara huafain Diosiri noicoinecahuun.

<sup>43</sup> ¡Ohuá! Fariseofoan Diosin mato onaintimai. Ichananti pushu muran iquitan shafacafi man tsaofafaini mato oinquin, “Sharacoinforan,” mato huanonfo. Yorafoan mato finonfoancaquin, “Noco tapimamisiton,” mato huaifoanno man unimanon.

<sup>44</sup> ¡Ohuá! Ascafia Diosin mato onaintimai. Manfin naan yora naa cuscarafoquin. Yora mai huafo manaon cahuaqui futsafoan tapishoma

puamafoantirofo. Nanscarifiai yorafo matoqui nocoflashocai tapiafoma maton nomuran man chacacoinfiacun, —ishon Jesús Fariseofo yoini.

<sup>45</sup> Ascaiton nicacaquin Moisés cununi cuscan tapimamisi futsan cumani, —Tapimamisiton, min anori yoiquifin nocori min roaiquin, —huaiton.

<sup>46</sup> Jesús cumani, —¡Ohua! Moisés cununi cuscan tapimamisifoan matori Diosin onaintimai. Man maton caifo yoiqui isca huamisi, “Moisés cununi cuscan nantifi huacahuun. Fustishta finonmayamacahuun,” ishon man ato yonofiashucai marifi man ascacoinyama. Ascatamarocon Moisés yononi cuscan finonmafain man ato huama. Ascano apaifiaquicai tsoan atiroma. Ascafiaifoancai maton mucuman ahuashta ato futan man huapaiyama. Ascashu aton nomuran omitsiscaciafoancai man atohuun ramapaiyama.

<sup>47</sup> ¡Ohua! Diosin mato onaintimacoin. Man mato shunifo nan Diosin tsain yoimisifo maiafo ano man ahuara toquiri onihuamisi ato shinanshquin. Man asca huafia mato shunifoan ato rutupaonifo.<sup>48</sup> Mato shunifo Diosin tsain yoimisifo rutunifo. Man amisi cuscan huaquin man yorafo ismai nan maton shunifoan apaonifo cuscan huaquin marifi atofu niyoshon man asca huacuana. Ascashufin marifi man rutumitsamisi cuscaraquin. Diosin tsain yoimisifo maton shunifoan rutunifo. Ascacun maiafo ano man toquiri onanti huaquin fufoa.<sup>49</sup> Ascacun Diosin onancoinshon matohuunoa yoiqui isca huani, “Uhuun tsain yoimisifo yafi uhuun facu fu rafuafó ato yoisharanonfo un ato nichishqui. Ascafia atirifi ato rutufain atirifi ato omitsisca huashcaniran,” ishon Diosin matohuunoa yoini.

<sup>50-51</sup> Ascan nan icon un mato yoi. Nantifi Diosin tsain yoimisifo ato rutupaonifo nan Diosin ato onihuaqui tau huanitian yafi natian. Ascacun atohuunshon Diosin matoqui nutashquin. Nan Abel rutuqui tau huafain ahuun unutaqui Zacarías nan Dios fu tsainti pushu muranshon cufiti chaimashon man rutunifo. Ascashon nantifi Diospan yorafo chaca huapaonifo cuscan natian man niyoano matoqui nutashon mato omitsisca huaqui finacoinschqui.

<sup>52</sup> ¡Ohua! Moisés yononi cuscan tapimamisifoan Diosin tsain cununi cuscan onui cafisca man huaa futsafoanri tapisharanonfoma. Mancaí Diospan tsain icoinra huacoinnاما. Ascashon futsafoanri tapipaifaiton man ato shutia icoinra huanonfoma. Ascacufin Diosin fasi mato onaintimaquin finacoinsquin, —ishon Jesús ato yoini.

<sup>53-54</sup> Nicacanashu Fariseofo yafi Moisés cunu tapimamisifori fasi aqui sinacoincaquin aqui tsain chipunifo. Fasi ichapafain yocanifo. Ahuarashta amaquiri ato cumaiton nicapaicaquin. Amaquiri ato yoitanaino niaifofoquin chanipaicaquin Jesús cunu muran iquimanonfo.

—Fuparamitsapaimisi iyamacahuun,  
—Jesús ato yosini

**12** <sup>1</sup> Ascaino yorahuanrasi aqui fucani yurui furanifo. Ascaifoan Jesús afu rafuaflo yoiqui isca huani, —Oinfain. Fariseofoan, “Sharaforan,” mato huamapaicani. Sharafomafinquin. Sharaflo shafain man ica sharafoyamafiacun. Nanfo fuparamitsamisifo. Ascacun ato cuscara iyamacahuun. <sup>2</sup> Ascafia ahuarashta onupafiamisifo nantifi Diosin ato puashoshquin. Ahuarari fomanpaimisifo

nanfori ato puashoshquin. <sup>3</sup> Futsafo fomanfain arusu fusti shinanfiamisifo nanfori Diosin ato puashoshquin. Cunu muranshon onushta yoifiafo nanfori ato puashoshquin nantifain tapinonfo.

### Tsoquimain man ratutiroquin *Mt 10.26-31*

<sup>4</sup> Uhuun yorafoan un mato yoi. Mato rutupaiyaoanno ratuyamacahuun. Mato caya fusti rutucaniquin. Asca maton yoshinfocai tsoan ahuusca huatiroma. <sup>5</sup> Ascacun atoqui ratuquimarocon Diosiqui ratucahuun. Nantofi mato rutufain maton yoshinfori omitsiscapanacafó muran potatiroquin. Nanno chi urumanhuan matsinacama. Naan icon un mato yoi. Dios fustiquifin man ratutiroquin. <sup>6</sup> Ascano tsitsipio mucu fustiti inanmitsashonraca toro rafu fitirofo. Ascafia Diosicai fustishtahuun ointiaquimanima. <sup>7</sup> Nan icon un mato yoi. Diosin nantifi tapicoian. Mato foori man tanan huani. Ascasho Upa Diosin tsitsipiofo shinanmisi cuscan fasi mimacaia matohuunoa shinanfafaini. Ascacun ratuyamacahuun. Matocaifin tsitsipio aca finonmacaifain Diosin matohuun noiquin.

### Tsoan yorafoan ointaifi, —Jesús uhuun Iforan, —huua *Mt 10.19-20, 32-33*

<sup>8</sup> Ascano tsoan yorafoan ointaifi, “Jesús uhuun iforan,” ishon ato yoiafin uhuun Upa Diosin ahuun oinmatifioan afu nai muran icafoan ointaifi, “Naanfin uhuun yoraquin,” ishon un yoishquin. <sup>9</sup> Asca tsoa yorafoan ointaifi, “Jesús uhuun ifomaran,” ishon yoia nantocai ua icoinra huamisima. Nanscarifi huaquin Diospan oinmati afu nai muran icafo ointaifi, “Naancai uhuun yoramaran” un yoishquin. <sup>10</sup> Tsoan ua

chaca huafin Upa Diosin rau huashotiroquin. Asca tsoan Diospan Yoshin Sharaqui tsain chaca huacai rauhuanacama. Aton chaca atohuun nuupacunaca.

<sup>11</sup>Ascano ichananti pushu muran mato iyocashon niaifoan ahuun ointaifi raquirira mato huafiaifo shinanchacayamacahuun. <sup>12</sup>Nantianfin Diosin ahuun Yoshin Sharapan mato shinamatatanaino mato tsain chaca huaifo Diospan Yoshin Sharahuunshon man ato cumasharanon, —ishon Jesús ato yoini.

#### **Yora mafo ichapaya musucoinquin**

<sup>13</sup>Nannoia nia futsan Jesús yoini, —Tapimamisiton, uhuun yora ua yoishohuun nocon upan nocu inan cuscan uari pashcashonon, —huaiton.

<sup>14</sup>Jesús cumani, —Uhuun yoran. Uncai tsoa yoimisima futsa pashcashonon. Tsoanricai ua catoanma un ato pashcanan huanon, —ishon yoitan.

<sup>15</sup>Afanan ato yoiqui isca huani, —Ua nicacahuun. Matonama fuchipaiyamacahuun. Ahuara ayafashon afanan finonmafain fipairiyamacahuun. Mafo ichapayahuunoashucui non unimatiroma. Nocon mafocai nocon ointi unimamatiroma. Nocon mafohuunoashucui non isharatiromaran, —ishon ato yoini. <sup>16</sup>Ascashon nocofunun ichapayahuunshon Jesús ato ahuara yosini isca huani, —Nocofunu futsa mafo ichapaya ahuun mau ano ahuun yono sharafori ichapaya ini.

<sup>17</sup>Ascacun nan nocofunu mafo ichapayaton shinanqui isca huani, “¿Umun thuu yonofo ahuusca huaiquin? Uhuun tasha pushufo murancai uhuun yonofo icoinama. <sup>18</sup>Ascacun uhuun tasha pushufo

pucashon un afanan uhuapacoin huai. A muran uhuun yonofo yafi uhuun mafofo icoinon. <sup>19</sup>Uhuun nomuran un shinanqui isca huaa, ‘Uhuun ahuara ichapa iquisi mucushon chipo un tunusharafain ayafain aqui pifain monocain un unimasharacoinmiran,’ ishon ahuun nomuran shinanni.

<sup>20</sup>Ascashon anori shinanfiaiton Diosin yoini, “Mincai ahua tapiama. Na yamutafin min naicain. ¿Min naanomun na min mucuafu ahuuscaquin?”

<sup>21</sup>Nanscafín yora ahuara ichapayashon Diosin shinantama imisishaquin. Naashucái afanan ahuaya iquima. Nan ahuuoma cuscara iishquin, —huani.

#### **Diosin ahuun facufo cushushara**

*Mt 6.25-34*

<sup>22</sup>Ascaino Jesús afu rafumisifo yoiquin isca huani, —Afanan un mato yoisharanon. Ua nicasharacahuun. Isca huaqui shinanyamacahuun, “Non ahua pimara,” ishon shinanchacayamacahuun. Ahuaricai non sahuuimaran iyamacahuun. <sup>23</sup>Non ahuara pifain non sahuuatocai nocu imasharatiroma. <sup>24</sup>Shinancapon. Nan puiyafoancai ahua fanayamafain ahua chitunmisifoma ahuaricai fotosuyamafain ahuamafofiacun Diosin ato pimamisi. Nanscarifi aquin Diosin matohuun noiquin nan puiyafo aca finonmafain mato cushushara. <sup>25</sup>Ascacun shinanchacayamacahuun. ¿Non shinanchacatocai shafa fusti nocu nimayotironun? <sup>26</sup>Asca shinanchacahuunshoncái ahuaton nocu nimayotironma. Asca ahuara futsari shinanchacahuunshon nocu imatiroma. Asca ahua shinanchacayamacahuun.

<sup>27</sup>Ascashon shinanquiri isca huayamacahuun, “¡Ohushta! Raniamun un sahuuti finanti sahuushqui,” ishon

shinanyamacahuun. ¡Shinancapon! Salomón sahuuti sharashtacoin sahuufiapaonかい nan charo sharashtacoinfo cuscarama. Charofoancai yonoyamafain sahuuti icushuima.<sup>28</sup> Diosin charo sharashatacointo onihua. Foaisharafia supashon samamashta tsasicun coatirofo. Nanfo finonmacaifain mato noiquin mato sahuuti sahuumashquin. Ascafia mancai icoirna huasharacoinnاما.

<sup>29</sup> Ascacun shinanquin isca huayamacahuun, “¡Ohuashta! Unmun ahua piishquin uhuun tushuyamaino. Unricai ahua sahuuimaran,” ishon shinanchacayamacahuun.<sup>30</sup> Ascan nannori nan icoirna huamafoan shinanchacamisifo. Ahuara pifain sahuupaiyaito fustisi shinanmisifo. Ascan maton Upa Diosifin tapiaquin man yopai cuscan. Ascacun mato inanshquin.<sup>31</sup> Ascacun Diosicairocon shinancahuun. Mato yonomapaiyai cuscan nan fusti shinanfafaicahuun. A cuscara shara ipaicahuun. Nancai shinanquin tau huafafainaicahuun. Man ascaiton ahuara futsa man yopai cuscan Upa Diosin mato inanshquin.

**Diosin icarishon ahuara  
sharacoinfo noco mucushotiro**

*Mt 6.19-20*

<sup>32</sup> Ascano uhuun yorafoan ratuyamacahuun. Maton Upa Diosin mato cushushara. Nantifi ahuuna matori inain. Unimacai mato inanshquin.<sup>33</sup> Maton mafo inanmitsacahuun ahuun rafanan pui fishon yora ahuuomafo inanshcaquin. Man ascaiton Diosin nan icanoshon mato ahuara sharacoinfo mucushoni. Nanfocai cuyopacunacama. Coroisin nanfo piquin chacana huayamainocai yomutsori ano iquitiroma ahuara mato fianshquin.<sup>34</sup> Asca man mafo fusti shinanfafaicuin ifin nan fusti man noicain. Ascan man

Dioshuunoa fustisi shinanfafaicuin nanrifi man yonoshosharafaintiro ahuun noicoinquin. Ascashu man afu isharapacupaitiro.

**Iquisi itisharacahuun**

<sup>35</sup> Ascacun itisharacahuun. Un mato anoashu un chipo nai muran caquin. Ascafiahu ratoran shafatan iyamarai yamu un matoqui afanan nasoshquin. Yamu yora futsa nocaiton manaquin lamparina otatiro itisharashon. Asca nanscarifiai itisharacahuun.

<sup>36</sup> Oinmatifoan aton ifo fusititan mai futsa ari cano futsafoan a pushu anoshon manasharatirofo. Ascano ifoan nocoshon ato cunaiton yoitirofo, “¡Aicho! Iquiyohuu,” huatirofo.

<sup>37</sup> Ascaino Ifoan nocoshon oian ahuun oinmatifo itisharafoanno unimacointiro. Nanforifi a unimatirofo. Ascan un mato icon yoi, Nan ifoan atoqui nocoshon ato pimaquin yoiqui isca huai, “¡Aicho! Fucahuun. Un mato pimapaiquin,” ishon ato yoitiro.

<sup>38</sup> Ascashu man rama osha pacuaino iyamarai yamunacucahanaino iyamarai shafa matisi matsicaino ifo nocaiton oin ahuun oinmatifo itisharashu fasi aqui unimacointirofo.<sup>39</sup> Ua nicasharacahuun tapishcaquin. Pushu ifoan iquisi itisharashon yomutso yamu ahuuscaraino ahuun pushu muran iquiae tapishcoci iquimatiroma.<sup>40</sup> Nanscarifiai marifi itisharacahuun. “Iscaino nocon ifo oimaran,” ishon shinanyamacahuun. Ahuuscarai atanaino un matoqui nocoriscaquin, —ishon Jesús ato yoini.

**Oinmati rafu futsa ifoan yonoai cuscacoin  
aino futsa nan yonoai cuscacoin aimai**

*Mt 24.45-51*

<sup>41</sup> Ascaiton Pedronun yocani, —¿Ifon, min ahuarao yoiái cuscan noco fusti min tapimapai iyamaraimun nantifi

yorafori min tapimapaiquin? —ishon yocaiton.

<sup>42</sup>Jesús cumani, —Man tapinon un mato yoi ahuu cuscaramain oinmati shara itiroquin.

Niaifocoин mai futsa ari caquin niaifo patasharinoaton yoitiro isca huaquin, “Uhuun oinmati futsafo ato tushu shafatifi inanhuan. Nanticoin rafu aton pashcanan huahuun,” huafaini catiro. <sup>43</sup>Ascatan niaifocoин afanan nocoshon oinquin ahuun niaifo patasharinoa nan yoia cuscacoин aano fasi aqui unimacointiro. Ascashon nan shara huacointirori.

<sup>44</sup>Ascacun un mato icon yoi. Nan niaifoan ahuun oinmati yoi, “iAicho! Natian nantifi uhuunafo min ua cushusharashotiroran,” ishon yoitiro.

<sup>45</sup>Ascafia nan niaifo patashari chacapan ahuun nomuran shinanqui isca huatiro, “Uhuun niaifo funa nasoimaran,” ishon shinanquin oinmatifo futsafo nocofunufo yafi ainfofori ato chaca huaqui futsani. Ascashu shafatifi pauncain monoi. <sup>46</sup>Ascaino ahuun niaifocoин samamashta nocoriscatiro. Nan oinmati chaca itisharamano ahuun niaifo nocoshon a onaintimai. Ascashon niaifoan oinmati futsafo yonoqui isca huai, “Nan oinmati chaca icoinra huamafoanno potacahuun omitsiscapashanon,” ishon yoishqui.

<sup>47</sup>Ascan nan oinmati ahuun niaifoan yoia cuscan man tapifashu ascayamacai itisharayamacun ahuun niaifoan nocoshon a fasi curushcain coshaquin futsai. <sup>48</sup>Asca nan oinmati futsa ahuun niaifoan yoia cuscan tapishoma chaca huacun nan icoquin ahuun niaifoan ichapama coshashquin. Nanscarifiai tsoa Diosin ichapa tapimana aqui nococun yocaqui isca huai, “¿Un mia ichapa tapimana cuscan man mian nanscacoin aamun? ¿Ascashon futsafori un mia yoia

cuscacoин min huashoamun?” ishon yocashquin. Ascacoин huaiyamashu funotiro.

**Yorafoancai Jesushuunoa  
nannorisi shinantirofoma**  
*Mt 10.34-36*

<sup>49</sup>Un nantifi manifotifi chaca shatumaní yoi un oa. Atirififoan ua icoinra huaifoanno futsafoan ua icoinra huacanima. Nan icoinra huamafo Diosin ato onaintimai. Uhuun Upa Diosin ua mai ano yonomai cuscan natian cuyoа shara icuana. <sup>50</sup>Ascafia cuun matohuunoashu naashqui un oni. Un nataima iquisi un omitsiscacoинshquin. Ascashu u omitsiscacaini naashquin.

<sup>51</sup>Ascan man shinanmun nantifi manifotifi anoafu uhuunoashu unimanfonu un oni. Ma. Ascaramafiqui. Un mato yoiai cuscacai tsoan nannorifosi shinancanima. Asca nan ua icoinra huafoan sharafosi shinainfoanno nan ua icoinra huamafoan ahuara chaca futsafosi shinancami.

<sup>52</sup>Ascashu pushu fusti muran mucu fustiti icafoan rafutasi ua icoinra huaifoannoai nannorisi atirifiton tsoan shinantiroma. Nanscarifiai rafutan iyamarai rafu non fustifain ua icoinra huaifoannoai nannorifosi atirifiton tsoan shinantiroma. <sup>53</sup>Apa ua icoinra huaino furumun ua icoinra huashma apaqui sinatiro. Ahuan ua icoinra huaino ainfacu ua icoinra huashma ahuaqui sinatiro. Ahuun yayan ua icoinra huaino ahuun raru ua icoinra huashma ahuun yayaqui sinatiroran, —ishon Jesúс afu rafuafu yoini.

**Nai foisquin non tapitirohuunoa**  
*Mt 16.1-4; Mr 8.11-13*

<sup>54</sup>Ascaino nannorisi yorahuanrasi mapoafaoan afanan ato yoiquin isca huani, —Fari iquiai anori nai

choshtacoin foancuaiton oinquin, "Oi fuiran," man huano. Oi futiro.  
<sup>55</sup>Ascasho manri yoimisi, "Fuu fari cai istafari fasi shana iiishquiran," man huamisi. Ascan nan icon fasi shanacoin itiro. <sup>56</sup>Ascafia mancái man yoia cuscacoin amisima. Nai foisquin man tapitiro oi fui iyamaraimain fumacai. Ascafia mancái Diosin mato yoia cuscan icoínra huapaima. Natian ahuara ahuuscarai cuscacai man tapiama.

**Tsoan mia chaca huamapaiyai  
shara huarisca huahuu**

*Mt 5.25-26*

<sup>57</sup>¿Ahuuscaín mafiri man cayacafi shinansharaimamun? <sup>58</sup>Tsoara futsan mato yoiqui isca huai, "Min ua chaca huua cuscan. Un miqui niaifo yoicairan," ishon mia yoicun. Niaifo ari cataima rufoco shara huacahuun. Manasca huayamacun niaifoan mato cunu muran iquimatiro. <sup>59</sup>Mato iquimanancocai man cainritiroma nifian cuscan nantifi inanshu man caintiro. Nanscarifiai man Dios chaca huamisiquin. Oataima iquisi mato yoia cuscan acahuun mato omitsiscahuansonma, —ishon Jesús yoini.

**Nocon chaca shatushon Jesús noco  
amapaiyai cuscan fusti non yopacoin**

**13** <sup>1</sup>Nantianri futsafo Jesusqui fucashon yoiqui isca huafó, —¿Tapimamisiton, man min tapiamun Pilatonun Galilea anoafo rafu rutua? Ascashon Dios fu tsainti pushu muran aton imi yafi inafoan ahuun imi osia Dios cufiti camaqui huaran, —ishon yoiaifoan. <sup>2</sup>Jesús ato cumani, —¿Man shinamun nan Galilea anoa rafutan chaca huaqui fina ahuun caifofoan acama cuscan huaquin? <sup>3</sup>Ma. Ascaramafinquin. Marifi maton chaca

shatutama nan man shinanpaoni cuscasi shinanriaqui Dios icoínra huashuma marifi man omitsiscapanaca.

<sup>4</sup>Man shinanrimun nan dieciocho yorafoqui pushu cuyacoin ahuun anu Siloé atoqui paoinquin atoti rutuni. Nanfoanmun fasi chaca huaquin finacaimisifo nan Jerusalén anoafoan acama cuscan finonmafain. <sup>5</sup>Ma. Ascaramafinquin. Marifi maton chaca shatutama nan man shinanpaoni cuscasi shinanriaqui Dios icoínra huashuma marifi man omitsiscapanacaran, —ishon Jesús ato yoini.

**Huiguera fana fimiomahuunoa  
Jesús ato yoini**

<sup>6</sup>Ascashon ahuara futsahuunoa ato yoiquin ato tapimanon isca huani, —Nocofunun ahuun mau mamaqui fimi fanani ahuun anu huiguera. Ascan chipo fimiimitian fii capaquin oian fimiama ini. <sup>7</sup>Ascacun nan mau ifoan ahuun mau cushumisi yoini, "Rafu non fusti fari na huiguera fimiataima. Un ahuun fimi fipaifiaino fimiama. Ascan natian rurahuu. Non ahuara futsa nanno fananon," ishon yoiaiton. <sup>8</sup>Nan mau cushumisiton yoini, "Ifon un afanan mana futsayononhuun. Afanan na fari fusti non manayonon. Un natian cushusharafain ahuun tapo ano un ahuara futsafo huayonon fimisharanon. <sup>9</sup>Nan un asca huainomain fimi qui non oinon. Ipaishoma na fari anaitiano man fimi ya shara itiroquin. Ascan fimiymaiton min ua ruramatiroran," ishon mau cushumisiton yoiniran, —Jesús ato yoini

**Jesús tunutitian ainfo putoco caya huani**

<sup>10</sup>Ascano chipo Israelifoan ichananti pushu muranshon tunutitian ato Diosin tsain yoini. <sup>11</sup>Ascashon ato yoiaino nannori ainfo putoco dieciocho fari

isinintiani atofu nanno ini. Yoshin  
chacanun nan ainfo nansca huua.  
Cayacaficai nimisima. <sup>12</sup>Nanno  
fuchishon Jesús yoini, —Ainfoshtan,  
natianfin min cayaiquin, —ishon yoitan.  
<sup>13</sup>Ahuun mucuman manmainno  
samamashta cayacafi ninacahuani.  
Ascatan, —iAicho! Diosin ua  
cayahuauquin. Dios fasi shararan,  
—ainfoan huani.

<sup>14</sup>Ascafaino ichananti pushu  
murannoia niaifo fasi sinaquin ato yoini,  
—Seis shafatán non yonotiro. Ascan na  
shafata tunutitiancái tsoa cayayotiroma.  
Cayapai shafa futsan otiro cayashquin,  
—ishon ato yoini.

<sup>15</sup>Ascaiton nocon Ifo Jesús a  
cumaquin isca huani, —Manfin  
fuparamitsamisifoquin ¿Asca manmun  
tunutitianfiacun maton moi iyamarai  
burro man tuputiro unu ano iyoquin  
ayanonfo? <sup>16</sup>Ascano na ainfofin nocon  
caifoquin. Abraham ahuun funa.  
Satanashuunoashu dieciocho fari  
putocoa. Cayacafi niisharamisima.  
¿Asca ahuuuscaimun un tunutitian na  
ainfo cayahuatiromaquin? —ishon Jesús  
yoiaiton. <sup>17</sup>Nicacani Jesús noicasmaifo  
fasi rafipacaquin tsoan cumanima.  
Jesús ahuara sharafo huaiton oincani  
atirifo aqui unimacoinnifo.

#### Mostaza ushuhuunoa Jesús ato yoini

Mt 13.31-32; Mr 4.30-32

<sup>18</sup>Ascaifoan Jesús ato yocani, —¿Ahuu  
cuscaramun Diosin ahuun yorafo nantifi  
ato iquifain ato yonotiroquin? ¿Ascan  
ahua futsarimain Diosin ahuun yorafo  
cuscaraquin? Un mato tapimai.  
<sup>19</sup>Nocofunun ahuun pushu umainti  
mostaza ushu fanani. Asca foica ihui  
tio ica. Puiyafó ahuun tushpahuu  
tsaoafo. Nanscarifiai Diosin ahuun  
yorafo tauí fustirasi ifiashu chipo  
paratama caitioran, —ishon ato yoini.

#### Misi farashatihuunoa Jesús ato ahuara futsa yosini

Mt 13.33

<sup>20</sup>Afanan Jesús ato yocaquin, —¿Ahua  
futsamun Diosin nantifi iquina  
cuscaraquein? Un mato tapimai. <sup>21</sup>Diosin  
ahuun yorafo nantifi ato iquifain ato  
yonotiro cuscan un mato tapimai.  
Ainfoan farashati ichapamashaya  
harina osishon camisconano  
farashuinitiro. Nanscarifiai Diospan  
yorafo taucani fustirasi ifiashu  
paratama itirofo. Ascashu icoinra  
huamafo muran ishon ato shara huaino  
atirifiton ahuunshori icoinra  
huatiroforan, —ishon Jesús ato yoini.

#### Caincaiti atsoshtahuunoa Jesús ahuara futsa ato yosini

Mt 7.13-14, 21-23

<sup>22</sup>Ascashon Jesús pushurasiti ano  
yoifoni Jerusalén ano nocopaiquin.  
<sup>23</sup>Ascaiton futsan yocani, —¿Ifon,  
fustirasitomun aton chaca soacaniquin  
Upa Dios fu nipashcaquin? —ishon  
yocani.

<sup>24</sup>Ascaiton Jesús ato cumaquin isca  
huani, —Uhuun Upa icanocai atirifi  
iquitirofoma. Ascacun nan un mato yoiá  
cuscacoin nantifi huacahuun. Nan fai  
atsoshta tanashcaquin. Ascashon marifi  
Diosin tsain tanasharacoincahuun  
iquisharashcaquin. Yora ichapafó  
iquipaificanacai iquitirosfoma. <sup>25</sup>Nan  
pushu Ifo Diosin ahuun cunu fupoti  
fupoanocai tsoashta afanan iquitiroma.  
Ascacun chifi nishon yoiqui isca  
huatirofo, “Ifon, noco cunu fupushohuun.  
Min icano non canon,” huariacani.  
Tuyuyun ifiaifoancai ato fupushotiroma.  
Fuputama ato yoiqui isca huatiro,  
“Mancaí uhuun yorafoma,” ato huafaino.

<sup>26</sup>Yoicaquin “Non mi futan pifain  
ayafain huamisi. Min noco yosaino,”

ishon yoishquicani.<sup>27</sup> Ascafiaifoan afanan ato cumaquea isca huashquin, "Mancaí uhuun yorafoma. Uncaí matofu rafumisima. Manfin chaca huamisifoquin. Ascacun umaquinoashu fotacahuun," ishon ato yoishquin.

<sup>28</sup>Ato asca huaino nannoashu uaicani omitsiscuai futsushcane. Dios fu rafuafo Abraham non Isaac non Jacob non nantifi Diosin tsain yoimisifo Dios fu icafo oin atoqui capai man fasi uaiqui. Yoishquin isca huaquin, "Ahuuscashuai non catioma. ¡Ohua! Ahuuscain un Dios nicacasmamisishaquin. Un omitsiscapanacaran," ishon man yoishquin. Man ascafaiton Diosimaquishon mato potashquin.

<sup>29</sup>Ascaino manifoti anoashu Diosin niaifoan ahuun yorafu iquina ano nococanashu afu unimashcane. Ascafaoan Diosin ato yoiquin isca huashquin, "Uqui fucahuun. U fu ipasharashcaquin," ishon Diosin ato yoishquin.<sup>30</sup>Shinancapon. Futsafocai natian Diosin ahuun yorafoma. Chipo icoira huacanashu ahuun yora ishquicani. Futsafoan man Diosin tsain nicafiamisishaquin tsoa ascacoinyafoma. Afocai afu itirofomaran, —ishon Jesús ato yoini.

**Jesús Jerusalén anoafihuun  
ramapai uaini**  
*Mt 23.37-39*

<sup>31</sup>Nantianri Fariseofo Jesusqui fucashon yoinifo, —Nunoashu mai futsa ari cariscatahuun. Nan niaifo Herodes mia ato rutumapai oiquin, —huaifoan.

<sup>32</sup>Jesús ato cumani, —Nan onanya yoitacahuun. "Uncaí nunoashu funa caima. Na shafata yafi shafa futsa un yorafu yoshin chaca atohuun nua un ato caya huafain isincaifori un ato cayahuayoi. Uhuun yonofo anaitan nan un nocopai ari un nococai." <sup>33</sup>Un

natian uhuun Upa ua yonoa cuscan nan fusti un yonoyoi nan un naitian. Man man tapia Diosin tsain yoimisifo Jerusalén anoshon fusti ato rututirofo."

**Jerusalén anoa yorafihuunoashu  
Jesús uaini**

<sup>34</sup>¡Ohua! Jerusalén ano icafoan. Manfin Diosin tsain yoimisifo rutufain nan Diosin matoqui nichian futsafori man toquirinin ato tsacaquí nanfon. ¡Ohua! Tacaranun ahuun facufo ahuun pui naman onutiro cuscan huaquin un mato yafi mato yorafu cushupafía mancaí ua nicapaimisima. Manricai uqui fumisima un mato cushunon.<sup>35</sup>Ascan natiancái tsoan mato cushuima. Diosiricai afanan mato cushuima. Ascacucai man ua afanan oinnacama Diosin matoqui nichian un nai murannoashu oaitian. Man yoiqui isca huaino, "Diosin nocoqui nichian fasi shara finacaia. Upa Diosin a shara huapanacaran," ishon man uhuunoa yoishquin, —ishon Jesús ato yoini.

**Jesús nocofunun ahuun poyan  
rafu yafi ahuun quishi ocuma rafuri  
quihiuarashica caya huani**

**14** <sup>1</sup>Man ascano chipo Fariseo niaifoan ahuun pushu muranshon Jesús tunutitian pimani. Ascaino yora futsafori afu pushu muran iquinifo. —Jesusmain ahua huacain non oinon, —icanashu. <sup>2</sup>Ascaino nannori nocofunu poyan rafu farashicain quishi rafuri farashiqui futsua. Ato fu iquia oincaquin atrifooan shinannifo, —Jesusmain cayahuacain non oinon, —ishon. <sup>3</sup>Ascaiton Fariseofo yafi Moisés cunu tapimamisifo Jesús ato yocani, —¿Tunutitianmun non ahua ahuusca huatiroma? ¿Moisés cununi cuscan tunutitian non yora caya huatiromanmun? —ishon. <sup>4</sup>Ato

yocafainocai tsoa puusinima. Ato asca huatan a isinincái Jesús mutsoano cayariscani. Ascacun Jesús a nichini.

<sup>5</sup>Ascashon Jesús ato yocani, —¿Rato man futsamun tunutitian maton facu futsa iyamarai maton moi mai quini muran pacucun man ihuirasca huatiromaquin? —ishon ato yocaino.  
<sup>6</sup>Tsoa puusinima.

**Nocofunun yafi ainfo fianaintian  
piitirofuhunoa ato yoini**

<sup>7</sup>Ascashon Jesús oinni shafacafi tsaopaiyaifoan —Noco oinsharanonfo, —icanashu. Ascaifoan oinquin Jesús ato yoini, —Ua nicasharacahuun an ahuara futsa mato yoi man tapinon. <sup>8</sup>Tsoan mato piimaino pushu ifo tsaoano tsaoyamacahuun. Un tsoa cuscaramaran ato huamapaiyamacahuun. Min pushu ifo fu tsaoaiton mia yoitiro, “Nuno min tsaotioma yora futsa nuno tsaooyo. Nan mia finoncoian. Ascan minfin futsano tsaotiroquin.” <sup>9</sup>Aton ointaifi pushu ifoan mia anori acaino min fasi rafipaicai. Shararocai min pasotain tsaoitiro.  
<sup>10</sup>Ascan ifoan mia tsaopaiquin a chaima mia cunatiro. Mia asca huaiton oinonfo a mia shara huai cuscan.

<sup>11</sup>Ascan tsoa oinanpaimisi chipo Diosin ismashquin acai ahuacuma. Ascan tsoa oinanpaimisima naanfin yorafoan ointaifi Diosin yoitiro isca huaquin, “Ua chaima tsaooyohuu. Ufu nipashquin,” ishon yoishquian, —Jesús ato yoini.

<sup>12</sup>Ato asca huatan nan pimai Jesús yoiqui isca huani, —Min yorafosi yafi yora mafo ichapayafo pimapaiquin nanfosi cunayamahuu. Nanfoanri mia copiquiri aton pushu anoshon mia piimacani. <sup>13</sup>Ascatamarocon man yorafo man pimapaiyai cuscan a yora ahuuomafo yafi yora nipaiqui ranainfo non a fushofori piimacahuun. <sup>14</sup>Nanfoan

mato copiquiri shara huapaifiaquicai atirofoma. Ascashu man Dios icari nococun man ato shara huaiton oian cuscan Diosin nantian mia shara huacoinskiriran, —ishon Jesús Fariseo yoini.

**Nocofunun tushu sharacapacoin  
yorafo pimapaiyaihuunoa Jesús ato  
ahuara futsa yosini**

*Mt 22.1-10*

<sup>15</sup>Futsan sapa ano tsaoshon Jesús yoini, —Ifon, Upa Diosin nantifi yorafo iquinai ano atofu iquiahu fasí ipasharashquian, —ishon yoaition.

<sup>16</sup>Jesús cumani, —Nocofunu futsan tushu ichapa itishara huashon yora ichapafo chani huani a futan piishquin.  
<sup>17</sup>Ascano man itishara huashon ahuun oinmati nichini ato yoitanon. Yoiqui isca huani. “Nan un chani huafó ato yoi foanfafaintahuun isca huaquin, ‘Man nantifi itishara huaqui. Fucahuun,’ ishon ato yoitahuun,” huani.

<sup>18</sup>Asca huano caashon ato yoaition, “Un cayotiromaran,” ishon yoipacunifo. Futsan yoiquin isca huani, “Un rama mau fia. Natian un mau ari capai oincai. Ascacun un mia yoi un ari cayotiromaran,” ishon yoini.

<sup>19</sup>Futsanri yoiqui isca huani, “Un rama moi rafurasí nushua mucu fustiti un fia. Un natian ato yonomapai yonosharacanimainquin un ato oinpai. Ascacun un ari cayotiroma mi futan piishquin,” ishon yoini.

<sup>20</sup>Ascano futsan yoiquiri isca huani, “Un rama ainfo fia. Ascacun un ari cayotiroma mi futan piishquin,” ishon yoini.

<sup>21</sup>Asca huaifoanno oinmati ahuun ifoano nasoshon nan yoaifo cuscari yoini. Ascaiton nicai pushu ifo atoqui sinacoinni. Afanan ahuun oinmati nichiqui yoini, “Natian pushurasi anoa

faifoti ano cariscatahuun yora  
ahuuomafo yoifain nipaiqui ranainfo  
yoifain fushofori yoiriscatahuun un ato  
pimanon,” ishon yoini.

<sup>22</sup>Asca huano afanan cashon nan yoia  
cuscacoin ahuun oinmatinin huashotani  
oi. Naso cura ahuun ifoqui oshon yoini.  
“Ifon, mian yoia cuscan mun ato yoia.  
Ascan natian man fucani. Ascafia min  
pushu fospicanima. Tushufori  
tushuiran,” huaiton.

<sup>23</sup>Pushu ifoan afanan yoini, “Afanan  
fai futsafo ari cariscatahuun ua ato  
yoishoshquin funonfo. Ato yoihui isca  
huaquin, ‘Uhuun ifoan pushu ano  
nitutama furiscacahuun mato  
pimapaiquin,’ ishon ato yoitahuun  
uhuun pushu fospí funonfo. <sup>24</sup>Nan  
yorafo un tau huaqui ato  
pimapaiyaoancai u futan pinacafoma,”  
ishon pushu ifoan yoiniran, —Jesús ato  
huani.

**Cristo tanapaifi yora itisharatiroquin  
omitsiscashoshquin**  
*Mt 10.37-38*

<sup>25</sup>Yorahuanrasí afu foaifoan.  
Ifiacuahuán ato yoini, <sup>26</sup>—Tsoan ua  
finonmacaifain apa yafi ahua non ahuin  
non ahuun facufo non ahuun yorafo non  
poifo afiri noiashucái ua tanamisi  
itiroma. <sup>27</sup>Ascan unfin mato ihui coyán  
iquinanqui nashoshquicain. Ascafia  
tsoan yoiqui isca huaima, “Natian un  
Jesús tana. Ascacun nai  
omitsiscafiaquicai un  
shinanchacaimaran,” ishon tsoan anori  
yoicasmai acai ua tanamisi itiroma.

<sup>28</sup>Nanscarifiai tsoan pushu huapaiquin  
iquisi shinanyotiro ahuun pui  
itiromainquin. <sup>29</sup>Ascano pui iyamaitocai  
pushu huatiroma. Quishifo fusti  
nichiano yorafo aqui cashutiofo.  
<sup>30</sup>“¡Cuu! ¡Oincapon! Na nocofunun ahua  
huatiroma. Ahuun quishifo fusti

nichian. Pushu anaitima. Ascaracai  
sharamaran,” icashu aqui cashutiofo.  
Nanscarifiai nan man naitian ua  
tanacahuun. Nan man naitian ua  
tanapaiyamaquin “Un Jesús tananon,”  
iyamacahuun.

<sup>31</sup>Nanscarifiai niaifo rafu noconain  
aton ranushumuafro rutunanonfo. Futsa  
diez mil ranushumuafro aya icaino futsa  
veinte mil ahuun ranushumuafro ya.  
Ascacun nan diez mil ranushumua  
ayaton iquisi fasi shinainyotiro  
ahuuscemain acanacain. <sup>32</sup>Ascacun afu  
niaifo tsain fomayotiro isca huaqui,  
“Non rutunainmaquin. Nanscanon. Min  
noco rutuyamacun min fipaiyai cuscan  
mia inantiroran,” icashu raunantirofo.  
<sup>33</sup>Nanscarifiai ratoranfoan uhunshon  
nantifi ahuunafo potayamashucái ua  
tanamisi itiroma.

**Sao sharacunma non fipaitiroma**  
*Mt 5.13; Mr 9.50*

<sup>34</sup>Ascacun shinancahuun. Sao  
sharacun non tototiro. Asca sao  
sharamacai non tototiro. Chacacun.  
<sup>35</sup>Nanscaracai tsoanshta yopaima.  
Potacani. Nanscarifi aquin tsoan  
uhunshon ua tanasharayamacai uhun  
nuusharaima. Chacacoin iqui.  
Tsoanmain man pafiqui sharayaquin ua  
nicasharacahuun, —ishon Jesús yoini.

**Chashoan cushumisiton ahuun  
chashoan funoa fuchiahunoa  
Jesús ato ahuara futsa yosini**  
*Mt 18.10-14*

**15** <sup>1</sup>Asca nantiantanri niaifo  
puifishomisifo yafi yora chaca  
huamisifo aqui funifo ahuun tsain nicai  
fucani. <sup>2</sup>Ascaino Fariseofo yafi Moisés  
cunu tapimamisifo Jesusqui tsain chaca  
huaquin yoinifo isca huaquin,  
—iOincapon! Jesús yora chacafu  
rafutiro ato futan piaiton, —ishon yoinifo.

<sup>3</sup>Ascaifoan onanshon Jesús ato yoiqui isca huani ahuara futsa ato tapimanon, <sup>4</sup>—Ratoran man futsa cien chashoan ayafiano fustishta amaqui funoano atirifi nan noventa y nueve fasi fununun man potayofaintio. A fusti funoa funaiyoicaqui nan man fuchiaitian. <sup>5</sup>Ascano fuchishon unimacain chishtoinfoan man iyafaintiro ahuun pushu ano foi caquin. <sup>6</sup>Asca huatan ahuun pushuano nocoshon man atoti chanihuai a chaima icafo yafi afu rafuafo ato cunaqui isca huatiro, “U fu unimai fucahuun. Uhuun chashoan funoa mun fuchiaquin,” ishon man ato yoitiro. <sup>7</sup>Ascacun un mato yoi nanscarifiai futsan ahuun chaca shatucoianshu afanan ipaoni cuscan atama Dios ifoacoинna oincani nantifi Dios icanoafo fasi unimacoincana. Noventa y nueve yora sharafo nanfocai tsoa Diosqui nasoima manmain tanasharacanashufin. Ascan nanoqui unimafiacani nan chaca huamisiton Diosin icoинra huanocaifin fasi aqui unimai finacoincaniquin.

#### Ainfoan ahuun toro funoa fuchiahuunoa Jesús ato ahuara futsa yosini

<sup>8</sup>Nanscarifiaiyainfo futsa mucu rafuti toro paratamacoin ahuun pui nuua aya ini. Pushu muran fusti funoni. Ascano lamparina otani ahuun tapa amo matsoyanan funashquin. Ascashon funariaquin fuchini. <sup>9</sup>Fuchishon ahuun yorahuaflo yafi a chaima icafo cunashon ato yoiqui isca huani, “Uhuun yorafoan ufu unimacahuun. Uhuun toroshta mun funofiaшон natian mun fuchiаian,” ishon ato yoini. <sup>10</sup>Nanscarifiai tsoan ahuun chaca shatuashma man funoa. Ascafiashon Diosin icoинra huaino Diospan oinmatifo nai murannoashu fasi aqui unimacoincaniran, —ishon Jesús ato yoini.

#### Apa furu rau huaa cuscahuunoa Jesús ato ahuara futsa yosini

<sup>11</sup>Afanan Jesús ato yoiqui ahuara futsa ato tapimaquin isca huani, —Nocofunu futsa facu rafu ya ini.

<sup>12</sup>Ascano chipocuton apa yoini, “Upan, nan naaquin mian inanfainonpacaoi natian iquisi ua inanhuan,” huani. Ascaiton apan ahuun pui cashcu futsa ahuun facu chipocu inanni.

<sup>13</sup>Ascano shafa ranan finontan ahuun facu chipocuton nan apa inan cuscan nantifi ahuun rafanan pui fiananan huani. Asca huatan mai futsa chaicoin ari cani. Nanrishon ahuun pui shafatifi potani monocain pauncaiyainfo furomafo fu icai. <sup>14</sup>Asca huaquai nantifi ahuun pui potaquin anaitini. Ascashon nantianri a mai ano tushu yamacoin ini. Ascashu arifi chipo tushu yamaino fasi fonicoinni. <sup>15</sup>Ascano nan mai ariashu nocofunu futsa ano cashon yono yocaqui isca huani, “Un mia yonoshopairan,” ishon yocani. Ascaiton pushu ifoan nichini yahuarasi faasi funununshon pimanon. <sup>16</sup>Ascashon yahuarasi maropa ahuun shacafo pimani. Ascaino nantian fasi fonicoinquin arifi piqui rashquini. Tsoancai a pimanima.

<sup>17</sup>Ascaquicai nan chaca shinapaoni cuscan afanan shinapainima. Nantian cayacafi shinankuin isca huani, “iOhua! Uhuun upa ahuun oinmatifoan natian man piisharafo. Aton tushufori man tushu huaflo. Asca unfin nunoashu fonicoин naicain. <sup>18</sup>Asca natian un afanan uhuun Upa ari cai. Nocoshon uhuun upa un yoitiro isca huakin, ‘Upan, un Dios chaca huafain miari chaca huamisi. <sup>19</sup>Ascan uncai natian min facu cuscara itiroma. Natian min yonoshomisi cuscara un itiroran,’ ishon uhuun upa un yoishquin.” <sup>20</sup>Nannori shinantan apa ari cani.

Ascashu caiton chai cunoa apan  
ahuun facu fuchini. Fuchitan fasi ahuun  
ramapaicoin aqui ichoni. Aqui nocoshon  
icoacufoan tsoatoshini.

<sup>21</sup>Ascaiton apa yoiqui isca huani,  
“Upan, un Dios chaca huafain miari un  
chaca huamisi. Asca un afanan natian  
min facu cuscara itiromaran,” ishon  
yoifiaino. <sup>22</sup>Apan ahuun oinmati yoini,  
“Ichoriscatahuun. Sahuuti  
sharacapacoin yafi anio fifain sapatori  
firiscatahuun. Uhuun facu ua  
sahuumashoshcaquin. <sup>23</sup>Ascashon  
moipan facu shoa sharari ua  
rutushocahuun uhuun facu un pimanon.  
Noco sharano non fasi aqui unimanon.  
<sup>24</sup>Uhuun facu man naa shinantsa  
amisishaquin afanan man nasaquin.  
Natian afanan ufu nuno nia. Man  
funofiani natian afanan man non  
fuchiaquin. Non ichananon nantifi aqui  
unimaquin pifain non mononon. Noco  
manutifo non manunon,” ishon apan  
yoini.

<sup>25</sup>Ascaino iyoa mau ano yonofaishu  
nasoqui pushu chaimashon nicani fasi  
manuti manuaino monoafioan.

<sup>26</sup>Ascaiton nicaquin ahuun oinmati  
cunashon yocani, “¿Uhuun upa pushu  
anoshon ahua huacanimun?” ishon  
yocaiton. <sup>27</sup>Ahuun oinmatinin yoini,  
“Min ushto rama nooco min upa fasi  
unimacoinquin ato ichanan huua  
moipan facu shoa shara ato pimafain  
manuti manufain ushto ahuuscata  
noco sharano unimaquin upa aquiran,”  
ishon yoini.

<sup>28</sup>Ascaiton nicaquin iyoa fasi sinacoin  
pushu muran iquinima. Ascaino chifi  
catan apa ahuun facu iyoa yoini,  
“Upashtan, pushu muran iquiyopun.  
Min ushto rama nooco sharaquin,” ishon  
yoiaiton. <sup>29</sup>Cumatama apa yoini,  
“Shinanpon. Un fari ichapa min oinmati  
cuscara un mia yonoshomisi. Ascashu

min ua yoiai cuscacoin un huamisi.  
Uncai yoitimamisima. Ascafiaucui  
mian chashoanun facu rutushomisima  
uhuun yorafo fu un ichananshon  
unimaqui un pinon. <sup>30</sup>Asca min facu  
chipocu min inan cuscan nantifi man  
pota. Ainfo furomafo fu iqui. Ascafiahu  
afanan miqui nocoaino unimaqui min a  
moipan facu rutushonaran,” apa  
huaiton.

<sup>31</sup>Apan yoini, “Upashtan, miancái  
potamisima. Min ufu iitiani. Nan  
uhuunafofin minariquin. <sup>32</sup>Ascafia min  
ushto man naa shinantsa amisishaquin  
natian man noco shara. Man funofiani  
man non afanan fuchia. ¿Asca  
ahuuscacumun non ichanainmacain  
aqui unimashquin?” ishon apan furu  
iyoa yoini, —ishon Jesús yoini.

### Niaifo patashari ahuun niaifocoinin yoya cuscacoin anima

**16** <sup>1</sup>Ascatan Jesús afu rafuafu  
yoiquin isca huani,  
—Nocofunun futsa mafo ichapayaton  
ahuun oinmati futsa niaifo patashari  
huani. Ascashon chipo nica ahuun  
oinmatinin ahuunafo  
cushusharashocuma. <sup>2</sup>Nicaquin  
cunashon yocani, “¿Ahuuscaí ahuunafo  
min cushusharamisimamun? Natian min  
afanan ahuun niaifo patashari iquima.  
Asca nantifi ahuun cunufo ua nifiafo ati  
shara huashohuun. Ahuutimain ua  
nifiafoquin ua ismashquin,” ishon  
ahuun niaifoan yoini.

<sup>3</sup>Asca huaiton nicaquin ahuun  
oinmatinin shinanni, “¡Ai timafin!  
¿Unmun natian ahuuscaiquin? Uhuun  
niaifoan ua pota. Uncai afanan a  
yonoshonima. Unfin nan papio fusti  
yonoqui fuya huamisiquin. Uncai  
curushcain yonotiroma un mau  
huapanan. Unricai yocacamisi ipaima.  
Un fasi rafipaitiro. <sup>4</sup>¡Aira! Natian mun

shinanshara. Ratoran futsafoan uhuun niaifo ichapa nifiafo un aton shucashopacufoanni ichapama nifinonfo. Un ascaino uqui unimanonfo. Uhuun niaifoan ua potafaiarnan futsafoan ua shara huatiroforan,” ishon shinanni.

<sup>5</sup>Ascatan nan niaifo nifiafoti cunani. Ascaino futsa taui aqui ocun yocani, “¿Uhuun niaifo ahuuti min nifiamun?” ishon yocaiton. <sup>6</sup>“Ocho cientos galones de shuni un nifiaran,” huaiton. “Min papio futsaqui ahuu. Cuatro cientos galones de shuni cunuhuu,” ishon niaifoan ahuu oinmatinin futsa yoini. <sup>7</sup>Ascaino nan nifian futsari aqui ocun yocani, “¿Uhuun niaifo ahuuti min nifiamun?” ishon yocaiton. “Cien forusa trigo un nifiaran,” huaiton. “Min papio futsaqui ahuu. Ochenta forusa un nifiaran, ishon cunuhuu,” huani.

<sup>8</sup>Ascano niaifoan ahuu oinmatinin acai cuscan oinquin yoini, “Minfin fasi onaiancoianquin. Min aca cuscan futsafoan mia shara huacaniran,” ishon yoini. Ascan nan icon nan icoira huamafoan fasi tapicoianfo yorafo parashcaquin. Nanfoan tapia cuscacai nan ua icoira huaoan tapiafoma. Ascafia nan icoira huaoancatsoa parapaitirofoma icocoin fusti yoitirofo.

<sup>9</sup>Un mato yoinon isca huaquin. Man pui ayashon nan Diosin tanamisifo yopaifoan ato inancahuun. Man ato shara huacun mato noinonfo. Ascafia naashucay afanan man pui yopaima man Dios ari nocaiton nan man pui inannifoan mato yoiqui isca huatirofo, “¡Aicho! Min ua shara huamisi. Natian min nocofu Dios ari nocoa. Noco fu ipahuun,” ishon mato yoitirofo.

<sup>10</sup>Ratoran futsa ichapama ayafashion nanshtahuunshon nan icaityahuunshon fisharashori ichapayashon nanscarifi huatiro ahuun fisharaquin.

Parashquima. Ascan ichapamayafashion ahuun rafanan fisharashoma parain. Nanscarifi huaqui ichapayafashion fasi finacaiqui ahuun rafanan fisharashoma paratiro. <sup>11</sup>Ascacun nuno mai anoashu man aya cuscan afohuunshon man shara huamaqui man pota. Diosiri mato inanpaiyai cuscacai mato inantiroma. Matoricai icoira huatiroma. Mato inanpaiyai cuscan nanfori man potatiro. <sup>12</sup>Nanscarifiai futsana man cushusharayamaiton. Tsoan mato inancointiromun matonacoин inon.

<sup>13</sup>Ascano oinmatincaí ahuun ifo nanno rafu nantian yonoshotiroma. Futsa noifain futsa noicasmatiro iyamarai futsa nan yoia cuscacoin huashotiro. Ascashon futsa, “Nacai ahuamaran,” ishon shinantiro. Tapicai huatiroma ratocaimain nicasharaiquin. Nanscarifiai Diosin yonoshopaiquicai man pui noitiroma maton ifo inon, —ishon Jesús yoini.

<sup>14</sup>Nan Fariseofoan pui noiaifohuunoa Jesús ato yoiaiton nicacani aqui cashupaiqui yoinifo. —iCuu! Ahuuomafashion nocoyiran, —icaifoan. <sup>15</sup>Onanshon Jesús ato yoini, —“Nafofin sharafoquin” man yorafo huamapaifaiton Diosin man mato onan. Manfin yorafo paratiroquin “Nafoanfin shara huacaniquin,” ishon yorafo man shinanmapaifaiton Diosin man mato onancoinshon ahuun nomurana shinain, “Nafoan fasi chaca huacaniran,” ishon Diosin matohuunoa shinain, —ishon Jesús ato yoini.

**Moisés cununi cuscan yafi Diosin nantifi  
ahuun yorafo iquinai cuscan**

<sup>16</sup>—Moisés Dioshuunshon cununi cuscan yafi Diosin tsain yoimisifoan cununifo cuscacoin Juan nocoitian futsafoan mato yoimisi. Juanpan tsain shara futsa nocoyquin tau huaquin isca

huani, “Diospan Furun matoqui chipo oi. Ascacun maton chaca shatucahuun. Man ipaoni cuscan afanan ascayamacahuun. Natian Dios fusti shinancahuun,” mato huamisi. Urifi un mato nannori yoimisi. Asca tsoan ascaran shinancanashu Dios niaifo ari iquitirofo. Nan fusti shinanshu Diospan yora itirofoquin.

<sup>17</sup>Diosin yonoa Moisés cununi cuscacoinashu non icoinscharanon. Noco yononi cuscaricai non unutiroma ahuara sharafu huaquin. Mai yafi nai cuyotirofialeshuaci Diospan tsain cuyopacunacama.

—Funun ahuin unuyamaino  
ainfoanricai funu unutiromaran,  
—ishon Jesús ato yoini  
*Mt 19.1-12; Mr 10.1-12*

<sup>18</sup>Ratoran futsan ahuun ahuinunuquin futsan fiishquin man chaca huai ahuun ahuincoinmafu icaino. Ainfon ahuun funu manunuquin futsan fiishquin arifi man chaca huai ahuun funucoinmafu icaiton, —ishon Jesús ato yoini.

**Nocofunu mafo ichapa yafi Lázaro  
ahuuomashta ini**

<sup>19</sup>Ascashon afanan Jesús ato yoiqui isca huani, —Nocofunu futsa mafo ichapayaton sahuuti mapash sharacoin sahuufain tushu sharacapafo shafatifi pisharamisi. <sup>20-21</sup>Asca futsan ahuun anu Lázaro nocofunu mafo ichapayaton ahuun cunu caincaito ano tsaoni. Yoratishon coyoashu tsaocun pashnan aqui oshon ahuun coyo ano tashoni. Ascaino Lázaro ahuuomatón shinanni, “Na nocofunu mafo ichapayatomain nan tushu huua ua inanpainonrati,” ishon shinanni.

<sup>22</sup>Ascashu Lázaro naani. Naacun Diosin oinmati afu nai muran icafoan ahuun yoshin Dios icari iyonifo. Nannori Abraham ica ini. Ascashu nan mafo ichapayari arifi naacun mai huanifo.

<sup>23</sup>Ascano omitsiscapanacafo muran cashon nan mafo ichapayaton Abraham yafi Lázaro foisquin oian icafo ini. Arishon chii isin tunuyamacaiquin cunani. <sup>24</sup>“Uhuun Upan, Abraham, uhuun ramapaihuu. Ua Lázaro nichishohuun. Ahuun mutotinin ua ana muchana huanyonon. Un nunoshon chii isin tunuimaquin,” ishon cunaiton.

<sup>25</sup>Abraham cumani, “Upan, min shinainmamun min mai anoashu isharapaoni. Asca Lázarofin omitsiscapaoniquin. Asca natianfin Lázaro man isharaquin fasi unimasharacoquin. Asca minfin natian fasi omitsiscaiquin.

<sup>26</sup>Mia ari capaifiaicai non ahuuscashu catiroma. Mirificai min ahuuscashu nuno nocoqui otirona. Manhuanhuan rafutan noco naquihua. Tsoan finontiromaran,” ishon Abraham yoititon.

<sup>27-28</sup>Afanan cumani, “Upa Abraham, unfin mucu fustiti yora yaquin. Asca Lázaro ato ano nichihuun ato Diosin tsain yoiaiton nicacoinonfo nuriahu omitsiscai futirofoquin,” ishon yoiaiton.

<sup>29</sup>“Nanfotin man ayafoquin Moisés futan Diosin tsain yoimisifoan cununio cuscan huafaifin afi ointirofoquin,” Abraham huititon. <sup>30</sup>“Ma. Upan, yora naashu funiaton uhuun yorafo yoiaitonnicatirofoquin. Ahuara chaca huamisifo cuscan shatutiro Dios icoindra huashcaquin,” ishon yoiaiton.

<sup>31</sup>“Ascan nan Moisés cununi cuscan nicayamafain Diosin tsain yoimisifoan yoiaiton nicayamashomun nan ratoran futsa naashu funiaricai icoindra huatirofomaran,” ishon Abraham yoiniran, —ishon Jesús ato huani.

**Non chaca huaino fasi musucoin  
*Mt 18.6-7, 21-22; Mr 9.42***

**17** <sup>1</sup>Asca huatan Jesús afu rafuafu yoini isca huaquin,  
—Ahuarafaoan mato chaca huamapaifafainshcani. Ascafia nan futsa

chaca huamafocaifin fasi omitsiscai finacoinshtcaniquin. <sup>2</sup>Ascashon ua icoinra huafuna futsan chaca huamai nancaifin fasi onaintimaquin finacoinkquin. Ascacun chaca huamataima toquiri ya tunushushon noacoin muran potafin shara icuanaquin.

<sup>3</sup>Asca oinfain. Tsoan futsa chaca huamaino fasi musucoin. Mi futan tanamisi futsan mia chaca huaiton rauhuahuu afanan mia asca huanonma. Ascashon min yoiaiton nicaquin yoinon isca huaquin, “¡Ohua! Ua rauhuahuu. Un afanan ascaran chaca huanonma,” ishon mia yoiaiton a rauhuahuu. <sup>4</sup>Nan shafata fusti mia chaca huaquin ichapa huafashion nan chaca huati mia rauhuapairaiton rau huafainaicahuun, —Jesús ato yoini.

**Non icoinra huaiton Dios noco  
ahuamamishti huashotiro**

<sup>5</sup>Asca huatan afu rafuafoan Jesús yoinifo, —Ifon, non mia fasi icoinra huapaiquin noco finonmafain icoinra huamahuu, —ishon yoiaifoan.

<sup>6</sup>Jesús ato cumani, —Nan mostaza ushu uhuapamashtacoinfiahu foaicano uhuapacoin yositiro. Nanscarifiai taui man ua icoinra huashon uhuun tsain man tapisharayotiroma. Chipo uhuun tsain maton nomurana man nanucoinshon ihui uhuapa ahuun tapofoya tsucucain “Ununhuan muran pacuhuu,” man huaino a muran afanan fanainacahuan man yoia cuscan atiro.

**Ahuun oinmatinin ifoan yoia  
cuscacoin ashotiro**

<sup>7</sup>Ascacun tsain futsa un mato yoinon. <sup>8</sup>Man oinmati yashomun mato maumamaqui oro yamaraquin chashoanfo cushuashu yatashta pushu ano nasoaitomun ahuun ifoan

yoitiromun? “Piyohuu,” huatiromun.

<sup>8</sup>Ma. Ascarama. Asacatamarocon man yoitiro isca huaqui, “Ua pichashoniyohuu. Ascan man icun mian yoitiro un picanon. Mun piqui anaitiano min chipo pitiroran,” ishon man oinmati yoitiro. <sup>9</sup>¿Asca ahuun oinmati nan yoia cuscacoin aino ahuun niaifoan yoitiro “¡Aichoran! Min fasi shara huaran,” ishon yoitiromun? Ma. Afi tau huafainca acama. Ahuun ifoan yonoa cuscan huaa. <sup>10</sup>Nanscarifiai Diosin mato yonoa cuscacoin aquin marifi yoicahuun isca huaquin, “Noncaí ahuama. Nofi tau huafaincaí non acama. Nocon Ifoan noco yonoa cuscan non acaran,” ishon yoicahuun, —Jesús ato huani.

**Jesús mucu rafuti nocofunufo  
aton nami tocoi futsua cayahuani**

<sup>11</sup>Jerusalén ano caaqueín Jesús nan fai Samaria yafi Galilea shatsocamun rafu finonfaini. <sup>12</sup>Ascashu pushurasi ano noccano mucu rafuti nocofunufo aton nami tocoi futsuafó aquí noconifo.

<sup>13</sup>Ascatan ato chaíma caiton oi ashcafinin cunganifo, —Nocon Ifo Jesús, nocohuun ramapaihuu, —huaifoan.

<sup>14</sup>Ato oinquin Jesús ato yoini, —Diosin yoimisifo ano fotacahuun. A man cayashara ato ismashcaquin, —ato huaino focani cayariscatanifo.

<sup>15</sup>Ascaíno fustiton mua man caya sharashu afanan Jesusqui naso curan oi ashcafinin yoini, —¡Aicho! Dios shara. Ua cayahua shararan, —ishon yoini.

<sup>16</sup>Ascatan Jesús naman fuopacuahuan, —¡Aicho! Jesús, min ua cayahua. Min fasi sharacoinran, —ishon yoini. Naanfin Samaritanon iniquin.

<sup>17</sup>Asciton Jesús yoini, —Un mucu rafuti nocofunufo cayahuafía na fustiton ua shinanquin ua yoishara yoa.

<sup>18</sup>¿Ahuuscaimun na nocofunu uhuun caifomafiahuu nan fusti uqui nasoa Dios

shara huapai futsafo uqui  
nasoyamafiaino? —ishon Jesús yoini.  
<sup>19</sup>Asca huatan a Jesús yoini,  
—Funicaitahuun. Min ua icoinra  
huashufin min cayasharaquin, —ishon  
Jesús yoini.

**Ahuuscashumain Diosin nantifi  
iquinai cuscan iishquicain  
Mt 24.23-28, 36-41**

<sup>20</sup>Ascano Fariseofoan Jesús yocanifo.  
—¿Ahuutianmun manifotiton ato niaifo  
Dios iishquiquin? —ishon yocaifoan.  
Jesús ato cumaqui isca huani,  
—Ahuuscashocai Diosin yorafo iquinai  
cuscan man ointiroma. <sup>21</sup>Ascashu Upa  
Diosin mato nomuran mato niaifo itiro  
mato yonoshquin. Ascacucai tsoan  
yoitiroma isca huaquin, “Diosin niaifo  
nuno noco mai ano icaraca,” tsoan  
huatiroma. Futsaricai yoitiroma isca  
huaquin, “Diosin mai futsaria niaifo  
icaran,” ishoncái tsoan yoitiroma, —ato  
yoitan.

<sup>22</sup>A fu rafuafori yoiqui isca huani,  
—Chipo un mato anoashu matomaqui  
caano fasi man ua shinancoinquín  
yoishquin isca huaquin, “Nocon Ifo no  
fu ipainon. Fasi non oinpaicoinran,”  
ishon yoifiaquicai man ua oinshquima.  
<sup>23</sup>Ascano futsafoanri mato yoishqui isca  
huaquin, “Nanfin Cristoquin. Oa ono  
icaran,” ishon futsafoan yoiaino  
futsafoanri, “Nuno icaran,” ishon  
yoiaifoanno. Ari foyamacain atori  
tanayamacahuun. <sup>24</sup>Uficoín un oaiton  
man ua oinshquin. Caná facaicaiton  
shafacafi non oinriscatatio. Nanscarifiai  
un oaiton shafacafi man oinshquin.  
<sup>25</sup>Ascafashu tauí un fasi  
omitsiscacoinsquin. Natian nia  
yorafoancai ua niaifo huapaicanima.

<sup>26</sup>Noé niyoano inifo cuscacoinrifiai un  
afanan oaitian nanscarifi ashcani.  
<sup>27</sup>Ascan nantian Dios shinantama

pisharafain ayafain  
fianansharacainaifoanno faitahuan  
noconi. Nanscasi ariaifoanno. Noé  
ahuun shashohuan muran  
iquitapaiyaino oinhuanrasí furiai  
unuyamacaiyaino faitahuanun nantio  
manifoti unuhuan marafumuni. Ascaino  
asai futsunifo.

<sup>28</sup>Nanscacoírnifi nan nocofunu Lot  
niyoano nanscacoínnifo. Dios  
shinantama pisharafain ayafain  
inanmitsashon ahuarao fifain mau  
fanafain pushu huapaonifo. <sup>29</sup>Nanscarifi  
ariaifoanno Lot Sodoma anoashu caani.  
Diosin yona cuscan. Nantianri Diosin  
yononi nai murannoashu chihuan  
atoqui pacunon. Ascaino Sodoma  
anoafo cuyocoínnifo. <sup>30</sup>Nanscacoírnifi  
aashqui un afanan oaitian. Ua  
shinantama afi apaiyaifo cuscasi  
huriaifoanno.

<sup>31</sup>Ascan tsoa pushu fomancayan  
niashucái afanan ahuun pushu muran  
iquitrioma ahuun ahuara fiishquin.  
Ascatama ichoriscatahuun. Nanscarifiai  
tsoacai mau yonofiai afanan pushu ano  
nasotiroma ahuun sahuuti fiishquin.  
<sup>32</sup>Ascacun Lotpan ahuinhuunoa  
shinancahuun. Naanton ahuun  
ahuarafosi shinain ifiacucuhuan oinpai  
nariscani cuscan marifi  
ascayamacahuun.

<sup>33</sup>Ascan tsoan shinanqui isca huai,  
“¡Ohua! Un Jesús tanaiton raca ua  
omitsisca huacanicati,” ishon  
shinanquin uhuun tsain cachiquiri huua.  
Nanscara yorafo naashu  
omitsiscapanacafo. Ascan tsoa  
uhuunoashu omitsiscacai naa. Nanscara  
yorafofin nacanashu ufu  
isharapacunacafoquin. <sup>34</sup>Ascacun un  
mato yoinon un oaitian yora rafu  
mosquitero muranfiashu fusti ufu  
cariscatanaino futsa nitushquin.  
<sup>35</sup>Nanscarifiaiyainfo rafu nanincani

futsa ufu uari cai yamariscatanaino  
futsa nituashu omitsiscashquin.

<sup>36</sup>Ascaino nantianri nocofunu rafu mau  
ano yonocani futsa uari cai  
yamariscatanaino futsa nitushquin  
omitsiscapanacafo muran caashquin,  
—ishon Jesús ato yoini.

<sup>37</sup>—¿Ifon, raqui focanimun? —ishon  
yocaifoan. Jesús ato cumaqui isca  
huani, —Ahuara naa nanno cotocotofo  
nocoriscatiro. Nanscarifiai un  
nocoaitian ua tanamisifo uqui  
furiscatashcaniran, —ishon Jesús ato  
yoini.

**Niaifo yafi ainfomaqui funu naahuunoa  
Jesús ato ahuara futsa yosini**

**18** <sup>1</sup>Afanan Jesús ahuara  
futsahuunoa ato yoini ato  
tapimashquin, —Upa Dios unutama  
cufiriai atsananonfoma. <sup>2</sup>Pushurasi futsa  
aria niaifo ini. Nan niaifo Diosqui  
ratutama yorafohuunri noinima.  
<sup>3</sup>Ascafaino ainfomaqui funu naa aqui  
oshon yoiriapaoni, “Ua noicasmamisiton  
ua chaca huaiquin ua yoishohuun ua  
afananasca huanonma,” ishon yoifaino  
<sup>4</sup>niaifo ahuun ramapaitama. Puusinima.  
Asca huafaino aqui ihuan ihuanpaoni.  
Ascaiton niaifoan yoini isca huaquin,  
“¡Cuu! Na ainfo funuoma fasi ua fucash  
huariai. Uncai Diosqui ratuima. Na  
ainfohuuricai un ramapaiyamafaino  
<sup>5</sup>fasi ua fucash huariai. Ascacun afanan  
ua fucash huanonma un aroshoniran,”  
ishon niaifoan yoini.

<sup>6</sup>Ascano a niaifo chacapan yoini  
cuscan nicacahuun. Chacafashon nan  
ainfo funuoma yoiriaiton man aroshoni.  
<sup>7</sup>Asca Diosicai a niaifo chaca cuscarama.  
Ascatamarocon fasi noco nicapai. Noco  
nicaicain atsanatiroma. A catoanfoan  
shafatishon yafi yamutishon cufiaifo  
cuscan ato nicacasmaima. <sup>8</sup>Ascacun un  
mato yoi nan manamisifo mato

aroshoriscatashquin. Ascan nan mato  
noicasmamisifo onaintimashqui. Ascafia  
un chipo afanan uhuun Upa Dios  
icariashu mai ano oaino fustirasiton ua  
icoinra huacaniraca, —ishon Jesús ato  
yoini.

**Fariseo yafi niaifo pui fishomisihuunoa  
Jesús ato ahuara futsa yosini**

<sup>9</sup>Ascan afanan ato ahuara futsa yoini  
ato tapimashquin, —Unfin sharaquin.  
Uncai chaca huamisima. Yora futsafo ua  
cuscaramaran, —ishon  
shinanmisifohuunoa Jesús ato yoiquin  
isca huani, <sup>10</sup>—Nocofunu rafu  
Israelifoan Dios fu tsainti pushu muran  
iquinifo Dios cufishcaquin. Futsan  
Fariseo icaino futsan niafo pui fishomisi  
ini. <sup>11</sup>Nan Fariseo ninacahuan cufiqui  
isca huani, “Uncai tsoa cuscarama.  
Unfin nocofunu sharaquin. ¡Aichoran!  
Upa Diosin, uncai na nocofunu niaifo  
pui fishomisi cuscarama. Uncai yora  
chacafo cuscarama. Unricai yomutsoma.  
Uncai tsoa paratiroma. Unfin yora futsa  
shara huatiroquin. Uncai uhuun  
ahuinma furi imisima. <sup>12</sup>Nan  
semanantifi un piqui tunuquin rafu  
huafafaini. Nan un fiashtafin un mia  
pashcashofafainiquin, Upa Diosin,”  
ishon Fariseo yoini.

<sup>13</sup>Ascafainocai nan niaifo pui  
fishomisiton anori yoitama. Mananquiri  
foistamari. Tutipacutishon shochi sutu  
sutuaquin yoini, “¡Ohua! Diosin, un mia  
fasi chaca huamisi. Uhuun ramapaihuu.  
Un chacaquin,” huani.

<sup>14</sup>Un mato cayacafi yoi. Nan pui  
fishomisi Diosin ahuun chaca soashofain  
ahuun yora ima. Ascafiaquicai nan  
Fariseo ahuun chaca soashonima. Ascan  
tsoan ahuunoa yoiqui isca huai, “Un  
shararan,” ishon futsafo shinanmapai  
nanscara yorafo chipo Dios ismashquin  
arifi chaca huamisicun. Ascan tsoan

yoiqui isca huaa, “Unfin chaca huamisiquin,” ishon yoicun nanscara yoraofin Diosin aton chaca soashotiroqui afu ipanfonfo, —ishon Jesús huani.

**Jesús Apa Diosihuunshon  
facufo shara huani**  
*Mt 19.13-15; Mr 10.13-16*

<sup>15</sup>Ascaino yorafoan aton facumishti Jesusqui ihuunifo ato manmanpacuquin Apa Dios cufishonon. Asca huafiaifoan afu rafuafoan ato yoini, —Maton facufo ihuutan nocon Ifo fucash huayamacahuun, —ishon yoinifo.  
<sup>16</sup>Asca huafiaifoan Jesús facufo cunani, —Uqui fucahuun, —ato huatan afu rafuafo yoini, —Unucahuun uqui funonfo. Ato nitun huayamacahuun. Uhuun Upa Dios niaifo icariaofin nan facumishti cuscaraforiquin. <sup>17</sup>Ascacun un mato icon yoi. Nan facumishtifoan Dios icoinra huacoinnafo cuscan tsoan icoinra huashmacai Dios icari iquinacafomaran, —ishon Jesús ato yoini.

**Nocofunu mafo ichapaya Jesús fu tsainni**  
*Mt 19.16-30; Mr 10.17-31*

<sup>18</sup>Ascaino Israelifoan aton niaifo futsa Jesusqui oshon yocaquin isca huani, —Tapimamisiton, minfin sharacoquin. Ua tapimahuu. ¿Unmun ahuuscatiroquin. Dios fu ipashquin? —ishon yocaiton.

<sup>19</sup>Jesús cumani, —¿Ahuuscaquin mian “shararan,” huaimun? Dios fusti sharaquin. <sup>20</sup>Diosin yononi cuscan man min tapian. Yonoqui isca huani, “Min ahuinma fu iyamahuu. Futsa rutuyamahuu. Ahuara onuyamahuu. Chaniri yoiyamahuu. Ascashon upa yafi uhuardi nicasharafain ato shara huahuu,” —ishon yoaiton.

<sup>21</sup>—Nantifi mian yoiai cuscan facushon un nicainifoannaran, —huaiton.

<sup>22</sup>Afanan Jesús cumaquin, —Fustiricai min nicataima. Nan yoiqui isca huaa. Ahuarao inanmitsashon ahuun rafanan pui fihuu ahuuomafo inanshquin. Min ascaitofin Upa Diosin nai muranshon mia ahuara sharacoin mucushoniquin. Asca huatan ua tanasharahuu, —ishon Jesús yoaiton.

<sup>23</sup>Nicai puusinima. Mafo ichapayacoинshon ahuun mafo potacasmal. <sup>24</sup>Ascaiton oinquin Jesús ato yoini, —Yora mafo ichapaya Uhuun Upa Dios niaifo ari nocopaiaciаnі nocotirofoma. Fustirasifin nocotirofoquin. <sup>25</sup>Nan ina camellocai acoya shoi muran finontiroma. Mimacaifi nocofunu mafo ichapaya Diosin niaifo ari iquitiromaquein, —ishon Jesús ato yoini.

<sup>26</sup>Ascaiton nicacaquin —¿Ascan tsoa Dios fu nipatiromun? —ishon yocaifoan.

<sup>27</sup>—Nocofunuai afinri numamutiroama. Diosin fustitofin yorafo numatiroquin. Diosinfín ahuamamishti huatiroquin. Nocofunufoancai asca huatiroma cuscan Diosin huatiroquin, —huaiton.

<sup>28</sup>Pedronun yoini, —Ifon, nonfin nocon ahuarao nantifi nocon yorafo potafurani mifu non oaquin, —ishon yoaiton.

<sup>29</sup>Jesús afu rafuafo yoiqui isca huani, —Un mato icon yoi. Tsoan Dioshuunshon ahuun pushu yafi ahuin non ahuun yorafo non apa yafi ahua non ahuun facufori potashon ua tanapaisharai. <sup>30</sup>Nanscara yoraofin Upa Diosin finacaiqui ato shara huaiquin. Ascano naashu Dios fu ipasharashcani, —ishon Jesús ato yoini.

**Nashquiай cuscahuunoa afan**  
**Jesús yoi futsani**  
*Mt 20.17-19; Mr 10.32-34*

<sup>31</sup>A fu rafuafo doce futsano atotisi iyoni nannoashu atofu tsainquin iscanyi. —Ua nicacahuun uhuun yoramishtichin. Non Jerusalén ano fononfocahuun. Nan

Diosin tsain yoimisifoan uhuunoa cununifo cuscan nanscacoain aiquin.  
<sup>32</sup>Nannoshon nocon caifoan futsafoan ato inancani. Nanfoan ua cashu mutsama huafain fasi ua chaca huacani. Uqui cumo michofain fichi cunoqui tuchiaton ua coshacani. Ascatan ua rutucani. <sup>33</sup>Ua asca huafiafo osha rafu non fustitan un afanan funiran, —ishon ato yoini.

<sup>34</sup>Ato asca huafiaitocai tsoa tapinima ato yoiai cuscan. Man nicafiaquiricai tapisharanifoma. Diosin ato tapimanataima.

**Jesús Jericó anoshon fusho caya huani**  
*Mt 20.29-34; Mr 10.46-52*

<sup>35</sup>Ascaino Jesús Jericó ano nocoataima fusho fai cusumun tsaoa ini. Nannoashu pui yocacamisi. <sup>36</sup>Ascano nan fai cusumun tsashon yorahuanrasí foannaiton nicaquin ato yocani, —¿Tsoafo na iscai foancanimun? ¿Ahua huacanimun? —ishon ato yocaiton. <sup>37</sup>Yoinifo, —Jesús Nazaret anoa cahuiran, —huanifo.

<sup>38</sup>Ascaiton nicaquin yoini, —Jesús, minfin David ahuun funaquin. Uhuun ramapaipun, —ishon cunani.

<sup>39</sup>Ascano Jesús fu foaifoan asca huanifo afanan tsainonma. Asca huafiaifoanno fasi oi ashcafínin yoiriani, —Minfin David ahuun funaquin. Uhuun ramapaipun, —huariaino.

<sup>40</sup>Jesús nituacucahuán ato yoini, —Nuri ua ihuushocahuún, —ato huaiton aquí ihuunifo.

<sup>41</sup>Ascaiton Jesús yocani, —¿Un mia ahua ahusca huashotiomun? —ishon yocaiton. Cumani, —Ifon, un fasi oinpaiquin, —huanifo.

<sup>42</sup>Ascaiton afanan Jesús cumani, —Ua icoinra huashon natian min oinsharairan, —huanifo.

<sup>43</sup>Ascaino nantian oinsharariscatan yoini, —Aicho! Man mian caya huaa

shara. Dios shararan, —icashu afu caiton oincaquin futsafoan arifi, —Aicho! Dios fasi sharacoinran, —ishon yoinifo.

**Jesús yafi Zaqueo**

**19** <sup>1-2</sup>Asca huatan Jesús Jericó anoashu cahuanaíno nanno nocofunu ahuun anu Zaqueo ini. Nantofin ahuun niaifo pui fishomisi iniquin. Pui fishomisi futsafoan aton niaifo ini. Nanrifi ahua yopatanaimacoin ini. <sup>3</sup>Jesús yorafoan naqui huano cahuannaiton ahuuscashoma oinpaiquin fuai mishtoshtacoianshu, —Ranishomain un oinnanti? —ini. <sup>4</sup>Ahuuscashoma oinpaiquin ranain. Ascacun rusoatori ichoni finoantaima. Ichotan fai cusumun ihui niahuun ichoinacahuani. Inainacahuatan ahuunshon Jesús cahuanaíton oinshquin icashu inacun. <sup>5</sup>Nan ihui nia naman finonfainquin foisinifoantán fuchishon, Jesús yoini —Zaqueo, fotoriscahuu. Un min pushu ano osha fusti yoi canon, —ishon yoini.

<sup>6</sup>Nicai Zaqueo fotoriscani. Fasi unimasharacoinquin ahuun pushu ano iyoni. —Aichoran! Min uhuun pushu ano oiquin. Iquiyohuu, —Zaqueo huani. <sup>7</sup>Ascaiton oincaquin yorahuanrasiton yoinifo, —Ajaa! Oincapon! Ahuuscaimun Jesús yora chacapan ahuun pushu ano caiquin? —icashu afi ranan yoinannifo. <sup>8</sup>Ascafiaifoanno Zaqueo Jesús yoini,

—Ifon, natiantafin un yora ahuuomafo cashcu futsa un ato inanpacuicain. Nan un finonmafaintan fia cuscan onushori un ato finonmafaintan ato inanpacuiquin. Un diez soles fianshonfin cuarenta soles un ato inainquin. Ascan veinte soles ato fianshonfin ochenta soles un ato

inaincain. Un ato onuyofiamisishaquifin un ato asca huapaiquin, —ishon Zaqueo yoini.

<sup>9</sup>Ascaiton Jesús Zaqueo yoiqui isca huani, —Zaqueo, na shafata min chaca un mia soashona min Diospan facu ica afu nipanorran, —ishon yoini. Ascan nanno pushu murannoafori ato yoini, —Na nocofunu Zaqueo arifi Abraham ahuun funa. Abraham Dios icoirra huua cuscan arifi natian icoirra huaa.

<sup>10</sup>Ascan tsoa funoa un ato fai shara ismayoi uhuun Upa Dios anoashu un oni nanfo Dios fu ipasharanonforan, —ishon ato yoini.

#### Puihuunoa Jesús ato ahuara futsa yosini

Mt 25.14-30

<sup>11</sup>Nan nicatan focani Jerusalén chaima nocoshon shinanco, —Nan Diosin niaifo ahuun yorafo iquinai cuscan nocoti chaimaran, —ishon shinannifo.

<sup>12</sup>Ascaifoan Jesús ahuara futsahuunoa ato yoiqui ato tapimaquin isca huani. —Nocofunu niaifo cuscara ini. Nan nocofunu mai futsa ari caani niaifo huashu afanan naso curashquin.

<sup>13</sup>Cataima ahuun oinmatifo mucu rafuti cunashon yoiqui isca huani, “Un mato pui paratamacoin inanfainicai. Nan puihuushon ahuara fiashu inanmitsashon finonmainifoan ahuun rafanan man finon nan un nasoaitian,” ishon ato yoini. <sup>14</sup>Ascaiton ahuun caifo futsafoan nan noicasmacoinnifo.

Ascashu caiton yorafo achon nichinifo. Nan niaifoco yoi qui isca huanonfo, “Nan nocofunu non niaifo huapaimaran,” huanonfo.

<sup>15</sup>Asca huafiaifoanno niaifoco coinin catoan niaifotan afanan ahuun mai ano naso curani. Ascashu nocotan ahuun oinmatifo cunatoshini ahuuti pui man fiafomainquin tapipaiquin.

<sup>16</sup>Ascaino futsan aqui oi taushon yoiqui isca huani, “Ifon, mian inan cuscan mucu rafuti finonmainifoan un mia fishoaran,” huani.

<sup>17</sup>Ascaiton niaifoan yoini, “¡Aicho! Minfin oinmati sharaquin. Mian yonoshon shara. Un mia ichapama inanfia finonmafain mian fishoano un miqui fasi unimai. Un mia yoia cuscacoin min aano. Ascacun pushurasifo mucu rafuti anoaoan ato niaifo min iquiran,” ishon yoini.

<sup>18</sup>Ascaino futsanri aqui oshon yoini, “Ifon, mian pui inan cuscan mucu fustiti finonmainifoan un mia fishoaran,” ishon yoaiton.

<sup>19</sup>Nicaquin nanrifi yoini, “Mirifi mucu fustiti pushurasifo anoaoan ato niaifo min iquiran,” ishon yoini.

<sup>20</sup>Ascaino oinmati futsari aqui oshon arifi yoini, “Ifon, naquian min pui. Un mia rashushon huashoan. Min ua inan cuscan finonmafain fiamafiahucu un funoama. <sup>21</sup>Un miqui ratuqui un mia mucushona. Mun tapia mincái tsoa shinainma. Minricai nocohuun ramapaima. Non mia yonoshofiaitocai min noco ahua inantiroma. Mina fusti itiroran,” ishon yoini.

<sup>22</sup>Ascaiton nicaquin ahuun ifoan yoini, “Min fasi chacacoin. Minfin shanishuniquin. Min tsainhuunshon un mia onaintimai. ¿Min shinamun un futsafo shinainmaquin? ¿Uaraca futsafoan yonoshofiaiton un ato ahua inanma? Un fimisi ua mian huua.

<sup>23</sup>Ascan nannori shinanfiaquin ahuuscaquin min rashushon huamun? Asca huatamarocon nan pui huamisifoanno min huua shara icuana paratama finonmainifoan fiishquin,” ishon niaifoan yoini.

<sup>24</sup>Asca huatan nanno niafo niaifoan ato yoiqui isca huani, “Nan oinmati chaca ahuun pui fiashon nan mucu

rafuti finonmainifoan fiarocon inancahuun,” ishon ato yoiaiton.

<sup>25</sup>Cumanifo “Ifon, nanfin ichapayacaiquin,” huaifoan. <sup>26</sup>Afanan niaifoan ato cumani, “Un mato icon yoi. Nan ratoran futsan ua icoira huacoinafin un fasi paratamacoinri inainqui. Ascan nan ua icoira huamafin nan ichapama aya cuscan futsa fiainquin. <sup>27</sup>Ascashon nanfoanfin ua noicasmacaquin yoafoquin, ‘Noncái mia niaifo huapaimaran,’ ishon uhuunoa yoafo. Ascacun ato ihuucahuun uhuun ointaifi ato rutushcaquin,” ishon yoiniran, —Jesús ato huani.

### Jesús Jerusalén ano cani

*Mt 21.1-11; Mr 11.1-11; Jn 12.12-19*

<sup>28</sup>Asca huatan Jesús Jerusalén ano caino. Achon ahuun tapimisifo fonifo.

<sup>29</sup>Machi ahuun anu Olivo tunanman pushurasi rafu Betfagé yafi Betania ini. Nanno chaima noconifo. Nocoshon afu rafua rafu nichini.

<sup>30</sup>—Pushurasi ano fotacahuun. Nocoshon man burro cahuashara nushucun man fuchicaicain. Tsoacai na burro camaqui cayomisima. Tupushon nuri ua ihuushotacahuun. <sup>31</sup>Futsan mato yocaiton, “¿Ahuuscaquin man burro cahuashara tupuimun?” yocaifoan ato yoiquin. “Nocon Ifo yopaiton non tupuyoaran,” ishon ato yoitacahuun, —Jesús ato huani.

<sup>32</sup>Ato nichiafocatan nococashon Jesús ato yoia cuscan nanscaco huaquin fuchitoshinfo. <sup>33</sup>Man tupuafoanno muropan ifofoan ato yocani, —¿Ahuusca huashquimun man nocon burro cahuashara tupuaquin? —anoa ifofoan ato yocani.

<sup>34</sup>Ascaiton cumacaquin, —Nocon Ifo yopaiton non tupuyoaran, —huanifo.

<sup>35</sup>Nan burro cahuashara Jesús

ihuushonifo. A fu rafuafoan aton sahuuti muropan catu camaqui fucashonafoanno acamaqui Jesús tsaoinifoannifo. Ascaíno cani.

<sup>36</sup>Cahanaiton fai naman cayan afofori sahuuti fucashonifo. Niaifo cahanaiton apaonifo cuscan Jesusrifi cahanaiton afofori sahuuti fucashonifo. <sup>37-38</sup>Machi Olivo tusirimucaitan ahuunshon tapimisifo aqui noconifo. Unimacaquin oi ashcafinin Jesús yoinifo,

—*iAicho! iDiosin shararan!*

Dioshuunshon ahuamamishti min huaiton non oian. iAicho! Nocon niaifo nocoqui oaquin. Diosin shara huamafafainni. Diosin yononi Jesús nocon Niaifocoin inon. Ahuunshon Diosin nantifi shara huanon. Ascarifiatan ahuun nai oinmatifoan nai muranshon yoicani, “Diosifin sharacoinshon yorafoqui ahuun Furun nichiniquin ato numanon,” man huaicain —ishon oi ashcafinin yoinifo.

<sup>39</sup>Asca huacatan Fariseofoan yorahuanrasí muranshon Jesús yoini, —Tapimamisiton, minhuunshon tapimisifo yoihuu ascanonfoma, —huaifoan.

<sup>40</sup>—Un mato yoinon. Ua yoisharayamaifoan na toquirifoan ua oi ashcafinin tsain shara ua yoicuanaforan, —ishon Jesús ato yoini.

<sup>41</sup>Machi tusirimupacuquin nan pushurasi Jerusalén anoa icafo oin atohuun ramapai Jesús uaini.

<sup>42</sup>Ascashon yoiquin isca huani, —iOhua, Jerusalén icanoafoan! Ua icoira huashufin man isharapacucuanaquin. Mancaí tapiama natian Diospan Facu nocoa. Mancaí ua niaifo huapaima. Un mato numapaifaiton man ua tanacasmai. Natiancaí un afanan mato numatiroma. Man fasi finoan.

<sup>43-44</sup>Mancaí tapiama un mato cushunon Diosin ua catonfiacun, tsoancai mato

noicasmamisisifoan mato ahuuscara huaiton mato numatiroma. Mato chituacuafó nantia iqui furancatan mato rutuquin anaitishocani. Matofo yafi maton facufo rutuqui cuyoshcani. Maton pushufo paoinquin futsui. Diosin ua matoqui nichificacum man ua nicacasmaiton matoasca huashcaniran, —ishon Jesús ato yoini.

**Jesús Dios fu tsainti pushu muranshon  
ahuara chacafó potani**

*Mt 21.12-17; Mr 11.15-19; Jn 2.13-22*

<sup>45</sup>Asca huatan Jesús Israelifoan Dios fu tsainti pushu muran iquitoshiquin oian a murannoashu ahuarao inanmitsaifoan fuchitan ato chifi cainmaqui futsani.

<sup>46</sup>Ascashon ato yoiqui isca huani, —Diospan tsain cunuquin isca huani, “U fu tsainti pushu muranshon man ua fusti cufitiroran,” ishon cunufianicun nan yomutsofoan ichananti cuscara man huapairan, —ishon ato yoini.

<sup>47</sup>Asca huatan shafatifi Israelifoan Dios fu tsainti pushu muranshon Jesús ato yoini. Ascafaiton nocon yorahuunshon Dios cufimisi niaifo futan Moisés cununi cuscan tapimamisifo non Israeli niaifo futsafoanri Jesús rutupainifo. <sup>48</sup>Asca huafiaifoan ato caifo futsafoan nan Jesús yoiai cuscan nicipaicoinnifo. Ascacuacai a rutupaquiaquin tsoan tapinima ahuuscashomain rututirofoquin.

**Jesús noco yonotiro**

*Mt 21.23-27; Mr 11.27-33*

**20** <sup>1</sup>Ascatan shafa futsaino Jesús Israelifoan Dios fu tsainti pushu muranshon ahuun tsain shara ato yoifain ahuuscashumain Dios fu ipatirofoquin ato yoiaino nocon yorafihuunshon Dios cufimisi niaifo

Moisés cununi cuscan tapimamisifo non Dios fu tsainti pushu cushumisifoan Jesús yocanifo.

<sup>2</sup>—¿Tsoan mia yonoamun min isca huanon? —ishon yocaifoan.

<sup>3</sup>Jesús ato cumani, —Urifi un mato yocai. ¿Juanpan yorafo unu muran iquimapacuni tsoan yona asca huanimun? <sup>4</sup>¿Diosin iyamarai nocofunufoan yononifomun? —ishon ato yocaino.

<sup>5</sup>Afi ranan yocanonannifo. —“Diosin Juan nichiniran,” non huaiton Jesús noco yoitiro. “¿Ascan ahuuscaquin man Juan icoínra huamamun?” —noco huatiro. <sup>6</sup>Ascan —“Juan nocofunufoan nichiniran,” non huaino yorafo nocouqui sinatirofo. Nantifi yorafoanmain yoimisifocun “Juanpan Diosin tsain yoimisiran,” ishon yoaifo. Ascan “Juan Diospan yonoamaran,” non icaiton toquirifoan noco rututiroforan, —icashu yoinannifo.

<sup>7</sup>Ascashon Jesús yoinifo, —Noncái tapiama tsoanmain Juan yonoaque, —huaifoan.

<sup>8</sup>Jesús ato yoini, —Urificai un mato yoima tsoanmain ua yona un ahuarao huaíquin —ishon ato yoini.

**Yonomisi chacafohuunoa Jesús ato yosini**

*Mt 21.33-44; Mr 12.1-11*

<sup>9</sup>Ascashon Jesús ato ahuara futsan tapimani isca huaquin,

—Nocofunu futsan ahuun mau fanafaini mai futsa ari caano. Futsafoan cushushonifo. Nasoshon ahuun fana atirifi pashcashoshquinon.

<sup>10</sup>Fimimisitian mau ifoan ahuun oinmati nichini ahuun fana fimifo fishotanon. Mau cushumisifoan a oinmati sutucashon ahuuoma nichinifo.

<sup>11</sup>Ascashon futsari nichian nanrifí sutunifo. Sutuafono maisi cani.

<sup>12</sup>Ascashon afanan futsari nichini. Nanri

nanscari huacashon. Maumamaquishon potanifo.

<sup>13</sup>Ascashon mau ifoan shinan futsani, “¿Un ahuusca huaimun? Uhuun facucoin nan un ahuun noiai un nichicai. Nanraca nicacointirofo,” huani.

<sup>14</sup>Ascano ahuun facucoin mau ano oaiton fuchinifo, “Ahuun facucoin oiquin. Non rutucoinon. Apa naano naafo ahuun facu ifoaiquin. Non rutunoncahuun. Afin aton apa fiama noncairocon non fianon,” ishon yoinannifo. <sup>15</sup>Asca ocun achicashon mau pasotain iyoshon rutucinnifo. ¿Asca a mau ifoan nicatamun ahuun facu rutuaflo ato ahuusca huaiquin? <sup>16</sup>Oshon mau cushumisifo ato rutuquin anaitishon futsafoan ahuun mau cushumaniran, —ishon Jesús ato yoini. Nicacatan, —Ascanacama ipainonran, —inifo.

<sup>17</sup>Ascaifoan Jesús atosi oinquin ato yocani. —¿Asca ahuuscaquimun Diosin tsain nunori yoiquin?

“Pushu yonomisifoan, ‘Ahuun quishi chacaran,’ ishon potafiacun ifoan afanan shara catonshon nichiano pushu onitiro.” Nanscarifiai man Diospan Furun pota. “A chacaran,” huafo. Ascafiacon Diosin man catoan ahuunoashu fustisi yorafo Upa Diosin fu nipatirofoquin. <sup>18</sup>Ratoran futsa a nicacasmaifo omitsiscatiro. Asca ratoran futsanfoan nicacasmariamisicun naitian a omitsiscapanacafo muran potashquinran, —ishon Jesús ato yoini.

<sup>19</sup>Nicacanashu Moisés tsain tapimamisifo yafi nocon yorafohuunshon Dios cufimisi niaifoan Jesús achipainifo cunu muran iquimashcaquin. Atohuunoa yoliaiton nicacani aqui sinanifo. Ascafiaflashocai a nicapaiyafouqui musucaquin tsoan achinima.

### Niaifofoan ato caifofo pui yocamisifohuunoa

*Mt 22.15-22; Mr 12.13-17*

<sup>20</sup>Ascacun nan fuparamitsamisifo Jesús fu foanfafainmisifo ahuun tsain nicapaicani ahuarashta amaqiri yoliaiton ato niaifoqui chanishcaquin Jesús achinonfo. Asca nanfo Jesusqui nichinifo cuncun huaqui yocatanonfo.

<sup>21</sup>Ascano nanfoan focashon Jesús icon tsainman yocanifo, —Tapimamisiton, ahuara icocoin fusti min noco yoifafainmisi. Nan atirifi min yoiad cuscan nannoricoinrifi min noco yoifafainmisi. Ascashon icon fustisi min nantifi yorafo Diospan tsain yoifafaini. Minricai ahuara yoipai ranomisima. Nantifi min ato cayacafi yoia. <sup>22</sup>Asca sharamainquin noco yoihu. ¿Norifimun non Romanonfoan aton niaifo Cesari non pui inainquin? —ishon yocaifoan.

<sup>23</sup>Nan fuparamitsamisifoan yoiaifo cuscan onanshon Jesús ato yoini.

<sup>24</sup>—Ua mato toro fusti ismacahuun, —ato huaiton. Ismaifoan ato yocani, —¿Tsoa ointsa torohuun nuuamun? ¿Tsoan ahuun anuri nuuamun ua yoicahuun? —ishon ato yocaiton. <sup>25</sup>Niaifo Cesarnaran, —huaifoan.

—Ascan Cesarnacun nan inancahuun. Ascan Diosinacuri Dios inancahuun, —ishon ato yoiaiton. <sup>26</sup>Nicacani fasi mustairicatan yoinifo, —Nan yoiad cuscacai tsoan taftiroma. Fasi tapisharacoianran, —icashu ahuun yoinannifo. Ascacucai yorafoan ointaifi, —Jesús amaqiri noco cumaran, —ishon tsoan yoitiroma. Ascashu afanan tsoa puusinima.

### Yora naashu afanan funitirofohuunoa yocanifo

*Mt 22.23-33; Mr 12.18-27*

<sup>27</sup>Ascano nannori Saduceofo ini. Nanfoan shinanquin isca huamisifo,

—Yora naashucuai afanan funinacamaran, —ishon yoimisifo. Ascan nanfo Jesusqui fucashon yocanifo.

<sup>28</sup>—Tapimamisiton, Noco shuni Moisés noco cunushoqui isca huani, “Ratoran futsan ahuin futan facu acashma naano afu nanua futsan ahuun facahua fitiro a futan facu aashquin,” ishon cununi. <sup>29</sup>Ascacun un mia yoinon. Siete nanopacuafio ini. Nan iyoacoinnin iyoacaichin ainfo fiqui tau huani. Ascafashion a futan facu acashma naani.

<sup>30</sup>Ascano chipocu futsan arifi ahuun facahua fini. Arifi aqui facu acashma naani. <sup>31</sup>Ascano chipocu futsanri arifi fiini. Nanrifí afutan facu acashma naani. Nanscasiai amaqui nai cuyonifo. Aqui facu acashma. <sup>32</sup>Ascatan ahuun unutani arifi ainfo naani. Facu nanuashma.

<sup>33</sup>¿Ascan ratotocaimun nai muranshon nan yorafo naashu funiaifotian fishquiquin nan fusti fipashu amaqui nai cuyoafó? —ishon yocaifoan.

<sup>34</sup>Jesús ato cumani, —Yorafo nuno mai ano niyoashu nocofunufo yafi ainfofo fiananmisifo. <sup>35</sup>Asca ratoranfoan Diosin tsain icoinra huacun Diosin ato imasharatiro afu ipanonfo. Asca nanfo naashu afanan funiashu Dios icari nocotan afanan fianantirofoma.

<sup>36</sup>Afananricai tsoa natirona. Nanfo Diospan oinmati afu nai muran ica cuscarao. Ascashu Diospan facufo. Naashu funicatan Dios fu napanacafó.

<sup>37</sup>Ascan Moisésirifi noco yoini yora naashu afanan funitiro nipashashquin. Ascashon noco yoiquin isca huani, “Chofo uru manhuain murannoia Diosin oi un nican. Ua yoiqui isca huaiton, ‘Unfin Abraham non Isaac non Jacob non afoan aton Diosiquin natian ufu niafo,’” ishon Moisés yoini. <sup>38</sup>Yora naashu afanan funiyamaino ahuuscashumun Dios fu itirofoquin.

Ascafia ascarama. Yora man naafianishaquin afanan nanfofin Dios fu ipatirofoquin. Ascacun Upa Diosifin ato Diosiquin. Diosinafin nantifi niafoquin, —ishon Jesús ato yoini.

<sup>39</sup>Ascaiton nicacani Moisés cununi cuscan tapimamisifoan yoinifo. —Tapimamisiton, min ato cayacafi yoiran, —huanifo.

<sup>40</sup>Ascashocai afanan tsoan yocabainima. Ato cumasharaino aqui ranonifo.

**Tsoan funamun Cristo**  
*Mt 22.41-46; Mr 12.35-37*

<sup>41</sup>Ascatan Jesús ato yocani, —Asca ahuuuscaimun “Cristo David ahuun funaran,” huamisifoquin. <sup>42</sup>Nan Davidcoinin fanainti cunuqui isca huani,

“Upa Diosin uhuun Ifo Cristo yoini isca huaquin, ‘Minfin ufu niaficoinquin. <sup>43</sup>Mia noicasmaifoan min ato finoncoian. Un ato shatumashquin mia afanan ahuusca huatiroma. Min ato iquiniran,’”

ishon Diosin yoini cuscan David cununi. <sup>44</sup>¿Criston David Ifono ahuuscashucon ahuun funa itiromun? —Jesús ato yoini.

**Moisés cununi cuscan tapimamisifoan chaca huamisifo cuscan Jesús yoini**  
*Mt 23.1-36; Mr 12.38-40; Lc 11.37-54*

<sup>45</sup>Ato asca huatan afu rafuafori ato yoiaiton yora huarasfain arifi nicanifo ato yoiqui isca huaiton.

<sup>46</sup>—Oinfain. Moisés cununi cuscan tapimamisifoan sahuuti chainipafó sahuusho ato oinmafoanfafacaní fasi tapicoianforan ato huamapaicani. Yora ichaparasi ano foanscacani “Sharacoinforan” ato huamapaicani. “Nanfoan fasi Diosin tsain tapicoianran” ato huanonfo. Ichananti pushu muran

iquitan shafacafi tsaotiofo ato oinonfo. Ichananshon piyainfoannori shafacafi tsaopacani. <sup>47</sup>Ascasho ainfomaqui funu naafo parashon pushu ato fiancani. Ascatan fasi chaicoinri cufiriatirofo atohuunoa shinansharanonfo. Ascafia nanfo fasi fuparamitsamisicoinfo. Nanfocaifin Dios ato onaintimaquin finacoinschquiquin, —ishon Jesús afu rafuaflo yoini.

**Ainfomaqui funu naa  
ahuuomashtacoinfiacun Dios inansharani**  
*Mr 12.41-44*

**21** <sup>1</sup>Ato yoitan fuhuunina cahuan Jesús oinni yora mafo ichapayafoan pui ichapa nanuti muran nanuiniyaifoanno. <sup>2</sup>Asca huaifoanno ainfo funuoma otan arifi nanuni. Toroshta rafusi a muran nanuni. <sup>3</sup>Ascashu oiainfoan Jesús ato yoini, —Un mato icon yoi. Na ainfo funuoma ahuuomashtafiaflashon inancoian. Ahuun toroshta rafu cuyoina. Ascacun na ainfo funuomashta fasi Dioso un noicoinquin inanshara. <sup>4</sup>Asca ichapayafoancai Dios inanfiacaquin atirifi tsoan inanqui cuyoafoma tushu huaflo. Na ainfoan Dios inain cuscacai ichapa yafoan inansharacoianfoma. Ascafia na ainfo funuoma ahuuomafiaflashon nantifi ahuun pui man inanquin cuyoina. Man inanqui anaitia afanancai ahuahuunshon ahuun tushu fitromaran, —ishon Jesús ato yoini.

**Jesús yoini, —Dios fu tsainti pushu paoinschquiran, —ishon ato yoini**  
*Mt 24.1-2; Mr 13.1-2*

<sup>5</sup>Ascano afu rafuaflo afirana yoinancaqui yoinifo, —Nocon Dios fu tsainti pushu toquiri putsamuashu cunuacua fasi sharashtacoin. Yorafoan ahuara sharashta Dios inancoianfo cuscan nutamuacua, —icashu

yoinannifo. <sup>6</sup>Ascaifoan Jesús ato yoini, —Nan man oiain toquiri putsamuashu cunua Dios fu tsainti pushu chipo paoinschquin. Afanancai toquiri putsamushquimaran, —ishon ato Jesús yoini.

**Nan cuyoaitian ahuarafo ishquiai cuscan**  
*Mt 24.3-28; Mr 13.3-23*

<sup>7</sup>Ascaiton cumanifo, —Tapimamisiton, ¿Nan min yoiai cuscamun ahuitian iishquiquin? ¿Ahuuscashomun non tapitiroquin a ishquiai cuscan? ¿Diosimun noco ahua futsa ismaiquin non tapinon? —ishon yocaifoan.

<sup>8</sup>Jesús ato cumani, —Oinfain. Mato parapaicaniqui. Yora ichapafafoan, “Un Cristoran,” ishon mato parapaishcane. Ascashon nanoanri yoishcane, “Un mato yoia cuscan Cristo samamashtacoin oiran,” ishon mato yoiaifoan ato tanayamacahuun. <sup>9</sup>A man nica yorafo rutunainfoanno ratuyamacahuun. Man nica futsafoan aton niaifo potashu arifi niaifo ipaiyaiton nica ratuyamacahuun. Nan un yoiafin nancacoin aashquiquin. Ascafia nantifi cuyoaitian nocataima.

<sup>10</sup>Iquisi mai futsa fu yorafo rutunainfoanno mani futsafori mani ya futsafori rutunainfoanno. <sup>11</sup>Ascaino mai futsafori fasi mai nayanaiyaicaino mai futsafori yora tushuomafo icaifoanno. Mai futsafori pau isininpacoinfoan ishquicani. Ahuara chaca futsa futsatapaflo icaino yorafo fasi ratucoinshcane. Nai ari tsoan oinyomisima cuscara oincani fasi ratucoinshcane.

<sup>12</sup>Ascataima achicashon mato ichananti pushu muran iyoshcane niaifoan mato yocanon. Ascashon chipo mato cunu muran iquimashcane. Asca huatan niaifo futsafoan ointaifiri

afanan matoasca huashcani.  
Uhuunshofin matoasca huashquicani.  
<sup>13</sup>Matoasca huafiaifoan man ato  
uhuunoa yoitiro. <sup>14</sup>Ascan man niaifofo  
ano cataima shinanchacayamacahuun  
nanfoan matohuunoa tsain chaca  
yoishcani. <sup>15</sup>Ascafia unfi mato cayacafi  
yoimamaicain man ato cumasharanon.  
Uhuun tsain shara un mato nomuran  
nanumashquin. Ascano nan mato  
noicasmaifoan tsoan mato  
cumayamafain matori taftifofoma.  
Ascashori tsoancai anorimaran mato  
huaima.

<sup>16</sup>Ascashon mato upafo futan uhuafon  
non mato yoracoinfo non man yorahuan  
futsafoanri mato achimashon atirifi  
mato rutumashcani. <sup>17-18</sup>Ascano  
uhuunshon nantifi yorafoan mato  
noicasmaifoan Upa Diosin mato  
cushusharafafainshquin. Ascashon mato  
rutufiafocai ahuashta man funotrioma.  
<sup>19</sup>Ascan omitsiscaviaquin man ua  
potama nan man naitian uhuun tsain  
tanasharashu Upa Dios fu man  
ipasharashquin.

<sup>20</sup>Mato noicasmaifo aton  
ranushumuafoan Jerusalén  
chituacuajoan oinquin man tapitiro  
man samamashta Jerusalén cuyoi.  
<sup>21</sup>Nanscaraoinecani Judea mai anoafaoan  
machi ari ichotacahuun Jerusalén  
anoafomaqui. Patashari icafo Jerusalén  
muran fuyamacahuun. <sup>22</sup>Nantifi Diosin  
tsain cununi cuscan Jerusalenuoan  
nanscacoin aiquin. Nantian Jerusalén  
anoafao Diosin ato onaintimai. <sup>23</sup>Ascacun  
ohua. Ainfo facu nanuaf yafi aton facu  
yomumishti shoma acaifoya nantifi  
Israel anoafao fasi omitsiscasha. Yora  
futsafo fasi atoqui sinacoincaquin ato  
asca huashcani. <sup>24</sup>Ato rutufain atirifi  
achicashon mai futsafoari ato  
nichishcani. Atoasca huatan a  
Israelifoma Jerusalén ano iyoshcani.

Nan Diosin ato nasopaiyaitian Israelife  
afanan Jerusalén ano fushcani. Yora  
futsafo afanan aton niaifo inonma.

**Diospan facu nasoaitian**  
*Mt 24.25-35, 42-44; Mr 13.24-37*

<sup>25</sup>Ascaino nantianri fari yafi oshu non  
fishifo nan imisima cusecain futsushcani.  
Ascaiton nuno mai anoafaoan oincani  
fasi ratucoincaquin yoishcani,  
“¿Ahuuscaimun unuhuan fasi fuchoino  
ahuun oi achacoinquin? Noncái iscara  
oinyomisimaran,” icashu ratucani  
afiranayocananshcani. <sup>26</sup>Ascaiton  
oincani yorafo ato ratupan naiyoshcani.  
Nai ari yafi mai ano ahuara chacafo  
tsoan oinyomisima cusecarafo oincani.  
<sup>27</sup>Ascaifoanno nantianri un nai ariashu  
coin camaqui mai ano fotoshquin.  
Ascaiton nantifiton ua oinshcani. Un  
Diospan facuashu uhuun  
curushhuunoashu un fotoaiton ua  
oinshcani. Un nantifi iquinai cuscan.  
<sup>28</sup>Ascacun nan un mato yoiai cuscacoin  
tau aino nan ua icoindra huafo  
unimacain ua manasharayanan  
itisharacahuun. Nanscacoin aino un  
matoqui oti chaimaquin mato numayoi,  
—ishon Jesús ato yoini.

<sup>29</sup>Ascashon afanan ato yoiqui isca  
huani, —Nan fana higuera yafi nii  
futsafohuunoari shinancahuun.  
Nanhunshon mato ahuara futsa  
tapimanon. <sup>30</sup>Nan nii pui risquisi  
futsuaiton man tapitiro manmain  
fariaitonfin. <sup>31</sup>Nanscarifiai nan un mato  
yoiai cuscacoin aiton tapicahuun Diosin  
niaifoan ahuun yorafo iquinai cuscan  
man nocoti chaima.

<sup>32</sup>Ascacun un mato icon yoi. Ahuarafo  
un mato yoiai cuscacoin aiton  
nataishoma oinyoshcani. <sup>33</sup>Ascaino nai  
yafi mai cuyoshqui. Uhuun tsain cayacafi  
iconcoin. Fiananancai apanacama. Un  
mato yoiai cuscacoin aashquin.

<sup>34</sup>Ascacun oinfain. Un matoqui nocoriscatashquin. Man itisharayamano ahuarao ahuuscarai futsui. Ascacun ahuara chaca huayamacahuun. Paunyanan monofafainyamacahuun. “¡Ohua! Un ahuuscarairan,” ishon shinanfafaiyamacahuun. Nanscafin nan ua icoinra huamafofo aaquin. Afo itisharafomano un nocoriscatashquin. Afo icai cuscan ayamacahuun. Oinfain. Masharo nicatsashu cunu muran iquitiro cuscan ayamacahuun. <sup>35</sup>Ahuarao ahuuscarai futsuaino nan maitio omitsiscai futsushcani. <sup>36</sup>Ascacun itisharayanan Upa Dios cufifafaincahuun omitsiscaitiam ahuun curushhuunshon mato amapaiyai cuscacoin huashcaquin. Ascashu man chipo uqui nocoitian un matoqui unimatiroran, —ishon Jesús ato yoini.

<sup>37</sup>Ascatan shafatifi Israelifoan Dios fu tsainti pushu muranshon ato yoini. Yamutifi machi ahuun anu Olivo ano oshani. <sup>38</sup>Funamanritifi aqui fupaonifo Dios fu tsainti pushu muranshon nicashcaquin.

**Jesús rutushcaquin afi ranan yoinannifo**  
*Mt 26.1-5, 14-16; Mr 14.1-2, 10-11;*  
*Jn 11.45-53*

**22** <sup>1</sup>Nan noco caifo Israelifoan ato fusititian shinanpaonifo Diosin nai oinmati ato facu iyoafofosi finonmansi rutuquima. Ascan nan fusiti shafa anunifo pan farashati maisiran ishon anunifo man nocoti chaima. <sup>2</sup>Ascan nantianri nocon yorafohuunshon Dios cufimisi niaifofo yafi Moisés cununi cuscan tapimamisifo ichanancashon shinanqui isca huanifo, —¿Ahuuscashomun non Jesús ato rutumatiroquin? ¿Ahuara chaca ahunoa non yoitiro ato rutumashquin? Non cashman rutuaino yorafo fasi mucacani noco raca asca huatirofo, —icashu yoinannifo.

<sup>3</sup>Ascaino nantianri Judaspan ahuun nomuran Satanás shinanchacamariscatani. Nan Judaspan ahuun anu futsa Iscariote namrifi Jesús fu rafua futsa ini. <sup>4</sup>Ascashu niaifo ano cani atofu tsainquicai. Ascano cashon ato yoini, —Unmun ahuuscashon Jesús ato achimatiroquin matoqui ihuunonfo, —ato huaiton. <sup>5</sup>Nicacani fasi unimacoinkaqui yoinifo, —¡Aicho! Non mia pui inain min noco Jesús ato achimashocun, —ishon Judas yoiaifoan. <sup>6</sup>Judas ato cumani, —Ai. Man ua yoia cuscan un mato Jesús achishotiroran, —ishon yoini. Ascacun nantian Judaspan shinanni ahuuscashomain un Jesús ato achishotiroquin. Yorahuanrasi yamaino achimapai.

**Ahuun unutaqui Jesús afu  
rafumisifo futan pini**  
*Mt 26.17-29; Mr 14.12-25; Jn 13.21-30;*  
*1Co 11.23-26*

<sup>7</sup>Asca noco fusititian non misi farashati maisi pimisi. Diospan nai oinmatinin nocon shunifoan ato facufo rututamarocon Diosin ato yononi cuscan chashoanun facufo rutunifo. Ascacun nocon fusititian norifi chashoanun facu rutumisi nocon shunifoan ani cuscan shinanshquin. <sup>8</sup>Ascacun Jesús Pedro yafi Juan nichiqui ato yoini isca huauquin, —Itishara huatacahuun. Non chashoanun facu picanon, —ato huaiton.

<sup>9</sup>Cumanifo, —¿Rato pushu muran caashon non ati shara huaicaimun? —ishon yocaifoan.

<sup>10</sup>Jesús ato cumani, —Jerusalén ano nocoshon man oian nocofunun unu tutsaomushon foaiton nan mufaitacahuun. Ascashu nan iquiaino afu iquifainshon pushu ifo man yoiqui isca huatiro, <sup>11</sup>“Nocon tapimamisiton mia yocaqui isca huua, ‘¿Rato cunu

muranshon ufu rafuafu futan non chashoanun facu picaimun?” ishon man yoitaiton.<sup>12</sup> Mato cunu uhuapa fomancayan ismai. Nan cunu muranfin nan non yopaiti mato ismiquin. Nannoshon atishara huacahuun, —Jesús ato huani.

<sup>13</sup> Ascaíno nan rafu Jerusalén ano focashon nan Jesús ato yoia cuscacoin oinnifo. Nannoshon chashoanun facu pichashonifo.

<sup>14</sup> Ascashon man itishara huashoafono Jesús yafi afu rafuafu ari fonifo.

Nococatan nantifi sapa ano tsaonifo.

<sup>15</sup> Ascashu tsaoafoan Jesús ato yoini, —Un matomaqui nataima un fasi mato futan chashoanun facu piiyopaimisi.

<sup>16</sup> Ascacun un mato iquisi icon yoiyoi uncai afanan mato futan piyyoima. Nan man Upa Dios niaifoan nantifi iquina ano nocoaitian yafi natian un acai cuscan ahuu cuscaramainquin man tapishquin, —ishon ato yoini.<sup>17</sup> Ascatan cucho finifoan Apa Dios cufiyoni, —iAicho! Upan —huatan. Ato cucho inanqui yoini, —Ayapacucahuun.<sup>18</sup> Un afanan mato futan na fimi unu ayaima nan un nasoaitian uhuun Upa Dios fu nantifiton niaifo un iishquiran, —ato huani.

<sup>19</sup> Asca huatan Jesús misi finifoan afanan Apa cufiyoni, —iAicho! Upan, —huatan. Torupacushon atoti inanqui afanan ato yoini, —Naafin uhuun caya cuscaraquin. Un nantifi yorafuhunoashu nai. Ascacun nan man piaitian ua shinanfafaicahuun, —ishon ato yotan.

<sup>20</sup> Nanscarifi huaquin cucho finifoantán ato ayamapacuquin yoini, —Na ayatihuunshon un mato ahuara funa shara yoi isca huaquin, “Uhuun imi foaino un matohuunoashu nai man ufu uhuun Upa Dios ari ipanon,” —ishon ato yoini.

<sup>21</sup> Ascashon Jesús afu rafuafu yoi qui isca huani, —Nuno ufu sapa ano tsaohan futsan ua ato achimai.<sup>22</sup> Ascan Upa

Diosin tsain inon pacuai uhuunoa cununi cuscacoinfin un naicain. Ascafia nan nocofunun ua ato achimanai cainyamanifin shara icuanaquin, —ishon Jesús ato yoini.

<sup>23</sup> Ascaiton nicacani afu rafuafu yocanonannifo, —¿Rato futsacaimun non achimaiquin? —icashu afi ranan yoinannifo.

#### Tsoacaimun fasi shara finacaiaquin

<sup>24</sup> Ascatan rato futsacaimun fasi finoinnifoan niaifocoin ishquiquin icashu fochishmanantanannifo.

<sup>25</sup> Ascaifoan Jesús ato yoini, —Nan icoirna huama niaifoan ato curushcain yonofafainmisifo. Atoasca huafiacauin yomisifo, “‘Noco shara huashofafainmisiforán,’ ishon nocohuunoa yoicahuun,” ato huamisifo.

<sup>26</sup> Asca huafiamisifo marifi ato cuscara iyamacahuun. Ascatamarocon facu pushco cuscara icahuun. Nanfo nan iyofofoan ato yonoafu cuscan ato ashotoirofo. Ascatari niaifopaicaquin futsafo shara huacahuun. Asca nan mato shara huafafainmisi nanfin niaifo iishquiquin.<sup>27</sup> ¿Ascan ratotocaimun futsafo finoanquin? ¿Futsafo yonomafafainmisi iyamarai ato yonoshomisi? Nan icoirna huamafoan yoimisifo nan yonomitsamisitocaifin futsafo finoanquin ishon yoimisifo. Anori yoiifao uncaifin mato yonoshomisiquin.

<sup>28</sup> Ascafia ahuara chacafó finonfiaqui man ua potama. Man uhuun nuua.

<sup>29</sup> Ascacun uhuun Upa Diosin ua catoan un afu niaifo inon. Nanscarifi aquin un mato catoan man ufu niaifo inon.

<sup>30</sup> Ascano un mato yoiai cuscan un niaifoanno marifi man ufu niaifo iishqui. Nocon Upa Dios ari man ichanaintian marifi man ufu tsaoshquin. U futan pifain man ufutan ayashquin. Ascashu nocon caifo Israelifoan aton

niaifo man iishquin. Nan doce shoco noco caifofoan ato niaifo man ishquiran, —ishon Jesús afu rafuafo yoini.

—Pedro min futsafo,  
“Un Jesús oinmisimaran,”  
ishon yoiran, —Jesús huani

*Mt 26.31-35; Mr 14.27-31; Jn 13.36-38*

<sup>31</sup>Asca huatan Jesús Pedro nan ahuun anu futsa Simón yoini, —Simón, Satanás Dios yocashon mia chaca huamapai. Umaqui mia imapaquín. <sup>32</sup>Ascafia un mia Upa Dios cufishona min ua icoíra huafain afanan ua tanasharanon. Ascan min afanan uqui nasoaino ufu rafua futsafori min ato yoisharatiro ua tanasharanonfo, —ishon yoiaiton.

<sup>33</sup>Pedronun cumani, —Ifon, mia cunu muran iquimanaifoanno urifi un mifu iquitiro. Ascashon mia rutuaifoannori urifi un mifu natiroran, —huaiton.

<sup>34</sup>Afanan yoini, —Pedro, un mia yoi. Tacara cuoataima min ato yoiquin, “Un Jesús oimisimaran,” ishon min ato yoiqui rafu non fusti huairan, —ishon Jesús yoini.

<sup>35</sup>Asca huatan Jesús ato yocani, —¿Un mato nichiyamuatian pui non forusa non sapato futsan maisi nichiano man ahuara futsari yopaiyamuamun? —ishon ato yocaiton.

Cumanifo, —Noncái ahuara futsa afanan yopayamuama, —huaifoan.

<sup>36</sup>—Asca natian pui ayashon mato pui foafain maton forusari fotacahuun. Asca nopus yopaquin maton sahuuti shochiquirinoa futsahuunshon nopus ficahuun. <sup>37</sup>Ascacun uhuunoa cununifo isca huaquin, “Arifi yoicaquin ‘man chaca huamisiran,’ huashquicani,” ishon uhuunoa cununi. Uhuunoa icon yoiamafiaquin nan icocoin yoi cafisca huaifo. Ascano uquin cununi cuscan samamashtacoin aiquin, —ishon ato yoiaiton.

<sup>38</sup>A fu rafuafoan yoinifo, —Oinpon. Na nopus rafu, Ifon, —huaifoan.

—Un mato yoipaiyai cuscacai man tapiamá. Ascacun non afanan aya tsainquimaquin, —ishon ato yoini.

**Jesús Getsemani anoshon apa cufini**

*Mt 26.36-46; Mr 14.32-42*

<sup>39</sup>Nan camisi cuscan machi Olivo ano Caino afu rafuafo achon fonifo. <sup>40</sup>Nanno nocoshon ato yoini, —Upa cuficahuun Satanás mato chaca huamapaiyai cuscan huashcaquima. Ascacun ua potashcaquima cuficahuun, —ato huani.

<sup>41</sup>Ato asca huatan chaimashta atomaqui caashon Apa cufinquin isca huani ahuun ratoconun mai chachipacufoan Apa cufini.

<sup>42</sup>—Upan, min ahuara futsa yorafo numashqui atiromamainquin nan min apaiyai cuscan huahuu. Unfi mun itisharaquin atohuunoashu omitsiscacai naashquin, —Apa huaino.

<sup>43</sup>Ahuun oinmati afu nai muran ica aqui niriscatan mutsimainifoanni.

<sup>44</sup>Asca huaino fasi curushcain Jesús Apa cufini fasi ahuun nomuran nan omitsiscái cuscan shinanquin. Ascaino imi foya niscan maiqui futosomuni.

<sup>45</sup>Ascacaini afanan afu rafuafo ano caaquin oian man oshafo ini. Fasi aton Ifon omitsisciton shinancani osahafainifo.

<sup>46</sup>Atoqui nocoshon oian oshafoan ato yoini, —Ahuiscaín Upa cufitama man oshariai. Ascaquima Upa cuficahuun yoshin chacapan mato chaca huamapaiyai cuscan huashcaquima. Ua potashquimari cuficahuun, —ato huani.

**Jesús achinifo**

*Mt 26.47-56; Mr 14.43-50; Jn 18.2-11*

<sup>47</sup>Nan ato yoiai muran yorahuanrasí nocotoshinifo. Nan afu rafumisi futsa Judascaifin rufofo oaino acho yora

huanrasi funiquin. Nocutan Judaspan tamo tsoacatoshini.<sup>48</sup> Ascaiton Jesús Judas yoini, —¿Judas, nan Diosin ua catoancaimun ua tamoqui tsoacaihuunshon mian ato achimaicai? —huani.

<sup>49</sup> Asca huaiton oincaquin afu rafuafoan Jesús yocanifo, —¿Ifon, non ato nopus rurapacutiromun? —ishon yocanifo.

<sup>50</sup> Asca huatan futsan nopus fifaitan nocon yorafohuunshon Dios cufimisi niaifocoinin ahuun oinmati pashtufain turani.

<sup>51</sup> Ascaiton Jesús yoini, —Unuhuu, —huatan afanan ahuun pafiqui funa futsa panichirishcatani.

<sup>52</sup> Ascashon Jesús nocon yorafohuunshon Dios cufimisi niaifo yafi ranushumuafa yafi Dios fu tsainti pushu cushumisifo yocani, —¿Ahuuascai nopus yafi coshatifo ya man uqui fuamun? <sup>53</sup> Shafatifi Dios fu tsainti pushu muran un matofu icanocai man ua achipaiti huama. Asca na yamu man uqui fua Satanás maton ifoanno, —Jesús ato huani.

—Un Jesús oinmisimaran,  
—ishon Pedronun yoini

Mt 26.57-58, 69-75; Mr 14.53-54, 66-72;  
Jn 18.12-18, 25-27

<sup>54</sup> Ascafaiton achicashon nocon yorafohuunshon Dios cufimisi niaifocoinin ahuun pushu ano iyonifo. Ascaito chipo achon Pedro cafiaquin fishtanima.<sup>55</sup> Umainti chii cutuhuashu yooaifoanno Pedrori atofu yooni.<sup>56</sup> Ascaiton niaifoan ahuun oinmati shomayaton Pedro fuchini. Chii uruquin fuchashaiton ahuun fuso onanshon yoini, —Naafin nan Jesús fu imisiquin, —huaiton.

<sup>57</sup> Pedronun cumani, —Ma, ainfon. Uncai Jesús oinmisima, —huani.

<sup>58</sup> Man ascano futsanri afanan onanshon yoini, —Minfin nan Jesús fu imisi futsaquin, —huaiton. —Ma. Unmafinquin, —Pedronun huani.

<sup>59</sup> Man ascano chipo afanan futsanri onanshon yoini, —Nancoinfquin. Jesús fu cahuacacaimisi. Nanrifi Galilea anoaran, —ishon nocofunu futsan yoiaiton.

<sup>60</sup> —Min yoiai cuscacai un tapiama. Uncai Jesús oinmisimaran, —itapaiyaino tacara cuoni.

<sup>61</sup> Nanscatanaino ifiacucahuan Jesús Pedro fuistani. Fuistanaiton nan Ifoan yoia cuscan shinanriscatani, —Tacara cuoataima min yoiquin rafu non fusti huai, “Un Jesús oinmisimaran,” —Jesús huacun Pedro shinantani.

<sup>62</sup> Umaintinoashu chifi caicaintan fasi uaicoinni.

### **Jesusqui cashupainifo**

*Mt 26.67-68; Mr 14.65*

<sup>63</sup> Ascaino nan cushuaflo Jesusqui cashu mutsamai taunifo. <sup>64</sup> Ascano fufoposhon sutucashon yocanifo, —¿Mia tsoan acamainquin? Oinyamafashion noco yoihu, —huanifo. <sup>65</sup> Asca huashon roaqui futsanifo.

### **Niaifofoan Jesús yocanifo**

*Mt 26.59-66; Mr 14.55-64; Jn 18.19-24*

<sup>66</sup> Shafatapaiyaino Israelifoan niaifofosi nan yorafohuunshon Dios cufimisi niaifo non Moisés cununi cuscan tapimamisifoan ichanannifo atoqui Jesús iyoafaoan yocashcaquin.

<sup>67</sup> Ascashon atoqui iyoafaoan yocanifo, —¿Minmun Criston? ¿Diosin mia catonni? Noco yoihu, —ishon niaifofoan yocaiton.

Jesús ato cumani —Un mato, “Ai,” huaitocai man ua icoinra huaima.

<sup>68</sup> Ascashon un mato yocaitoricai man

ua cumaima.<sup>69</sup> Ascacun natian yafi nantishon tapiquin uhuun Upa Diosin ahuamamishti huatiro futan un nantifi ato iquipacunacaran, —ishon yocaiton.

<sup>70</sup>Afanan yocanifo, —¿Ascan minnum Diospan facu? —ishon yocaifoan.

—Nan man yocain cuscafin unquin, —ato huani.

<sup>71</sup> Ascaiton nicacaquin yoinifo, —Nicacapon. Afanancai ahuunoa tsain chaca huaifoan non yopaima. Naan yoiai cusan naficoin man non nacairan, —icashu yoinannifo.

#### Jesús Pilato ano iyonifo

Mt 27.1-2, 11-14; Mr 15.1-5; Jn 18.28-38

**23** <sup>1</sup>Ascatan Israeli niaifofoan Jesú aton niaifocoin shinanmaqui iyonifo. Nan Pilato niaifofin Romanonfoan ato niaifo iniquin. <sup>2</sup>Ascano niaifofoan Jesú tsain paranacaquin yoinifo, —Na nocofunun fasi noco yorafo fucash huaquin ato yoia, “Romanon niaifofoan mato pui yocaiton inanyamacahuun,” ishon yoifain “Un Diospan facu un mato niaiforan,” noco huaran, —ishon Pilato yoinifo. <sup>3</sup>Ascaiton Pilatonun yocani, —¿Minnum Israelifoan niaifo? —ishon yocaiton.

Jesús cumani, —Nan mian yoiai cuscafin unquin, —huani

<sup>4</sup> Ascaino Pilato nocon yorafohuunshon Dios cufimisi niaifofo yafi nanno nia futsafo ato yoini, —Na nocofununcahuihua chaca yoima. Ahuashtacai ahuun nuama non iquimanai, —ishon ato yoini.

<sup>5</sup> Ascafaiton fasi curushcain cumanifo, —Na nocofununfin ato yoiquin Judea maitio fasi ato fucash huafoanfafaini. “Romanonfoan niaifo non potanon,” ishon yoiaquin. Tau huaqui Galilea anoafu yoi qui fucash huatan nunorifi man oaran, —huanifo.

#### Jesús Herodes ano iyonifo

<sup>6</sup> Ascaifoan nicaquin Pilato afanan ato yocani, —¿Na nocofunumun Galilea anoa? —ishon ato yocaiton. <sup>7</sup>—Aifain, —huaifoan. —Asca un Herodesqui Jesú nichinonquin. Nan Galilea anoa niaifoquin. Ahuuscamain huaicai afi noco yoinon, —ishon Pilato yoini. Nantianri Herodes arifi Jerusalén ano oni.

<sup>8</sup> Jesú aqui nocoaiton fuchitan Herodes unimacoinni. Fasi oinpaimisishaquin. —Ahuamamishti noco ismapainonran, —ishon ahuun nomuran shinanni. <sup>9</sup> Ascashon fasi ahuarao Jesú yocapaifaitocai cumanima. <sup>10</sup> Ascaino nocon yorafohuunshon Dios cufimisi niaifofo yafi Moisés cununi cuscan tapimamisifo Herodesqui fasi chanirianifo chaca huacaquin. <sup>11</sup> Ascaino Herodes futan ahuun ranushumuafaoanri fasi cashumutsama huaquin roarianifo. Niaifofan sahuti sahuumatan Pilato ano afanan nichinifo. <sup>12</sup> Pilato fu Herodes shara huantananyamafiamisishaquin nantian shara huantanannifo. Jesú achicanisi raunannifo.

#### Niaifofan ato yononi Jesú rutunonfo

Mt 27.15-26; Mr 15.6-15; Jn 18.39-19.16

<sup>13</sup> Ascacun Pilato afanan ato cunani. Nocon yorafohuunshon Dios cufimisi niaifofo yafi niaifofo futsafori ichanan huashquin. <sup>14</sup> Ascano ato ichanan huashon ato yoini,

—Man uqui na nocofunu ihuua. Man ua yoia naton yorafo tsain chaca yosian Romanonfoan aton niaifo non potanon, icaran ishon man ua yoia. Ascafiai ascarama. Maton ointaifi un yocafaitocai man ua yoiai cuscan ua cumaqui chaca huama. <sup>15</sup> Herodesricai ahuunoa ahua chaca nicama nan man

yoiai cuscan. Ascacun Herodes nocoqui afanan Jesús nichian. Na nocofununcaí ahua chaca huamafinquin naashquin.  
<sup>16</sup>Ascacun un onaintimaiyoi catanon, —ishon ato yoini.

<sup>17-18</sup>Ascaino mucainifoannifo. —Na nocofunu rutuhuu. Barrabás noco cainmashohuun, —huaifoan. Fuusitiansi Pilato a cunu muran iquiafo fusti ato caimapaoni. Faritifi nan yorafoan cainmapaiyaifo Pilaton ato cainmashopaooni.

<sup>19</sup>Nan Barrabasfin yora rutumisi iniquin. Nantori yoini, —Romanonfoan niaifo non potanon, —ishon yorafo yoini. Ascaiton cunu muran iquimanifo.  
<sup>20</sup>Ascaifoan afanan Pilatonun ato yoini Jesús nichipaiquin. <sup>21</sup>Ascafaiaino afanan mucainifoan yoinifo,

—Mastahuun, —huarianifo.

<sup>22</sup>Ascaifoan afanan Pilato ato yoini, —Ahuuscacufin. Ahuacai chaca huamafinquin. Ahuashtacai chaca huatananma napanan. Unfin onaintimashon nichiqui catanon, —ishon ato yoini.

<sup>23</sup>Ascafaiaino oi ashcafinin, —Mastahuun, —huarianifo. Yoiquin unuyamacaiyaifoan Pilato shinantani ascaiton, —Mafin acahuun. <sup>24</sup>Man fasi yoiriaicai asca nan man apaiyai cuscan huacahuun, —ato huani. <sup>25</sup>Nan Barrabás yora rutufain niaifo potapaifiamisicun nancai cunu murannoia cainmafain Jesusrocon ato inanni nan apaiyaiifo cuscan huanonfo.

**Jesús ihui coyán iquinanqui mastanifo**  
*Mt 27.32-44; Mr 15.21-32; Jn 19.17-27*

<sup>26</sup>Jesús iyocaquin oianfo Simón pushurasi patasharinoashu oaiton fuchitan Simón Cirene anoa yononifo, —Ihui coyán iquinan noco foshoicahuun, —ishon iyamafainifo. Jesús rucuaino achon iyashon foni.

<sup>27</sup>Ascaino yorahuanrasifo ya ainfofori achon fonifo. Nan ainfofo uaifonifo aton Ifo manocani. <sup>28</sup>Ascaifoan ifiacucuahuan Jesús ato yoini, —Jerusalén anoa ainfofoan, uhuunoashu uaiyamacahuun. Mafiri uaicain maton facufohuunoashu uaicahuun. <sup>29</sup>Manfin chipo

omitsisaquin yoishquiquin isca huaquin, “Non facuomafofi shara icuanaquin no fu omitsiscanonfomaran,” ishon man yoishqui. <sup>30</sup>“Machi nocoqui maocono non nai futsuafin shara itiroquin. Omitsiscashquima,” ishon nannori man yoishqui. <sup>31</sup>Un ahua chaca huayamafiamisicun ua isca huacani. Ascan tsoan ahuara chaca huaquin unuyamacaiyaifofin fasi finacaicani omitsiscamashcaniquin, —ishon Jesús ato yoini. Ascashon Jesús iyonifo mastaifocaquin. <sup>32</sup>Ascashon yomutso rafuri iyonifo Jesús ya mastaifocaquin

<sup>33</sup>Ascatan anoshon mastaifoanno noconifo. Nanno ahuun anu mapo shao ini. Nannoshon Jesús mastanifo. Ascashon nocofunu chaca rafuri ocuma futsa futsafain ocuma futsari futsa mastanifo. <sup>34</sup>Ascashon mastaifoan Jesús Apa cufini,

—Upan, ato rau huahuu. Ua isca huaifo cuscan tsoan tapiamaquein. Un min facuifacun tapiafoma, —ishon Jesús apa cufini.

Mastacatan ahuun sahuuti pashecananshcaquin. Aya cashuti ya cashunifo nan finonmanaton ahuun sahuuti fiqui tau huani. <sup>35</sup>Nanno yorahuanrasí mapo cashon oinnifo. Ascashon niaifofoanri roaqui futsacaquin yonifo,

—Non oinon. Futsafo numamisi cuscamaín afiri numaiquin nan Diosin catonni Cristo huashuforan afiri numaicain futsafo numamisi cuscan, —ishon yoinifo.

<sup>36</sup>Ascaino ranushumuafó aquí cashupainifo. Fimi unu focashcoín muran mishan pocotán inanpaicaquin.

<sup>37</sup>Ranushumuafóan yoinifo,  
—Minmain Israelifoan niaifoquin mifiri numahuu, —huanifo.

<sup>38</sup>Ascashon ahuun mapo manaonri aquí cununifo.

#### ISRAELIFOAN NIAIFORAN ishon.

<sup>39</sup>Ascaino afu masta futsan Jesusqui tsain chaca huani.

—Minmain Cristoqui mifiri numacain nocori numahuu, —huaiton.

<sup>40</sup>A fu masta futsan yoini, —Asca huayamahuu. ¿Minnum Diosqui ratuimaci? <sup>41</sup>Non chaca huamisicufin noco mastafoquin. Asca Jesuscái ahua chaca huayamafiamisicún mastaforan, —ishon futsan yoini.

<sup>42</sup>Ascashon nantori yoini, —Ifon, Dios niaifo ari nocoshon ua shinanhuan, —huaiton.

<sup>43</sup>Jesús cumani, —Icon un mia yoi. Na shafatan min ufu ari iquicaiquin. Nanno fasi sharacoin. Min ufu unimacoin sharapacunacaran, —huani.

#### Jesús nani cuscan

Mt 27.45-56; Mr 15.33-41; Jn 19.28-30

<sup>44</sup>Asca huatanaino fari masafinin racafiashu nan maitio faquishpacucahuani. <sup>45</sup>Ascainocai fari chashayonima. Ascashu man fari caino afanán shafani. Ascaino nantianri Dios fu tsainti pushu murannoá Dioshuunoashu panomanhuan pochimua aficoín nushmancayan fashnupacucahuani. <sup>46</sup>Ascaino Jesú斯 Apa cunainifoanni oi ashcafínin, —Upán, miari ua ihuicoinhuun, —huatan shacaica unufaini naani.

<sup>47</sup>Ascaiton ranushumua niaifoan yoiquin. —Icocoífinquin na nocofununcaí ahua chaca huayomisima.

Fasi sharacoin. Nan non oian cuscan nantifi Diosin acaran, —ishon ranushumua niaifoan yoini.

<sup>48</sup>Ascaiton oincani fasi manocoíncani fonifo. <sup>49</sup>Ascaiton ahuun yorahuafó yafi nan ainfo Galilea anoashu afu foafoan chai nishon oinnifo.

#### Jesús mai huani

Mt 27.57-61; Mr 15.42-47; Jn 19.38-42

<sup>50</sup>Nannori nocofunun ahuun anu José Israelifoan aton niaifo ini. Nan nocofununfin Dios tanasharapaicoinniquin. <sup>51</sup>Nantoricai niaifo futsafoan shinainfo cuscan shinannima. A niaifofin Arimatea mai anoa iniquin. Arimatea nan pushurasi Judea muran ini. Nantorifi Cristo nan Diosin catoan manapaoni aton niaifo inon.

<sup>52</sup>Ascashu cashon José Pilato yocani. —Un Jesús ahuun caya toquirinhuan quini muran mai huapairan, —ishon.

<sup>53</sup>Ascano yocafaini cashon a ihui coyán iquinanqui mastafo fotomapacufoan ahuun yoratishon racoshon toquirinhuan quini muran mai huani. Jesús naataima quini puhuunifo nan murancai tsoa maiyomisima muran Jesús mai huani. <sup>54</sup>Tunutitian man nococuanaino Jesús mai huani. Nan shafatan itishara huamisifotian ini.

<sup>55</sup>Ascaino nan Galilea anoashu ainfofo Jesús fu fuitafoan José Jesús mai huaiton oinshcaquin mufainifo.

Ahuuscashomain rataicain oinsharanifo.

<sup>56</sup>Ascashu nan ainfofo afanan aton pushu ano nasofainifo. Ininti shara itishara huai focani. Unupa yafi mutopa inin shara fii focani fonifo. Jesús ahuun caya camaqui ocashcaquin. Ascafaino tunutitian nasoyonifoma. Finonyocani. Israelifoan yononi cuscan tunutitian tsoa raqui cayotiroma ini. Ascacun nan nicacoinnifo.

**Jesús funini cuscan***Mt 28.1-10; Mr 16.1-8; Jn 20.1-10***24**

<sup>1</sup>Israelifoan tunutitian iyoco futsaino funamanrishta aton intinti rafu ya Jesús maia ano fonifo. Iquisi intinti ati shara huafaincani.  
<sup>2</sup>Nococauquin oianfo quini ahuun fupoita toquirinhuán tocoro man fupucua ini.  
<sup>3</sup>Ascaino iquifainpaiquin oianfo aton Ifo Jesús ahuun cayacai ano inima.  
<sup>4</sup>Ascaiton oinquin aton nomuran shinannifo, —¿Raquimun ahuun caya foafouquin? —ishon shinanpaiyaiifoanno nocofunu rafu ato sahuutifoya chashatanaino atoqui niriscatanifo.

<sup>5</sup>Ascaino ainfofo fasi ratucoincañi fuoi futsunifo. Ascaifoan Diospan oinmati rafutan ato yoini, —¿Ahuuscaquimun yora nia man funaicain nan yora naacun mai huamisifo muranno? <sup>6</sup>Afananci nunomafinquin. Manfin funiaquin.  
<sup>7</sup>—¿Galilea ano matofu iyoshon mato yoimisimun man shinainmacai? Mato yoimisi isca huaquin, “Chacafoan ua achishon ua mastafó un naafishu osha rafu non fusti finontan un afanan furnishuiran,” mato huamisi nammun man shinainmacai, —ishon ato yoinifo.

<sup>8</sup>Ascaiton nan Jesús ato yoimisi cuscan shinanriscatanifo. <sup>9</sup>Ascatañ ainfofo nasofaincani nan once nocofunufo Jesús fu rafumisifoquin chanitoshinifo. Nanno futsaforifi nan rama oinfainafo cuscacoin ato yoinifo. <sup>10</sup>Nanfotín María Magdalena non Juana non Santiago ahua María non ainfo futsafori nanfo atoqui chanitoshinifo.  
<sup>11</sup>Ascafiafoancaí ato icoínra huanifoma. —Icon yoicanimaran, —ato huanifo.

<sup>12</sup>Ascaiton nicafaini Pedro ichoni toquirinhuán huáa quini muran oincaí. Nocotan tucupacuahuán quini naisquin oian ahuun racoita fusti nanno mania ini. Ascaino Pedro —¿Ahuuscamun aaquin? —icaini cani.

**Jesús Emaús fain cani cuscan***Mr 16.12-13*

<sup>13</sup>Nan shafatanri Jesús tanamisi rafu pushurasi Emaús ano fonifo. Emaús Jerusalén chaima ini. <sup>14</sup>Nan rafu focauquin Jesús aquitafo cuscan afi rafu yoinanfonifo. <sup>15</sup>Ascaifoanno Jesuscoin afanán atoqui nocotan. <sup>16</sup>Ato fu cafiaítocai tsoan onannima. Diosin ato onantima huaino. <sup>17</sup>Ascaiton Jesús afincoin ato yocani,

—¿Nocofunu rafutan, raquiri man yoinanfoi caimun? —ato huaino. Pusitama nituriscatanifo.

<sup>18</sup>Ascaiton naan Cleofas fustiton cumani,

—Mirus fusti Jerusalén ano min icatoracafin min tapiamaquein na rama iquitan cuscan, —huaiton.

<sup>19</sup>—¿Ahua ahuuscaitamun? —ishon ato yocaiton.

—Jesús Nazaret anoaya non tsainquin. Nanfin Diosin tsain yoimisiquin. Diosin ahuun curushhuunshon noco yoimisi. Dioso huunshon ahuamamishti noco huashomisi. Ahuun tsainman yora caya huafain ahuara sharafo noco huashomisi. Nan acai cuscan nantifi man non oian. Diosin yafi nantifi man non oian. Nocofunu sharacoinfin non oinmisi. <sup>20</sup>Ascafiaiton nocon yorafuhuunshon Dios eufimisi niaifofo non nocon niaifofoan achicashon mastaitafo. <sup>21</sup>“Nancairocon nocon caifo Israelifo nocon Numamisi ipainonran,” non huamisi. Asca natian man naita shafa rafu non fusti man finoan. <sup>22</sup>Na funamanri ainfofoan no fu focashon man funatanafo ahuun caya quini muran yamaiton.

<sup>23</sup>Ascashon naso furan noco yoiafo ahuun caya anocuma. “Ahuun oinmati afu nai muran ica rafutan yoiafo Jesús

man afanan niaran,” noco huafó. Ascacun non shinan “¿Ahuuscamun aaquin?” ishon.<sup>24</sup> Ascaino nocomaquinoashu rafu ichocashon oiancaí ano Jesús ahuun caya icama. Naan ainfofoan yoiáfo cuscan iconcoirán, —ishon non yoia.

<sup>25</sup> Ascaifoan ato yoiqui isca huani, —iOhua! Manfin tatiñaco infoquin. Diosin tsain yoimisifoan yoinifo cuscan mancaí icoinra huacuanama.<sup>26</sup> Man cununi isca huaquin, “Diosin yonoa nan catoan Cristo omitsiscayotan. Apa Dios fu niaifoco iishquiran,” icashon ahuunoa cununiran, —ishon Jesús ato yoini.

<sup>27</sup> Ascacun tau huaquin ahuunoa Moisés cununi cuscan yoifain Diosin tsain yoimisifoanri ahuunoa cununifo yoifain nantifi Diosin tsain ahuunoa cununi cuscan atofu cafoquin shafacafi ato yoifoni.

<sup>28</sup> Ascano Emaús ano man nocoti chaíma nan rafutan shinannifo, —Noco finonfaini cairan, —ishon shinannifo.

<sup>29</sup> Ascatan nan rafutan yoinifo —Cayamahuu. Man fari caiquin. No fu iyopun, —huriaifoanno atofu caani.<sup>30</sup> Ascatan piaifoanno Jesús misi finifoantán Apa Dios yoiqui isca huani, —iAicho! Upan, non yopai cuscan min noco inamisiran, —huatan. Misi torupacushon aton inanni.<sup>31</sup> Ato inaintón Dioshuunshon Jesús onanriscatanifo. Onantapaiyifoanno atomaquinoashu yamariscatani.

Afanancái tsoan oinnima.<sup>32</sup> Ascano afi rafu yoinannifo, —Noco fu fain oquin Diosin tsainhuunoa cununi cuscan noco yoi fuaino non mua nocon ointi fupuisharatanaiton. Ahuun tsain sharacoinran, —icashu yoinancatan.

<sup>33-34</sup> Ascashu Jerusalén ano nasoriscafuranifo nan Jesús fu rafuafó once funashcaquin. Ascashon ato

fuchinifo ichananshu nan once yoinainfoanno, —Icon, nocon Ifo funia. Pedro man oinmanaran, —ishon yoinifo.

<sup>35</sup> Ascaifoanno nan rafu Emaús anoashu fua rafutari yoinifo, —Noficoinri Jesús man non oian Emaús fain non caino noco ahuunoa Diosin tsain yoia. Ascatan noco misi torupacushonaiton man non onanriscatanaran, —ishon nan rafutari ato yoinifo.

**A fu rafuafóqui Jesús niriscatani**  
Mt 28.16-20; Mr 16.14-18; Jn 20.19-23

<sup>36</sup> Nan yoiriaifo muran Jesús afanan atoqui niriscatani. Ascashon ato yoini, —Maton ointi unimacain isharacoincahuun, —ato huani.

<sup>37</sup> Ascaino —Yoshiran, —icashon shinannifo. Fasi mustairitan ratucoinnifo.

<sup>38</sup> Ascaifoan Jesús ato yoini, —¿Ahuuscai man ratuain? ¿Ahuuscai maton nomuran man icoinra huaimamun?<sup>39-40</sup> Ua oincahuun. Uhuun mucun yafi uhuun tau oincoincahuun. Pirico tohua. Nan uncoinfiquin. Yoshincai ua cuscara namiyacain shaoyamafiquin. Man manfin oincain shao yacain un nami yaran, —ishon ato yoini. Ato yoiquinasca huatan ahuun mucun tohua yafi ahuun tau ato ismani.

<sup>41</sup> Ascaiton oincaquin ato nomuran shinannifo, —Namaparaca non oincatin, —ishon shinannifo. Icoinra huacuatama fasi aquí unimacoinnifo. Ascaiton nan iconcainran huacaicainonfo ato tushu yocani.

<sup>42</sup> Ascaiton shiman shoi inannifo.

<sup>43</sup> Ascano aton ointaifi pini.

<sup>44</sup> Ascashon afanan ato yoini, —Munfin mato yoiyomisiquin. Uhuunoa Moisés non Diosin tsain yoimisifoan non fanainti uhuunoa cununifo cuscan

nanscacoainfin un aiquin, —ishon Jesús ato yoini.

<sup>45</sup>Ahuun shinapan aton nomuran nanumana aqui cununifo cuscan tapisharanonfo. <sup>46-47</sup>Ato yoini, —Diospan tsain cununi isca huaquin, “Cristo nan Diosin catoan naafiašhu afanan osha rafu non fusti finontan funishquin.” Ascacun uhuunshon ato yoifoanfafaintacahuun aton chaca shatucashon shinansharaifoan un ato chaca soashonon. Jerusalén ano ato yoiqui tau huatacahuun. Ascashon nan manifoati ato yoifoanfafaishecaquin.

<sup>48</sup>Ascashon un mato yoiatón man oian cuscan yafi man nica cuscan futsafori yoipacushacahuun. <sup>49</sup>Ascafia nuno Jerusalén ano oinyocaquin. Upa Diosin yoiyotiani cuscan un ahuun Yoshin Shara matoqui nichishqui. Ascano matoqui nocoshon ahuun curush

mato inain. Nantian un mato yonoa cuscan man futsafo uhuunoa ato yoitiro, —ishon Jesús yoini.

### Jesús nai muran cani cuscan

*Mr 16.19-20*

<sup>50</sup>Ascashon Jesús Jerusalén anoshon Betania pasoato ato iyoni. Betania pasoato nococashon Jesús mushainacahuan yoini, —Upa Diosin, fasi uhuunshon tapimisifo cushusharapacahuun, <sup>51</sup>—huatan atomaquinoashu Jesús nuinacahuan Apa Dios icano ari cani. <sup>52</sup>Ascaino nanno amaquinoashu naso furanifo. Yoinifo, —Jesús, min nocon Ifo fasi sharacoin. Non minhuun noiran, —ishon yoinifo. Yoicatan Jerusalén ano naso furancatan fasi unimacoinnifo. <sup>53</sup>Dios fu tsainti pushu muranshon Dios yoisharariapaonifo. Nanti.